

*BAMWENSE KUMI,  
MPE NKAMA MPE MAKUMI YIYA  
NA YIYA YA FUNDA YA BA-JUIF*



Mbote. Nsayi mingi na kuvwanda dyaka awa na suka yayi na kisalu ya Mfumu. Ya kele na ntangu ya yimbi na ngaanda, kasi, oh, ya kele kieleka mbote na kati. Yayi kele ntangu mosi yina beto lenda tuba ya kele mbote na kuvwanda na kati na kutalaka na ngaanda, mutindu yina ve? na kuvwandaka na ngaanda na kutalaka na kati.

<sup>2</sup> Mu kuzwaka kupema mosi ya mbote mazono na mpimpa mpe mu ke kuwa mbote mingi na suka yayi. Mpe beto kuzwaka ntangu mosi ya mbote mazono na nkokila, ve? Kaka ntangu mosi ya mbote! Mpe mu zolaka yawu. Beto kuzwaka . . . lukutakanu kutalanaka mutindu yina vwandaka na mosi mutindu yina vwandaka kuna na Shreveport, pene kaka mutindu kulanda ya kulandila ya Mpeve yina ke na kutambula kaka. Uh-hum. Na yawu beto kele na nsayi mingi mpe ke vutula matondo mingi na Nzambi samu na bumbote mpe kyadi ya Yandi, mpe samu na beno . . . beno bantu yina ke na kupesa mpeve ya beno na Yandi na kiwisa samu ti Yandi lenda nata beto mpe kutwadisa beto.

<sup>3</sup> Beno me mona, kana beno kele na dibuundu yina ke ndima ve, Mpeve-Santu lenda kaka kumonana ve. Beno fwana kuzwa kima, yina ke sala kintwadi. “Bawu vwandaka na kisika mosi mpe na ntima mosi,” mpe kuna kwizaka makelele ya ngolo katukaka Mazulu. Beno me mona. Kasi ntangu beno ke . . . Ata bambala mu ke sambila, mpe mu ke vwanda kilumbu mpe mpimpa na kutangaka mpe kusambilaka na ntwala ya Mfumu, ti mu kukwiza awa, mu banza na kuvwandaka na kupakulama na zulu ya munu, ti mu kwiza awa mpe kuwa kundima yina ve, beno me mona, Yandi—Yandi kaka . . . ya ke nyongisa Yandi na mbala mosi, Yandi ke monikisa kima ve. Kasi ntangu beno ke kwiza awa na yisi ya kupakulama mpe kuwa dibuundu ya beno na yisi ya kupakulama, ya kele na ntangu yina Mpeve-Santu ke banda na kusala kuna, mpe Yandi ke banda na kusala mpe kusala bima ya nene samu na beno. Na yawu, beno me mona?

<sup>4</sup> Mu me zonza ntete ve na pasteur na yina . . . Mu vwandaka me kuwa *Kwikila Kaka* mpe na yawu mu me kota na mbangu mpe kumona—kumona yina yandi vwandaka . . . yandi kubikaka samu na suka yayi. Ntangu yayi, Mpangi Neville, mu ke tuba na nge yinki, mu ke banda na kalasi ya fyoti yayi mpe kana

mu kuma na ngunga pene kumi na mosi, ok, nge landila mpe nge banda kulonga. Wapi mutindu? [Mpangi Neville me tuba, “Yinga, kukanga ve kupakulama na mutindu mosi, nge landila kaka.”—Mu.] Oh, mu ke kwikila ti kupakulama me vutuka awa, mpe, kupakulama me vutuka dyaka awa. Yandi kele. . .

<sup>5</sup> Mpangi Neville ntangu nyonso kele. . . Samu na banzenza awa bayina me vwandaka ntete awa ve, yandi (mu ke na kutuba yawu ve samu yandi kele awa, kasi) kele muntu ya lemvo, ke vwandaka mutindu yina ntangu nyonso. Yandi ke tangaka ntangu nyonso yawu—yawu. . . ke zingaka Disonuku yina, “vwanda na mvibudulu na mosi na yankaka,” ntangu nyonso na Klisto mpe ntangu nyonso na *mvibudulu*. Mpe kubanda tuka mu zabaka yandi yandi ke vwandaka mutindu yina; kaka ve tuka yandi kele awa na tabernacle, kasi kubanda tuka mu zabaka yandi mpe ya kele bamvula mingi me luta. Mbala ya ntete mu banza mu ke bambuka moyo mu monaka Mpangi Neville, samu na kuzaba yandi, mu kwendaka kuwa yandi kulonga kilumbu mosi kuna na dibuundu ya ba-Méthodiste, yandi. . . kuna na Howard Park, bamvula mingi, mingi me luta. Ya vwandaka, mu banza, makumi zole (mu banza) me luta to ya kulutula tuka mu me zaba yandi. Na yina yandi. . . mpe yandi vwandaka. . . yandi vwanda salaka, mpe, yandi kele. . . Oh, mu banza, tii ntangu ntama ve, yandi vwandaka sala ntangu nyonso kuna na sylviculture mpe nyonso, na Henryville, kisika yandi kele muntu ya bwala; mpe vwandaka sala samu na luzingu ya yandi, na kulongaka dyaka. Mutindu mu salaka na luzingu ya munu, mpe, tii ntama mingi ve, mpe na manima beto kumaka kisika beto zolaka sala kima yankaka dyaka ve kasi yayi. Na yawu mu kele na nsayi mingi samu na yawu. Mu kele na nsayi samu na Boss ya beto ya malu-malu, nge ve, Mpangi Neville? Yinga, tata! Kieleka mu zola Yawu. Inga, tata. Mu kele kaka ya kusepela mingi na Yandi!

<sup>6</sup> Mpe ntangu yayi mu banza ba ke katula bakalasi ya lukolo ya Lumingu. Inga. Kalasi ya bana ya lukolo ya Lumingu, ba ke katula yawu samu ti kivinga kele. . . ba me katula ba-cloison, samu ya bika dibuundu kukuma tii na manima.

<sup>7</sup> Ntangu yayi, na nkokila yayi beto ke kuzwa nsungi ya nene ya nsuka yayi, ya Laodicée. Mpe mazono na nkokila beto bakaka nsungi ya Philadelphie mpe kotaka na ntonono ya nsungi ya Laodicée mpe ndandani. Mpe dyaka mansweki yango ya nene yina Nzambi kubandaka na kumonikisa na beto na kati-kati ya bansungi yango, “Kyelo ya kuzibuka,” mpe “ngolo ya fyoti,” “me kangama na Ndinga ya Munu,” “kele na Nkumbu ya Munu.” Bima nyonso yango na kati kuna, mutindu Nzambi salaka na mutindu ya kuyituka salaka bawu kieleka samu na beto, na yina beto ke vutula kieleka, kieleka matondo.

<sup>8</sup> Mpe beno zimbana ve, kana ya kele na banzenza na kati-kati ya beto yina kele na bantu ya kubela, beto ke kuzwa kisambu

ya bambevo Lumingu ke landa, sabala mosi katuka bubu yayi. Mpe ya ke . . . kana Mfumu zola. Mpe ya ke vwanda . . . Beno ke talaka ntangu nyonso mutindu mu ke zolaka kutuba yawu, “Kana Mfumu zola”? Biblia ke tuba na kusala yawu, “kana Mfumu zola.” Beto zaba ntete ve; Yandi ata mbala mosi ve tubaka na munu ti mu ke vwanda awa, mpe ti dibuundu ke vwanda awa, mpe ti beto nyonso ke vwanda awa, to nyonso yankaka. Na yina kana ya kele luzolo ya Yandi, beto ke vwanda awa, beno me mona. Kana ya kele ve luzolo ya Yandi, kieleka, beto ke vwanda ve.

<sup>9</sup> Mpangi Neville ke landila na kusamuna yawu na luzabusu ya yandi na ladyo, mpe bayankaka, mu banza, mpangi ya bakala awa mpe bayankaka yina kele na baluzabusu na ladyo. Mpe na yina beno kwiza na ntangu ya mbote mutindu beno lenda Lumingu na suka, samu ti beto ke na kuingila nkonga ya bantu awa samu na kusambidila, mpe beto zola kukwiza. Beto ke . . . mbote, beto mona, mu . . . Kana ya kele na nkonga ya bantu ya nene mutindu yayi, ya kele ntangu nyonso mbote na kuvwanda na bakalati ya kisambu samu ti bantu kele mingi ya kukangisa kintwadi, beno kaka . . . mosi ke pusa bayankaka mpe bima ya mutindu yina. Mu banza kana beno ke kuzwa kaka yawu na mutindu ya kusungama samu bawu kukwiza mosi na mosi ya ke salaka . . . ke katula poto-poto na kati-kati ya bantu, beno zaba.

<sup>10</sup> Mpe—mpe kuna kaka . . . Mpe beno kele na nsatu ve ya kutelama tii ba ke bokila kalati ya beno. Beno vwanda kaka kisika beno kele kana beno kele ya kubela mpe ke na kuwa yimbi, mpe beno kele ve na nsatu ya kutelama na mulonga ya yinda. Kaka ntangu ba ke bokila kate ya beno, beno ke mata kaka mpe ba ke sambila samu na beno mpe beno ke kulumuka, mpe mosi yankaka ke mata, mutindu yina. Mu ke zolaka yawu mbote kusalama mutindu yina. Munu bantangu mingi ke lombaka na bampangi ya babakala na kutula kiti, kana muntu ke kuwa yimbi na yina bawu ke na kuingilaka, beto ke bokila lutangu ya fyoti na mbala mosi; bawu ke kuwa yimbi, mbote, kubika kaka bawu—kubika bawu kuingila kuna na kiti ya bawu tii . . . to kuvwanda na kiti tii ba ke bokila lutangu ya bawu, tii ba ke sambila samu na bawu.

<sup>11</sup> Mpe mu ke kwikila na kubeluka ya Nzambi; ya kele mosi ya malongi ya nene ya Biblia. Kasi kubeleka ya Nzambi ya kele na mingi kulutila kubeluka ya Nzambi kaka. Kubeluka ya Nzambi ke tuba kaka ti “ya kele na Nzambi yina ke na kwiza dyaka.” Kubeluka ya Nzambi ke zonzila na yinki? Ya kele lufutu ya mvumbukulu ya beto. Kana ya kele ve na kubeluka ya Nzambi kuna ya kele ve na mvumbukulu, beno me mona. Mpe kana ya kele ve na Mpeve-Santu ntangu yayi samu na kubotika beto, ya kele ve na Luzingu ya Seko na yinza ke na kwiza. Biblia ke tuba, “Yayi kele lufutu ya mpulusu ya beto.” Mpe beno zaba yinki kele *lufutu*? Ya kele “ndambu ya mbongo ya kufuta,” beno

me mona. Kana beno kwenda mpe kusumba . . . Beto tuba beno me sumba bilanga, bawu vwandaka na nsatu ya mafunda kumi ya ba-dollar samu na yawu, mpe beno me futa mafunda zole, yina kele “lufutu” ya beno ya mbongo, ba ke bokilaka yawu lufutu ya yawu. Ntangu yayi, kana mbotika yayi ya Mpeve-Santu kele kaka lufutu ya yina ke na kwizaka, oh, yinki ya ke vwanda ntangu beto—ntangu beto ke kuzwa ntalu nyonso? Ya ke vwanda nkembo!

<sup>12</sup> Ntangu yayi, na suka yayi beto ke meka na kuvukisa, kana Mfumu zola, ndambu ya bima yango, ya . . . na kati-kati ya bansungi ya dibuundu (bayayi kaka na kati awa) ya kele na kima ke na kusalama. *Nkama mpe Makumi Yiya na yiya ya Funda, Bayina Bikanaka, Mwense ya Kulala, Mwense ya Ndwenga, mpe Kukanga ya Mpeve-Santu, Kutula kidimbu ya Kibulu*, bima nyonso yina kaka . . . Ya kele nsuka ya nsungi, mpe nyonso ke kubwa kaka na kati awa na kisika mosi, na yawu ti kuna beto fwana baka kaka tii hiver ke suka samu na kumanisa yayi, kasi beto . . . samu na kubaka Buku ya Apocalypse, kumona mutindu Yawu ke vukana kintwadi.

<sup>13</sup> Beno me talaka ntete? Civilisation kuzyetaka mutindu mosi. Tata Wood. Ya kele . . . Yayi, muntu kele na bambakusulu ya yandi mosi, yandi kele na bambakusulu sambanu, to bambakusulu tatu, na kisika, yina yandi kele na yawu tuka yandi—tuka yandi kwizaka na zulu ya ntoto mafunda sambanu ya bamvula me luta. kasi kaka awa na nsuka, kaka na nsuka ya mwa ntangu fyoti, nsuka ya nkama ya bamvula . . . Oh! Yandi kwizaka, ntama kuna, vwandaka tambula na malembe na kipusu ya ngombe. Kasi katuka kipusu ya ngombe yina, nkama ya bamvula na manima, yandi me katuka kipusu ya ngombe na fusée yina ke dumuka pene ya mafunda zole ya ba-mile na ngunga mosi. Ya kele mbangu mutindu yandi me luta, katuka kipusu ya ngombe na fusée. Mpe, beno tala, ya kele me vwanda kaka bamvula fyoti me luta, mbote, mu ke tuba mingi ve bamvula makumi tanu me luta.

<sup>14</sup> Ntangu mu vwandaka mwa mwana ya bakala awa na Utica Pike, ba vwandaka na kiboba mosi . . . ya vwandaka na muntu mosi na nkumbu ya Elmer Frank yina vwanda vwandaka na lweka awa. Yandi vwandaka mutindu avoka. Yandi kwelanaka na ntwenya mosi ya kento kuna na nzila yina tata ya munu salaka samu na yandi—samu na tata ya yandi, nkumbu ya yandi vwandaka Lusher. Mpe bawu . . . mpe yandi vwandaka, na mutindu mosi ya tomabilu; ya vwandaka na manivelle, beno ke basika na lweka ya yawu mpe ke balula yawu mutindu *yayi*, mpe ya vwandaka kaka na mbangu mosi. Mpe beno vwandaka na kima mosi ya nene ya kawusu samu na kusala makelele, mpe beno zolaka sala makelele mutindu *yina*. Mpe ba vwanda tubaka, “Kima yina zolaka kwenda mbangu na mutindu ya boma bakilometele makumi tatu na mosi na ngunga mosi.”

Ntangu yayi, Papa kwendaka mpe kuzwaka mwa zyelo kuna na kipusu, mpe na—mpe na kunata kuna mpe kutula basaki samu yandi simba yawu kuna, samu na kumona kana ti kieleka ya lendaka kwenda bakilometele makumi tatu na mosi na ngunga mosi. Beno me mona? Kasi beno zolaka mona banzila, uh-huh; ya zolaka kwenda kaka pene ya bakilometele kumi na sambanu mutindu *yayi*, mpe kumi na tatu kumata mpe kukulumuka mutindu *yayi*. Beno me mona? Na yawu beno vukisa yawu kintwadi, beno ke kuzwa bakilometele makumi tatu na mosi na ngunga mosi.

<sup>15</sup> Mu ke bambuka moyo na beto nyonso bana, Mama zolaka yobisa beto nyonso, pene ya beto tanu kuna, beto zolaka kangama na kibaka yina na kuwa yawu. Beto vwanda kuwa yawu kukwiza, bakilometele ntama, na nzila awa, na kusalaka makelele, makelele, makelele, makelele. Muntu nyonso zolaka kusutope mpe vwandaka kanga bampunda ya bawu, mpe mu vwandaka basika na boghei, mpe kusimba yawu mutindu *yayi*, beno zaba. kima yina kumata nzila, oh, ya vwandaka kima ya boma. Mpe—mpe mu ke banza kaka, ya vwandaka ntama kuna, mu vwandaka na bamvula pene sambwadi, beno me mona. Mutindu . . . Yina vwandaka pene ya mvula 1914, mpe mu ke banza kaka na mutindu bima yina me soba tuka kuna. Mpe me mona, mpe ya me vwanda kaka bamvula makumi yiya me luta to kima mosi. Mpe, beno tala, yandi kuzwaka mafunda sambanu ya bamvula samu na kusala nyonso yina na kieleka awa, samu ti Biblia ke tuba ti yandi zolaka sala yawu mutindu yina, “Na bilumbu ya nsuka, bawu ke kwenda awa mpe kuna, mpe luzabu ke bwelama.”

<sup>16</sup> Beno me banzaka ntete na Nahum, ntangu yandi—yandi monaka Bala-bala ya nene ya Matoma na Chicago, mafunda yiya ya bamvula me luta? Salaka . . . Yandi tubaka, “Bawu ke tutana na banzila ya nene.” Ntangu yayi . . . Mu vwandaka na bayinsi ya ntama kisika bawu vwandaka . . . babala-bala ya bawu mutindu na Oslo mpe bisika ya mutindu na mutindu, na mpasi ya kele na kisika samu na kutambula, ya kele kaka nene mingi samu kipusu kulutila na bambanza ya bawu. Kasi kukondwa ntembe kitamina zolaka vwanda pene katuka awa na kibaka yina, ya kele nene nyonso babala-bala ya bawu vwandaka, kaka nene ya kulunga samu na kipusu na kulutila na bala-bala. Mbote, beno me mona, Nahum tubaka, “Ba vwandaka na banzila ya nene.” Mpe yandi tubaka, “Bawu ke kima mbangu mutindu lusyemo,” matoma yayi. “Mpe bawu zolaka monana mutindu ba-torche,” ya kele minda ya yawu. Mpe yandi tubaka, “Bawu ke tutana mosi na yankaka,” makubu. Profete yina kutelamaka na zulu ya ntangu mpe talaka ntama kuna, mafunda yiya ya bamvula, mpe monaka yawu kukwiza. Banza na yawu! Uh-hum. Ntwadusulu ya kimpeve.

<sup>17</sup> Kasi beto kele na ntangu ya nsuka, bankundi. Ya kele kaka . . . Mpe mutindu kele Disonuku, samu ti bima nyonso yayi

ke na kusalamaka, Masonuku nyonso kele kaka awa na ntangu ya nsuka yayi kaka awa. Mpe mu vwandaka banza, na suka yayi, kana Mfumu ke sadisa beto, beto ke vukisa bayayi, bayankaka ya bima yayi, lutangu mutindu beto lenda. Mpe na manima na nkokila yayi nsungi yango ya nene ya nsuka, ya dibuundu ya Laodicée, mutindu ya ke kuzwa Nsangu ya yawu mpe kuna kulandila na kufwa mpe kukipe ve Nsangu ya yawu, kaka mbala mosi na mutindu mosi ya mwa tiya yina Nzambi ke luka na yinwa ya Yandi. Beno me mona, na bampova yankaka, ya ke salaka Yandi kubela na kivumu kaka na kubanza na yawu. “Mu ke luka nge na yinwa ya Munu,” Yandi tubaka.

<sup>18</sup> Ntangu yayi, mu kele na mwa Masonuku ya kusunama awa yina mu ke zola kulandila na suka yayi. Kasi mu ke kumiyufula kana ya ke vwanda ngolo mingi samu na beto, kaka samu na ntangu fyoti, na kutelama samu na mpova ya lusambulu:

<sup>19</sup> Tata ya beto ya Mazulu ya kufuluka na lemvo, mutindu beto ke kwiza dyaka na suka yayi na kilumbu yayi ya Saba. Mpe na ngaanda, bamvula ke na kubanda na kunoka, mpe mupepe ya madidi ya galasi ke na kufula; kasi beto kele na nsayi mingi ti beto kele na muludi na zulu ya yintu ya beto bubu yayi, ti beto kele na kisika ya fyoti, mpe dyaka yinsi kisika beto lenda kwiza mpe kusambila Nzambi na mutindu mosi ti konsiansi ya beto ke tubila beto na kusambila.

<sup>20</sup> Na yina beto ke mona na Ndinga ya Nge ti yayi ke baka bilumbu mingi ve, na yawu, Tata, beto ke sambila ti Nge ke pakula beto na mutindu ya kutuba ve bubu yayi ti beto lendaka basisa ya mbote na yayi ti ya kele samu na beto na kuzwa, mpe kuvwanda ya kuyilama samu na bangunga yina kele na ntwala ntangu beto ke lenda ve kusala yayi. Beto zaba ve bilumbu yikwa dyaka, ya lendaka vwanda na basabala, na bangonda, to bamvula, beto zaba ve, saki kilumbu msoi beto ke vwanda ve na kiyeka ya kusala yayi. Na yawu beto ke sambila, Tata, ti Nge ke bumba beto na yisi ya ntwadusulu ya Nge ya Nzambi, mpe ti mabanza ya beto kuvwanda na zulu ya Nge, mpe ti bambanzulu ya ntima ya beto kuvwanda ya kundima na meso ya Nge, O Mfumu.

<sup>21</sup> Lemvokila masumu ya beto. Beto me lombamba yawu na yina beto me funguna yawu na Nge, ti beto me sumuka mpe me katukila Nzila. Mpe beto kele ve ya kulunga ti ba bokila beto baya Nge, sala beto kaka bisadi Nge me baka na kisalu, Mfumu. Mpe beto ke zola kusala nyonso yina Nge ke tuba na beto na kusala, kisalu nyonso yina ke pesama na beto. Beto ke zola kusala yawu, kuzwa beto kaka na Kimfumu ya Nge, Mfumu; ti beto lenda sala na yayi, na ngunga ya nene ya boma yina yinza ke na kukutana.

<sup>22</sup> Sakumuna beto ntangu yayi na Mvwandulu ya Nge, longa beto na nzila ya Mpeve-Santu, mpe kuzwa nkembo na kuvwanda

ya beto awa kintwadi. Samu beto me lomba yawu na Nkumbu ya Yesu. Amen.

<sup>23</sup> Ntangu yayi mu ke zola, na ntete, mu ke zola kuzitisa mosi na mosi ya bankundi ya munu na kati awa, bayina mu me tala awa na suka yayi. Ya kele mpasi mingi awa na ntangu ya mpimpa, minda ya beto kele kuna na manima ya mabaya yina mpe ya ke lakisa bantu ve. Mpe ya kele mwa mpasi na kumona na chaire yayi na nkokila awa, mpe ya kele mpe na kilumbu. Mu ke mona mingi ya bankundi ya beto yina kele ya ngaanda na bisika ya kuswaswana na yinsi, ti mu lenda zitisa bawu mbote bubu yayi na kisika ya nkokila. Mpe bawu kele mingi na kumeka na kubokila bawu nyonso, kasi mu zola beno kuzaba ti kieleka mu zola beno. Mpe na manima ya kuzenga nyonso yayi ya mpasi mpe nyonso yankaka, mutindu mu vwandaka me sala na Masonuku, samu na kusala . . . samu na kunata Kieleka. Ve yina mu zolaka kusala, kasi yina Nzambi kele na yawu ya kusonama awa ya kusala, beno me mona. Mpe kuna ya kele yina yawu kele. Mpe dyaka mu ke mona mingi ya bankundi ya munu bayina kele ya ba-organisation mpe nyonso yankaka, kasi ya kuvwanda kaka na munu, na yawu mu ke zola beno, mingi mingi. Beno . . . Ti Nzambi kusakumuna beno mpe kusadisa beno ya kele kisambu ya munu.

<sup>24</sup> Mpe ntangu yayi . . . [Mpangi ya bakala Stricker me tuba, “Mpangi Branham?”—Mu.] inga, mpangi ya bakala. [“Kana mu lendaka kuzwa muswa ya dibuundu na kuzonza na kisika ya bantu nyonso yayi awa, beto zola nge kuzaba ti beto zola nge.”] Matondo, Mpangi ya bakala Stricker. [“Mpe beto zola nge.”] Matondo, Mpangi ya bakala Stricker. [“Mpe beto ke na kusambila samu na lemvo na kulutila na bima yina nge lendaka lutila, ti beto lendaka telama na lweka ya nge.”] Matondo, Mpangi Stricker. Matondo, dibuundu, ya kele mbote mingi na beno na kutuba yawu. Mu ke zola yawu kieleka mingi.

<sup>25</sup> Muntu vwandaka tuba mazono na nkokila samu na yawu, mu banza ya vwandaka Mpangi Fred yina bokilaka munu mpe tubaka na vision to ndosi yina mpangi mosi ya bakala kuzwaka, yina tubaka yawu kaka ntete beto kwenda mazono na nkokila, na kumonaka munu ya kutelama na kisika ya kubaluka ya ntoto mpe dituti ya ndombe vwandaka zungidila munu. Mu zaba ti yandi ke na kulandaka munu. Kasi yina, ntangu kaka . . . yandi—yandi ke lenda ve na kusala yawu tii Nzambi ke manisa, mpe kuna—kuna munu—munu . . . ya kele ntangu samu na munu na kukwenda na ntangu yina. Na yawu . . .

<sup>26</sup> Kasi mu—mu ke banza na yayi, na “kuvwanda ata mbala mosi ve ya nene.” Ve, mu zola kuvwanda ve, beno me mona. Kasi mu ke banza na *Nkunga ya Luzingu*:

Baluzingu ya bantu ya nene ke bambula beto moyo

Beno me mona, yina Paul kusalaka, yina Irénée kusalaka, yina Luther kusalaka, yina Wesley kusalaka, to yina Santu Martin kusalaka, mpe yina bawu salaka.

Mpe baluzingu ya bantu ya nene ke bambula beto moyo

Ti beto lenda kumisa baluzingu ya beto kitoko, Na kukwendaka, kubika na manima ya beto Bitambi na zulu ya zyelo ya ntangu;

Bitambi, ti ntangu yankaka muntu yankaka, Na kunataka masuwa na zulu ya nzadi ya nene ya luzingu, (Na yina na manima mu me kwenda, beno me mona, mpe me kwenda.)

Mpangi mosi ya kulemba mpe yina me dyama, (ke baka mosi ya babuku yayi mpe ke tanga yawu,)

Na kumonaka, ke kuzwa dyaka ngolo. (Ya kele yawu.)

Beto telama, na yina, mpe beto sala,

Na ntima samu na kunwana, (Mu zola yawu, beno ve?)

Beno vwanda ve mutindu kibulu ya kizoba, yina ba ke na kunata! (Yina ba fwana nata na yawu.)

Kasi kuvwanda hero na kunwana! (Mu—mu zola yawu.)

<sup>27</sup> Ntangu yayi, mpangi ya beto ya bakala ya fyoti, George, vwanda vwandaka na mosi yina yandi vwanda zolaka; mu yimbaka yawu na bisambu ya lufwa ya yandi. Beto vwanda vwandaka. . . Mu vwanda vwandaka mpe mu vwanda tangaka *Nkunga ya Luzingu*, benbo zaba, mpe yandi vwanda vwandaka mpe kutanga *Kusabuka Kibaka*. Beno me mona? Mpe beno me kuwaka yawu:

Kulala ya mwini mpe Mbwetete ya Mpimpa, Mpe mbokolo mosi ya pwelele samu na munu! Mpe ti ya vwanda ve na kudila na kibaka, Ntangu mu ke basika na mubu, (Beno me kuwaka yawu bambala mingi.)

Samu ti nyonso na ngaanda ke na kutambula na ntangu mpe kati-kati ya ntangu, Kufuluka ya maza lenda kunata munu ntama, Kasi mu kele na kivuvu ya kumona Kinati ya munu kizizi na kizizi

Ntangu mu ke sabuka kibaka. (Mu ke kwikila ti yandi salaka ntangu yandi sabukaka kibaka.)

<sup>28</sup> Mpe na yawu, mpe kuna ya munu kele:



Na kukwendaka kubika na manima ya munu  
 Bitambi na zulu ya zyelo ya ntangu,  
 Samu bampangi, na kumonaka, lendaka landa,  
 Kuzwa ngolo mpe kulandila na kukwenda.

<sup>29</sup> Samu, na kilumbu mosi ya nene Yesu ke kwiza (mpe ya kele yina beto ke longoka na suka yayi), ya ke vwanda kuna nyonso ke manisa.

<sup>30</sup> Ntangu yayi, mu vwandaka banza na suka yayi, samu beto ke lenda ve na bansangu yayi ya dibuundu. . . Ntangu yayi, mu banza, kana Mfumu zola, ntama mingi ve, mu ke kuzwa dyaka mwa bandandani ya balukutakanu ya fyoti na zulu ya *Dibuundu ya Kieleka mpe ya Luvunu*, nzila nyonso kukatuka Genèse, kubaka yawu na nzila ya Biblia mpe beto ke baka yawu tii Apocalypse. Mabuundu zole yina, kaka yina bawu ke sala. Mpe kuna mu banza kilumbu mosi ntangu beto. . . kana Mfumu zola, beto kutunga dibuundu samu beno lenda kuzwa bisika mingi ya kuvwanda. . . Beno ke yituka na lutangu ya bantu bokilaka mpe tubaka mutindu yina; bawu ke luta awa mpe ke mona ya kele nyonso ya kifuluka, na yawu bawu ke kwenda kaka, beno me mona. Mpe mutindu yina bawu. . . beto kele ve na kisika ya kuvwanda.

<sup>31</sup> Mpe mu banza mutindu na ét-. . . na été ntangu ya ke vwandaka ntangu ya tiya to kima mosi, kisika beto ke bakaka gymnase ya lukolo ya zole to kima, ya ke vwanda mbote, na kubaka Buku ya Apocalypse kuna, to kima mosi, to Buku ya Daniel mpe Apocalypse, mpe kuvukisa yawu kintwadi samu beto kubakula yawu.

<sup>32</sup> Ntangu yayi, beto ata mbala mosi ve fwana kipe ba-Juif. Ba-Juif vwandaka. . .

<sup>33</sup> Ntangu yayi, mutindu mu tubaka, na—na Nsungi ya Mudidi ya bamvula 1500, bukimfumu ya Katolika, ntangu bawu tulaka, vukisaka dibuundu mpe luyalu kintwadi, yina vwandaka “na manima ya millenium.” Bawu banzaka ti bawu vwandaka—bawu vwandaka kieleka na Millenium samu ti dibuundu kuzwaka vicairé ya yawu, mosi mutindu Klisto samu na kuvwanda na kiti ya kimfumu. Mpe ya ke vukisa yawu na dibuundu mpe luyalu, nyonso kumaka mbote, ti “Millenium ya nene vwandaka landila.” Bawu ke kwikilaka dyaka yawu. Kasi ya kele kyeta. Samu ti Milleium lenda kwiza ve, lenda salama ve, kukondwa nkwizulu ya Klisto.

<sup>34</sup> Klisto ke kotisa Millenium, Yandi kele Mwana ya toma; mpe ntangu Yandi ke kwiza, kuna ke vwanda funda ya bamvula. Mpe ntangu ya ke salama, ya ke vwanda na Enlevement ya Dibuundu ke kwenda, mpe kuna kuvutuka ya Klisto. Mpe beno bambuka moyo ntangu yayi, ntangu. . . Na yina wapi kima yina ke landa beto ke sosa? Elevement ya Dibuundu.

<sup>35</sup> Ntangu yayi, beno kuzwa ve Enlevement ya Dibuundu mpe Lufundusu ya Kiti ya kimfumu ya Mpembe kuvukisa. Samu ti, Enlevement ya Dibuundu, ya kele na ata lufundusu, beno me mona, beno me lutila na yawu kaka na yisi awa. Ya kele kieleka, “Samu ti bawu yina kele na Klisto kele na kimpwanza na lufundusu.” Yesu tubaka, “Yandi yina ke kuwa Bandinga ya Munu mpe ke kwikila na Yandi yina fidisaka Munu kele na Luzingu ya Seko mpe ke luta ata mbala mosi ve na lufundusu, kasi me luta lufwa na Luzingu.”

<sup>36</sup> Wapi mutindu beto ke sala yawu? Beto ke kota na Klisto mpe ke botama na kati ya Nzutu mosi, ya Ntete ya Corinthiens 12, “Nzuytu mosi.” Beto ke botama na kati ya Nzutu ya Yesu Klisto, mpe Nzambi fundisaka yimeni Nzutu yango. Yandi lenda ndima dyaka beto ve na lufundusu, samu ti Yandi fundisaka yimeni Nzutu yango. Mpe na muswa mpe lemvo ya Klisto Yandi ke nata beto na kati ya Yandi mosi, ya Ntete ya Corinthiens 12, “Na nzila ya Mpeve mosi beto nyonso kele ya kubotama na kati ya Nzutu mosi yango, mpe ya kimpwanza na balufundusu nyonso samu ti Yandi lutaka yimeni na lufundusu.” Oh, beno ke vutula Yandi ve matondo! Yandi bakaka balufundusu ya beto. Ata lufundusu dyaka! Kasi bayina mangaka na kukota na Yandi, Nzutu yina, Nzutu ya misitiki. . . Wapi mutindu beto ke kotaka na Yawu? Na kupesanaka maboko? Ve. Na mukanda? Ve. Na mutindu mosi ya mbotika, ya maza? Ve. “Na nzila ya Mpeve mosi, Mpeve-Santu, beto nyonso kele ya kubotama!”

<sup>37</sup> Ntangu yayi beno bambuka moyo, beto ke tala yawu na mutindu ya pwelele na suka yayi. Beno kele to na kati ya Nzutu yango to na ngaanda ya Nzutu yango, ya kele ve kuvwanda na kati-kati ya Yawu. Ya kele ve na Miklisto ya kulutila mbote. Mpe—mpe kuna. . . beno kele to Muklisto to beno kele ve Muklisto. Ya kele ve na ndeke ya ndombe-mpembe, ve muntu ya kukola-ya kukola ve. Beno lenda kuzwa yawu ve. Beno kele to Muklisto to Muklisto ve. Beno kele to na kati ya Klisto to na ngaanda ya Klisto.

<sup>38</sup> Ntangu yayi, bayayi lendaka monana kulongisa, mu kele. . . mu kele nzila mingi ntama na kuvwanda mulongisi. Kasi kulongisa kele kuzenga, ya kele dikabu ya mutindu ve na kati—na kati ya Nzutu ya Klisto. Na ntete ya kele na bantunwa, mpe na manima baprofete, na manima milongisi, mpe ba-evangeliste, ba-pasteur; makabu tanu ya kisalu na kati ya Nzutu. Mpe kulongisa kele mosi ya makabu ya Kimpeve. Ntangu yayi, mu fwana landila na yina mu ke mona yina kele kieleka mpe kumeka na kunata yawu na bantu, mpe kutanga mpe kuvukisa Masonuku. Ntangu yayi, kasi ya kele kaka na kati ya Klisto, Nzutu ya Klisto ke zabana.

<sup>39</sup> Ntangu yayi, makapu tatu ya ntete ya Apocalypse ke tadila Dibuundu. Bantu ya makanda, ba-Juif, ba-Ethiopien, ba-Afrikander, mutindu nyonso ya bantu na yinza kele na kati ya

Bantu ya makanda samu na kusala Nzutu yayi; muntu-ndombe, mundele, ya mbwaki, nyonso, ya kele kinkuku ya bafololo, mpe ya kele kieleka, yina Nzambi ke tulaka na autel ya Yandi; mpe ya kele ya kusala na bayinsi nyonso, makanda, bandinga, mpe bantu.

<sup>40</sup> Kasi, ntangu yayi, na manima beno ke bika kapu ya 3 (Bansungi ya Dibuundu awa), Nzambi ke vutuka mpe kwiza baka ba-Juif, Dibuundu ke talana ata mbala mosi dyaka ve na kati ya nsungi yina. Ya kele ba-Juif. Mpe Nzambi ke salaka ve na ba-juif mutindu mosi na mosi, Yandi ke salaka na Israël mutindu yinsi, ntangu nyonso mutindu yinsi.

<sup>41</sup> Ya kele mutindu muntu kuzwaka yawu kilumbu yankaka yina. Mu kele—mu kele na mikanda mingi na zulu ya yawu, *Nsambulu ya Kuvukisa*, ti mu lakisaka na . . . Biblia ke tuba ti ya makangu, yina ba ke bokilaka “mwana ya makangu,” lendaka ve kukota na dibuundu ya Mfumu bansungi kumi, yina zolaka vwanda nkama yiya ya bamvula ti mwana ya makangu zolaka kota ve na dibuundu ya Mfumu. Ya kele mutindu yimbi kuvukisa vwandaka; ya vwandaka kento yina vwandaka bika bakala yankaka kuzinga na yandi samu na kubuta mwana, ti mwana yina vwandaka kuvukisa, ve na nzila ya tata ya yandi kasi na nzila ya bakala mosi yankaka. Beno me mona? Mpe yina vwandaka yimbi mingi na ntwala ya Nzambi, ya vwandaka lomba bansungi kumi samu na kusimba dyaka yawu, na ntwala ya Nzambi.

<sup>42</sup> Kasi yina ke tala ve nsungi yayi. Beno kele na Mbutukulu ya malu-malu ntangu yayi. Bawu ve . . . Bawu vwandaka kaka na mbutukulu mosi ntama kuna, ya vwandaka kubutana kaka na kuvukisaka banzutu. Beto kele na Mbutukulu yayi ya malu-malu ntangu yayi yina kele ya kimpeve, ya ke katulaka mvindu nyonso. Mpe beto kele bivangu ya malu-malu na Klisto Yesu, ya kubutana dyaka na Mpeve ya Nzambi. Bivangu ya malu-malu! Na mpova *kivangu*, kana bayankaka ya beno bizabi ya mbote awa yina ke bakula (Kana ve, beno lendaka tala yawu.), *kivangu* me katuka na mpova ya Grec “luvangulu ya malu-malu.” Oh, mutindu mosi beno kele kivangu awa, yina butamaka na kuvukana ya banzutu; beno kele kuna luvangulu ya malu-malu, ya kubutama na Mazulu. Ya . . . na luvangulu ya Nzambi ya muntu ya malu-malu. Luvangulu ya malu-malu, na Mbutukulu. Kasi ya fwana vwanda mbutukulu, kaka mutindu mbutukulu ya yinza kele na mfunu; Mbutukulu ya kimpeve kele kaka na mfunu mutindu mbutukulu ya yinza.

<sup>43</sup> Bantwenya zole lendaka kwelana mpe kutuba, “Mwana ya beto ya fyoti ya ntete ya bakala, beto ke bokila yandi ‘Jean.’” Kana yandi me butama ntete ve, Jean kele ntete ve awa. Kaka yina. Kima mosi, beno lendaka . . . mabanza misitiki yikwa beno ke tungaka na yina me tala Mazulu, mutindu nene ya kele, kana beno me butama dyaka ve beno ke vwanda ve kuna. Kaka yina,

beno me mona. Ya fwana vwanda kaka mutindu yina, samu ti ya fwana vwanda Mbutukulu. Nzambi tulaka misiku ya Yandi kuna mpe nyonso ke salaka landila misiku ya Yandi. Beno me mona?

44 Ntangu yayi, na kati ya bayayi, ya kele na bayina bikanaka ya ba-Juif ke kuzwa mpulusu. Mpe beto ke baka bawu ntete, samu ti ya ke tula. . . Ntangu yayi, ya kele ntangu nyonso na bakalasi tatu ya bantu ntangu nyonso, bambala mingi. Mpe beno bumba. . . bumba yawu mbote na dibanza, ya kele: mukwikidi, mukwikidi ya kati-kati, mpe muntu ya ntembe. bawu nyonso tatu. Mpe ya kele na ba-Juif, yina ba katulaka samu ba pesa beto siansi; ya kele na dibuundu ya madidi ve tiya ve; mpe ya kele na Dibundu ya kufuluka na Mpeve.

45 Kilumbu mosi, Charlie Bohanon vwandaka mfumu ya. . . to ntwadisi ya Kompani ya Bisalu ya Luyalu na bizungu ya sude, ntangu mu vwanda salaka samu na bawu. Mu vwandaka tanga kaka kuna Masonuku, na kuvwandaka ntwenya ya bakala. Mpe yandi tubaka, “Billy, muntu nyonso. . .” Yandi tubaka, “Ya fwana vwanda ti Jean kudyaka mbuma pili-pili mosi ya mbwaki mpe kuzwaka ndosi ya yimbi kuna na—na kisanga ya Patmos.”

46 mu tubaka, “Tata Bohanon, nge zola tuba yawu ve.” Yandi vwandaka boss, ya munu, mfumu.

Yandi tubaka, “Mbote, nani na yinza zolaka bakula Yawu?”

Mu tubaka, “Ya kele ya kubakula. Ya ke vwanda ya kubakula ntangu Mpeve-Santu ke kubama na kumonikisa Yawu.” Ya kele kieleka.

47 Mpe yandi tubaka, “Oh, la la!” Yandi tubaka, “Mu mekaka na kutanga yawu mpe pasteur ya munu mekaka na kutanga Yawu,” yandi tubaka, “beto kotaka na kima mosi ya boma.” Yandi tubaka, “Beto kuzwaka Kento ya makwela na zulu ya Mongo ya Sinai.” Beno me mona? Mpe yandi tubaka, “Na manima beto kuzwaka Kento ya makwela na dalango yina losaka maza ya yinwa ya yandi, samu na kusala mvita na bayina bikanaka ya nkuna ya kento. Beto kuzwaka Kento ya makwela na Mazulu. Nyonso tatu, na ntangu mosi.”

Mu tubaka, “Yina kele kukondwa lubakusu ya kimpeve.” Beno me mona?

Yandi tubaka, “Mbote, bawu yayi, nyonso na. . . nyonso tatu na ntangu mosi.”

48 Mu tubaka, “Inga, tata, kasi ya kele ve mutindu bawu kutulamaka. Beno me mona, beno ke bokilaka nkama mpe makumi yiya na yiya ‘Kento ya makwela,’ yina bawu vwandaka ve; bawu vwandaka ba-Juif. Mpe yina dalango kulosaka maza ya yinwa ya yandi samu na kusala mvita na bayina bikanaka, na bayina bikanaka ya nkuna ya kento yina bumbaka balutumu mpe vwandaka, na kimbangi ya Yesu. Mpe Kento ya makwela vwandaka na Nkembo.” Beno me mona?

49 Nkama mpe makumi yiya na yiya ya fundu, kapu ya 14 ya Apocalypse, vwandaka ya kutelama kuna na Mongo ya Sinai, (Ya kele kaka kieleka.) na kuvwandaka na Nkumbu ya Tata ya bawu na mbunzu ya bawu. Ya kele kaka kieleka. Ba-Juif, bayina bikanaka ya ba-Juif.

50 Mpe na manima awa kwizaka dalango, bimumu ya Rome. (Yina, Dibuundu Yawu mosi me zanguka, vwandaka na Nkembo na Makwela ya Kudya bamvula tatu mpe ndambu.) Dalango, beno me mona, *dalango* kele ntangu nyonso “Rome,” dalango ya mbwaki. Ntangu yayi samu na kukumisa yawu kieleka samu na beno, na—na Apocalypse 12, dalango vwandaka ya kudasuka na kento yina vwandaka buta Mwana ya bakala yina ke yala bayinsi nyonso na yinti ya kisengo, mpe yandi losaka maza ya yinwa ya yandi mpe. . . to—to samu na kusala mvita na bayina bikanaka ya nkuna. Kasi dalango ya mbwaki, na ntete, yandi kutelamaka na ntuala ya kento. Na ntangu kaka kento zolaka buta Mwana yayi, yandi zolaka kufwa Mwana yango kaka na ntangu Yandi zolaka basisa Yandi. Ntangu yayi, nani telamaka na ntuala ya dibuundu Israël (kento Israël), samu na kufwa Mwana ya yandi (Yesu) kaka na ntangu Yandi zolaka butama? Rome! Herode kusalaka nsamununu ti—ti muntu nyonso zolaka kufwa mwana nyonso ya bamvula zole tii na yisi, kuna kusalamaka kufwa mosi yina kufwaka bana nyonso ya ba-Hebreux na yinsi nyonso. Kima kaka mosi yina Pharaon salaka samu na kusimba Moïse, yina vwandaka kifwanusu ya yandi, bawu kufwaka bana nyonso mpe kondwaka yandi. Oh—oh—oh—oh, Nzambi zaba mutindu ya kubumba bawu.

51 Oh, beno kele na nsayi ve ti beno kele ya kubumbama? Oh, kisika ya kubumbama! Biblia ke tuba, “Samu beno fwana tala beno mosi mutindu ya kufwa mpe luzingu ya beno na kati ya Klisto, beno bumbama na kati ya Klisto mpe ya kukangama na Mpeve-Santu.” Dyabulu lenda tala beno ve kana yandi zola. Yandi lenda kaka ve kusala yawu, beno me mona. Beno kele ya kubumbama na kati ya Klisto! Beno tala beno mosi mutindu ya kufwa! Mpe baluzingu ya beno kele ya kubumbama na kati ya Klisto, ya kubumbama na Nzambi na nzila ya Klisto, mpe ya kukanga na nzila ya Mpeve-Santu.

52 Ntangu yayi, ntangu yayi, bayayi yina bikanaka vwandaka mwense ya kulala; bayina yandi losaka maza na kubasisaka na yinwa ya yandi samu na kusala mvita na bayina bikanaka ya nkuna ya kento. Ntangu yayi, yinki kele bayina bikanaka? Ntangu yayi, kuna beno—beno fwana kuzwa bifwanusu yayi kintwadi ntangu yayi. Ya kele na dibuundu yina kele *ya yinza*.

53 Mu ke kwenda . . . Mu banza ti mu lendaka fikula yawu awa mpe kukumisa yawu mwa fyoti pwelele. Ntangu yayi, Mpangi ya bakala Neville, kana mu ke baka ndambu ya ntangu ya nge, lemvo lemvo kila munu. [Mpangi Neville me tuba, “Amen. Dyambu kele ve.”—Mu.]

<sup>54</sup> Ntangu yayi, ya kele . . . Ntangu yayi beno ke bambuka moyo ti ya kele yinki? Muntu ya ntembe, mu ke tula yawu “MN,” muntu ya ntembe, mpe ya kele musumuki. Mpe awa kele mosi yankaka yina kele muntu ya misiku, mu ke tuba “MM,” dibuundu ya misiku. Mpe na yina awa kele na mosi yankaka yina kele dibuundu ya kuvuluka, “DK,” dibuundu ya kuvuluka. Ntangu yayi beno bumba yawu na dibanza ntangu nyonso.

<sup>55</sup> Ntangu yayi, na kati ya dibuundu ya kuvulusa yayi ya kele na bakalasi zole, na kati ya dibuundu kaka *awa* mpe kaka *awa*, yina vwandaka na kifwanusu na Klisto: mosi ya bawu vwandaka mwense ya kulala, mpe mosi yankaka vwandaka na Mafuta na mwinda. Ntangu yayi, beno—beno nyonso . . . Bantu yikwa ke bambuka moyo na disolo? Beto ke kuma na yawu kaka na minuti.

<sup>56</sup> Ntangu yayi, na ntete, ntete beto sala yawu, beto ke kota na nkama mpe makumi yiya na yiya ya funda, ya Apocalypse 7, samu ti kieleka ya zabana mbote. Ntangu yayi, beno fwana bambuka moyo na yayi. Mpe beno bayina ke na kusunikaka yawu, Apocalypse 7.

<sup>57</sup> Beto baka kaka mwa ntangu ya beto. (mpe—mpe beno—beno ke botika ve tii—tii . . . Na manima ya lukutakanu ya suka yayi, mbote mingi.) Beto ke . . . Mu ke meka na kutula monte ya munu awa mpe kutala mbote wapi ntangu ya me kuma samu ti beto kubasika. Ntangu yayi beto kele—beto kele na kutala bangunga zole ntangu yayi, mpe ti Mfumumu kusadisa beto na kutala lesu yayi.

. . . na manima ya bima yayi . . .

<sup>58</sup> Ntangu yayi, beto . . . Kapu ya 6 ke zonzila na—na mpunda ya mpembe, yina vwandaka Mpeve-Santu yina kwendaka na kununga, samu na kununga. Na manima kwizaka mpunda ya pale, Lufwa, mpe Difelo vwandaka landa yandi. Mpe mosi na mosi ya binati mpunda yango.

<sup>59</sup> Ntangu yayi, “na manima ya bima yayi,” na manima ya mwangusulu ya nene yayi. Ya ntete yina basikaka vwandaka Mpeve-Santu yina vwandaka tambula na ntoto, “na kunungaka mpe samu na kununga”; na manima kwizaka mosi na kati ya ntangu ya nzala, “kitezo ya blé samu na pata mosi, bitezo zole ya orge samu na pata mosi, mpe nyonso, kasi beno nyongisa ve Mafuta ya Munu mpe Vinu”; mpe kuna kulandila tii Yandi ke zibula bidimbu yayi—yayi.

. . . na manima ya bima yayi mu monaka bawanzio yiya ya kutelama na bansongi yiya ya ntoto, vwandaka kanga mipepe yiya . . . ti bawu na mupepe zolaka fula ve na zulu ya ntoto, to na mubu, to . . . yinti nyonso.

Mpe mu monaka wanzio yankaka kukulumuka na esete, na kuvwandaka na kidimbu ya Nzambi ya moyo: mpe yandi bokaka na ndinga ya ngolo na bawanzio yiya,

*na bayina ya pesamaka...niongisaka...na kutalisa mubu mpasi mpe ntoto,*

*Na kutubaka, Beno talisa ve ntoto mpasi, to dyaka mubu, to...yinti, tii beto ke tula kidimbu na bisadi ya Nzambi ya beto na mbunzu ya bawu.*

<sup>60</sup> Ntangu yayi, beno bambuka moyo, bisadi ke vwandaka ntangu nyonso...Bisadi ya Nzambi kele ba-juif. Abraham vwandaka kisadi ya Yandi. Muntu ya makanda kele ve kisadi, ya kele Kento ya makwela, ya kele mwana. Yayi kele mwana, Dibundu kele. Ba-Juif kele bisadi. Oh, kana beno lendaka kaka...kana beto zolaka vwanda na ntangu samu na kusana bampova yango. Bambala mingi mu ke salaka na kivinga kuna, kutala yawu nzila nyonso na ba-référence mpe mu ke bakula yawu. Ba-Juif kele bisadi. Kana mu telama awa mpe kubaka ntangu yango nyonso na zulu ya “kisadi,” mu ke tala ve bima yankaka, beno me mona. Na yawu beno bambuka moyo, beno tala yawu mbote na nzila ya Biblia, mpe beno ke tala ti ba-Juif kele bisadi ya Nzambi.

<sup>61</sup> Wapi mutindu ya kufwanikisa ya kitoko awa yina beto lenda baka, kana beno ke zola kuvutuka na Ezéchiél 4, mpe kutala kuna yina Yandi tubaka, “Kima ve mutindu yayi me salamaka ntete?” Yandi talaka na bibaka ya zulu, mpe ntangu yandi salaka, yandi monaka bayimbi ya kulutila kusalama na mbanza. Mpe kuna kwendaka...kwizaka bantu yiya na bambele ya kufwa. Mpe bawu kwendaka na kufwa nyonso na mbanza ya Jérusalem.

<sup>62</sup> Mpe ntete yandi...bawu kwendaka na kufwa, bawu kangisaka, bawu kusutopeke, ya vwandaka na Mosi yankaka yina kulumukaka ya kulwata mpembe, na musoniki ya écritoire (Bantu yikwa me tangaka yawu?) na lweka ya yandi, Ezéchiél 4. Na yina Kuna vwandaka ya musoniki kuna écritoire, na lweka ya Yandi, ya kulwata na mpembe, Yandi tubaka, “Beno kota ve na mbanza, beno kufwa kima ve tii ntete beno ke kanga bisadi ya Nzambi na mbunzu ya bawu.” Mpe Yandi landilaka mpe Yandi kangaka, mpe tubaka, na bana nyonso fyoti mpe nyonso, beno kanga bawu.

<sup>63</sup> Mpe kuna bayina na bambele ya kufwa, bawu yiya kwizaka, kotaka mpe kieleka mwangisaka nyonso, vwandaka na ata kyadi. Bawu kufwaka babakala, bakento, bana, mpe nyonso yina vwandaka ve na kidimbu yayi ya Muntu ya ntete yayi na écritoire. Mpe ya nene...

<sup>64</sup> Ntangu yayi, yina vwandaka na bilumbu na manima ya Mfumu ya beto, ntangu Yandi longaka bawu na yawu na Matthieu 24, mutindu ti “Ntangu beno ke mona Jérusalem ya kuzungidila na basoda, beno bika ve...beno kulumuka ve na zulu ya yinzo, to ti yandi kele na bilanga kuvutuka ve mpe kukwiza baka kazaka ya yandi, kasi beno kwenda na

Judée.” Josèphe pesaka beto kusonama ya yawu kuna, mpe mutindu bawu kimaka. Mpe kaka bayina kimaka vwandaka bayina bakaka Bampova ya Mfumu Yesu. Mpe ntangu bawu monaka basoda kuzungudila, mpe Titus, na mvula 96 ya ntangu ya beto, ntangu bawu kumonaka Titus kuzungudila bibaka ya Jérusalem mpe kuzungudila bawu nyonso na kati kuna; bawu kudyaka matiti ya bayinti. . . bawu kudyaka bampusu—bampusu ya bayinti, bawu kudyaka matiti na ntoto, bawu tokisaka bana ya mosi na yankaka mpe kudyaka yawu. Bawu bikaka bawu kutala nsatu, vwandisaka kaka bawu kuna, mpe na nsuka bawu kotaka na mbangu kuna mpe kufwaka bawu tii menga kubasikaka na mwelo mutindu—mutindu kizinga ya maza yina ke na yuma, bayinto ya menga vwandaka basika na mwelo. Bawu kunyengisaka tempelo, pasulaka bibaka, mpe ya kele kuna tii kilumbu yayi.

<sup>65</sup> Mpe Omar ya Musulman kutulamaka kisika vwandaka telama tempelo. Mpe Yesu kuzonzilaka na yawu na Matthieu 24, Yandi tubaka, “Ntangu beno ke mona busafu yina ke salaka mwangusulu kutelama na kisika ya santu, kisika profete Daniel kuzonzilaka, kutubilaka na yawu,” na yina ya kele na kati ya ba-parenthèse, ya ke tuba, “(yandi yina ke tanga, ti yandi kubakula:)” Beno me mona, “Ntangu beno ke mona busafu yayi, mvindu ya Omar Musulman kutelama kuna kisika kisika ya santu kutelamaka na ntangu ya ntama.” Mpe bubu yayi Musulman kele ya kutelama kuna kieleka na kisika ya santu, kaka na kisika ya tempelo. Musulman Mahometan kele ya kutelama mutindu Yesu tubaka ya zolaka salama, inga, mutindu Daniel tubaka yawu zolaka salama, mpe Yesu siamisaka yawu ti yawu ke salama.

<sup>66</sup> Beno tala mbote baprofete yayi mpe Nzambi kuna na kutubaka bima yango na ntwala, mpangi, ya fwana telemisa nsuki na manima ya balaka ya beto na kuzabaka ti beto kele na ntangu ya nsuka. Beto kele na nsuka! Ya kele ve na kima me bikana. Bima nyonso yayi ke na kusalamaka kaka mutindu Yandi tubaka ti ya ke salama, mbote, ya fwana pesa beto ngolo, kusala beto kuyilama. Yandi tubaka, Yesu pesaka malongi, tubaka, “Ntangu beno ke mona bima yayi kusalama,” mutindu beto ke na kuzonzilaka, tubaka, “beno telemisa yintu ya beno, mpulusu ya beno ke na kubelama.”

<sup>67</sup> Mpe wapi mbote ya ke sala beto kana beto nunga yinza ya muvimba? Beto ke zimbisa yawu, na mutindu mosi. Beto—beto lenda ve kununga mutindu yina. Ya kele kaka na mutindu mosi ya kununga, ya kele na nzila ya Klisto. Beno baka Klisto, kuna beno ke nunga ya kieleka. Beno fwana kwenda awa; beno lendaka kwenda ntete lukutakanu yayi kumanisa, beno lendaka kwenda ntete mwini kulala na nkokila, beno lendaka. . . kukwenda ntete yawu kubasika na suka, ntete Lumingu yina ke landa beno lendaka kwenda, beto nyonso. Beto zaba ve ntangu



beto ke kwenda, kasi beno zaba ti beno fwana kukwenda. Na yawu ya kele ve bulawu na kuvutula yawu na manima? Beno ke—beno ke tambula bisika, beno ke—beno ke basika na lufwa.

<sup>68</sup> Mutindu kusyelumuka na toboggan ya ntama. Ba vwanda mataka na zulu ya toboggan mpe kubaluka na kima yayi, beno mona mutindu pene bawu zolaka kwiza; mpe na mbala mosi, ntete bawu zaba yawu, bawu ke kwenda na yisi me syelumuka. Mpe ya kele kaka mutindu beno ke na kusalaka, kieleka ke baluka kaka ke syelumuka. Beno zaba ve wapi minuti kima ke balula beno, mpe beno me kwenda; ntima ke sutope, dikubu ya tomabilu, kima ke salama kaka, mpe beno ke kufwa. Mpe kuna nsuka ya beno ya Seko kele kaka na ntwala ya beno. Beno banza na yawu, nkundi.

<sup>69</sup> “Ntangu yayi, ntangu beno ke mona busafu yina ke salaka mwangusulu kutelama na kisika ya santu.” Ntangu yayi, kuna, na bilumbu ya Titus na manima Yesu me kwenda, Mpeve-Santu vwandaka muntu yina na ecrtoire na lweka ya Yandi. Mpe Yandi tambulaka na Jérusalem mpe tulaka kidimbu na zulu ya bantu. Mpe ntangu yayi mu zola beno kutala kima mosi, mambele ya dibuundu. Mpe beno ke tuba kuvwanda na Mpeve-Santu? Yandi tubaka, “Kutula ve kidimbu na mosi ya bawu kasi na bawu yina ke vumuna mpe ke dila samu na busafu yina ke na kusalama na mbanza.” Ntangu yayi, wapi kisika kele muntu yina kele na kizitu mingi samu na yinza mpe bankadulu yayi ntangu yayi?

<sup>70</sup> Mbote, “Mu kele Méthodiste, mu kele Baptiste, Presbytérien, na yawu wapi luswaswanu ya ke sala?” bawu ke tuba.

<sup>71</sup> Oh, ata kizitu ya ntangu nyonso samu na bayina kele ya kuzimbana, lembami yina. Beno bika ata mbala mosi ve kima kutelama mpe kutula ndudi na kati ya moyo ya beno. Ata mutindu yimbi muntu lendaka sala beno to kima, ata mbala mosi ve! Beno kuvwanda ve ya kuzaba kima mosi na kubikaka kima yina kukangama na moyo ya beno. Ya ke nyongisa Mpeve-Santu ke taka beno ntama. Kieleka yawu ke sala.

<sup>72</sup> Mu ke bambuka moyo na kutubaka kima yina vwandaka yimbi awa bamvula zole to tatu me luta. Ya vwandaka avoka yina vwandaka bokila munu, mpe mu kwendaka mpe. . . Kento ya munu vwandaka kuna. Mu vwandaka. . . yintu ya munu, kufidisa. . . mu vwandaka kuwa mutindu ti ya ke pasuka, mpe mu—mu vutukaka. Mpe bawu—bawu kubokilaka na alo-alo mpe tubaka, “Beni tuba na yandi na kukwiza awa na manima ya midi yayi.”

Mpe Meda tubaka, “Ya kele avoka.”

Mu syelumukaka na ngaanda na kyelo, mu tubaka, “Tuba na yandi ti mu kele ve awa.”

Yandi tubaka, “Bill!”

Mpe mu tubaka, “Tuba na yandi ti mu kele ve na kati awa ntangu kaka yayi.” Mpe mu me basika.

73 Na yina mu basikaka kuna mpe mu vwandaka kuwa kieleka yimbi, mpe mu vutukaka. Mpe yandi tubaka na yandi; mu monaka ya nyongisaka yandi.

74 Mu basikaka samu na kusambila samu na...kuna vwandaka na muntu kwizaka awa, yina vwandaka na mwana ya bébé ya kubela. Mpe kaka na yina mu bandaka na kutula diboko ya munu na zulu ya bébé yango samu na kusambila samu na yandi, Kima tubaka na munu, “Nge kele muntu ya luvunu.” Beno me mona? “Nge zaba yina nge me sala.”

75 Mpe mu tubaka, “Tata, mu kele ve ya kulunga samu na kusambila samu na bébé ya nge. Nge me mona, mu me nyongisa Mpeve-Santu mpe ya ke sala munu ata mbote ve na kutula maboko ya munu na zulu ya bébé. Vingila kaka tii mu ke kwenda sungika dyambu.”

76 Mu kwendaka kuna mpe mu tubaka...mu tubaka na avoka ya munu, mu tubaka, “Mu—mu me sala yimbi.”

Yandi tubaka, “Mu banzaka ti nge kwendaka.”

Mu tubaka, “Ve.” Mu tubaka, “Ya vwandaka...Mu me nata kento ya munu kutuba kima yina vwandaka yimbi.” Mu tubaka, “Mulemvo—mulemvo, mu—mu zolaka ve—mu zolaka ve kusala yawu.” Mu tubaka, “Beno ke lemvokila munu samu na yawu?”

Mpe mu lombaka kento ya munu na kulemvokila munu samu na yawu.

77 Na manima mu vutukaka kuna na Green’s Mill, ya vwandaka na Ngonda ya sambwadi. Oh, ya vwandaka kieleka swi na mfinda, mpe mu vwandaka na cave manima nyonso ya midi, na kusambilaka. Mpe mu kwendaka mpe telamaka na ditadi na ngaanda kuna mpe mu vwandaka tala na ntama myongo, mpe ya vwandaka kitoko mingi, mpe makasa mpe nyonso, kaka swi; ya vwandaka pene ya ngunga ya tanu, to ngunga ya sambanu, na manima ya midi, na été. Ya vwandaka na kima ve, kieleka swi, kilumbu mosi ya tiya. Mpe mu tubaka, “Tata ya Mazulu, Moise, Nge telemisaka yandi na ditadi kilumbu mosi mpe Nge lutaka.” Mu tubaka, “Kana Nge me lemvokila munu samu na yimbi yina mu me sala, Nge lenda luta kaka dyaka mpe kubika munu kumona Nge?” Mpe kaka na mongo na lweka ya lumoso ya munu ya vwandaka na mwa kitembo yina bandaka na kufula kieleka na malembe na kati ya makasa, ya me kulumuka kaka pene na lweka ya munu mutindu *yina* mpe me luta mbala mosi na mfinda. Mu dilaka mutindu bébé.

78 Mu me vutuka, mu tubaka, “Mu zaba ti disumu ya munu kele ya kulemvokila na ntangu yayi.” Beno me mona?

79 Beno me mona, ntangu nyonso beno bika misisa nyonso ya ndudi na ngaanda ya beno. Beno me mona? Ata yina muntu ke

sala beno, ti . . . beno vwanda kaka na Nzambi na kati kuna ya ke kanga yimbi nyonso ntama ya beno.

<sup>80</sup> Ntangu yayi, Miklisto yayi yina kuzwaka malongi ya Klisto, ntangu yayi beno tala mbote, kifwanusu ya kima beto ke na kuzonzila na suka yayi. Miklisto yayi yina kuzwaka malongi yina, bawu kubasikaka na Jérusalem samu bawu zabaka ti yawu vwandaka kubama na kusalama.

<sup>81</sup> Ntangu yayi beno tala mbote bamambeke ya dibuundu, kifwanusu ya bantu yina ke kwendaka na dibuundu, kele kaka ya dibuundu, bawu nyonso tubaka, “Mbote, ya kele na basoda ke na kukwiza, ya kele na mvita ke na kukwiza, ntangu yayi ti beto kwenda na yinzo ya Mfumu mpe beto sambila.” Kasi bawu me kwiza na manima ya ntangu. Me sala ata fyoti ya mbote ve, beno me mona.

<sup>82</sup> Kasi bawu vwandaka tala mbote na malongi, bilandi yayi, na kuzabaka yina Yesu tubaka, mpe bawu kimaka. (Bantu ya masolo ke tubaka ti “Bayina ba vwandaka bokila ‘ba-cannibale,’” bawu tubaka, “bawu kudyaka nzutu ya—ya muntu yayi yina ba vwandaka bokila ‘Yesu’ yina vwandaka belusa bawu.” Beno me mona, bawu vwandaka zonzila na kominyo. Bawu salaka ve . . . yandi zabaka ve yina yawu vwandaka, beno me mona, samu yandi vwandaka muntu ya nsuni, mukwikidi ve, mpe kaka muntu ya disolo. Mpe yandi . . .) Mpe bawu kimaka nkele yina vwandaka kwiza na zulu ya ntoto.

<sup>83</sup> Ntangu yayi, beno me mona, mpe kuna Jérusalem nyonso kumwanganaka. Ntangu yayi ti . . . Ntangu yayi yayi awa kele kieleka nzila mosi, Apocalypse 7. Ntangu yayi beno tala mbote! Katuka ntangu ya kuyala ya Titus na Jérusalem, na yinza, ya me vwandaka ve na ntangu kuna na disolo yina yinza nyonso kwendaka na mvita tii mvula 1914. Ntangu yayi beno kuwa mbote! Ntangu yayi awa kele kisika Tata Rutherford kubakaka dikulu ya yimbi, mu kele ya kundima, kaka awa. Ntangu yayi beno tala mbote:

*Mpe na manima ya bima yayi mu monaka wanzio yankaka ya kute- . . . bawanzio yiya ya kutelama na bansongi yiya ya ntoto, (Yina kele ya kutelama mutindu yayi, na bansongi yiya ya ntoto.) vwandaka kanga mipepe yiya ya ntoto, (Ntangu yayi, muntu nyonso zaba yinki zola kutuba mipepe na kati ya Biblia, mipepe kele “mvita, kunwana,” dyabulu kele ngolo, mwana ya ntinu ya mupepe, beno me mona.) . . . mpe vwandaka kanga mipepe yiya . . . ti yawu ke luta ve na zulu ya ntoto, to . . . mubu, . . .*

*Mpe . . . wanzio yankaka kukulumukaka na esete (kisika Yesu ke kwiza), na kuvwandaka na kidimbu ya Nzambi ya moyo: na mbunzu ya yandi, na diboko ya yandi: mpe yandi bokaka na ndinga ya ngolo na*

*bawanzio yiya, yina zolaka bebisa yinza, na kutubaka, na nani . . . ya pesamaka na kutalisa mpasi na mubu mpe ntoto,*

*Na kutubaka, Beno talisa ve ntoto mpasi, to dyaka mubu, to . . . bayinti, tii beto ke tula kidimbu na bisadi ya Nzambi ya beto na mbunzu ya bawu.*

<sup>84</sup> Ntangu yayi, Nzambi kele ve na ntangu, Yandi kele Seko. Beto ke tesaka na bantangu, kima kaka beto zaba kele bayinda mpe bakare, mpe bakilometele, mpe nyonso yankaka. Nzambi kele ya Seko, ata mbandukulu to nsuka. Beno me mona, Yandi kele—Yandi kele Seko.

<sup>85</sup> Ntangu yayi, na mvula 1914 yinza ya muvimba vwandaka kota na Allemagne samu na mvita ya yinza, ya kele kieleka, yinza nyonso na mvita ya yinza. Mpe beno talaka? Kieleka ya vwandaka kima ya ngitukulu.

<sup>86</sup> Mu zola nkundi ya munu ya mbote yina kele ya kuvwanda awa, tata ya Mpangi ya bakala Wood, kubakula yayi pwelele. Beno me mona, ba vwandaka . . . yandi kele mundimi ya ba-Témoins de Jéhovah, beno me mona.

<sup>87</sup> Mpe na yawu kuna yayi, bawu nyonso vwandaka tambula na mvita. Beno ke bambuka mbote moyo na yawu, na mvula 1914. Ntangu yayi, ya kele ve ngitukulu (kaka na *The Decline of the World's War*, mu kele na ba-volume ya yawu, na kati ya volume ya zole, pene na page makumi yiya na yiya) ti bawu zaba ve tii kilumbu yayi nani kusutopeke mvita. Kaiser Wilhelm tubaka ti yandi ata mbala mosi ve tumaka kima ya mutindu. Kasi, na mbala mosi, ya sutopeke mpe muntu ve zaba samu na yinki. Bawu vwandaka nwana, awa kwizaka . . . kuna na kati-kati, mpe . . . nyonso kumaka: “Nyonso sukaka, mvita sukaka.” Mpe bawu doditaka yimeni kiwisa ya ngemba, na kuzabaka ve yina kusalamaka.

<sup>88</sup> Ntangu yayi, kieleka, yina ke baka kilumbu mosi to zole samu na kubangula nyonso yina. Bawu zabaka ve; kasi beto bumba yawu mpe kubaka mambu ya ngundi. Ya vwandaka Nzambi yina sutopeke yawu, samu na kunungisa Ndinga ya Yandi! Ya vwandaka Wanzio yango yina sutopeke yawu. Bawanzio yango kwizaka na bambele ya kufwa (Yinki?) samu na kubebisa yinza ya muvimba, mpe Wanzio yankaka tubaka, “Vingila fyoti! Kusala yawu ve, beto fwana tula na ntete, kidimbu na bisadi yayi ya Nzambi ya beto na yintu ya bawu.”

<sup>89</sup> Yina vwandaka kaka na ntonono ya Pantekote, ntama na mvula 1906, na mvula 1914, kuna. Bantu yikwa zaba yawu? Ya kele na muntu ya ntama ya Pantekote awa, yina ke bambuka moyo na bilumbu yango ya ntama kuna? Kieleka. Ntangu ti, na bantangu yango ya ntete, yina ntangu Mpeve-Santu kubandaka kaka na kubwa mpe bantu bandaka na kuzwa Mpeve-Santu mpe kuzonza na bandinga mpe kusambila samu na bantu ya kubela

mpe nyonso yina, ya bandaka kaka na kusalama, to kaka na kati-kati ya bansungi zole yayi awa; kaka mutindu ba tubaka ya ke salama, Dibuundu vwandaka kieleka. Kuna Pantekote kubandaka na kubaka ba-dénomination, ba-Assemblée de Dieu, mpe Dibuundu ya Nzambi, mpe nyonso yankaka, mpe bawu kotaka na ba-isme ya bawu kaka mutindu bawu kele ntangu yayi. Na yawu ya kele. . .Beto kele na nsuka ya nsungi, beno me mona. Nyonso ke na kutwadisamaka na nsuka, nyonso ke na kutambula kaka awa na nsuka.

<sup>90</sup> Ntangu yayi, na bayayi, yiya. . .Beno ke tala, ya sutopeke na—na kilumbu ya kumi na mosi ya Ngonda ya kumi na mosi, na ngunga ya kumi na mosi na ntangu; na ngonda ya kumi na mosi ya mvula, na kilumbu ya kumi na mosi ya ngonda, mpe na ngunga ya kumi na mosi na ntangu. Beno ke bambuka moyo na yina Yesu tubaka samu na yawu? “Muntu mosi kwendaka kusala na bilanga ya vinu na ngunga mosi, mosi kuzwaka pata, mpe yankaka yina kwizaka,” bawu vwandaka bantu ya ngunga ya kumi na mosi. Ya kele kieleka? Bawu yayi, bantu ya ngunga ya kumi na mosi; ya kele bawu ba bakaka. Ntangu yayi ya ke na kukumaka ntangu samu na bawu na kukota, mpe bawu ke na kuvukanaka na ngaanda ya ba-Juif yango, samu na yinsi. Ba mwangisaka bawu na yinza ya muvimba, tii na Iran mpe bisika yankaka kisika bawu ata mbala mosi ve kuzabaka ti Yesu vwandaka na zulu ya ntoto, kuzabaka ata mbala mosi ve kima na yina me tala Ngwisani ya Malu-malu to kima mosi.

<sup>91</sup> Mpe ntangu yayi beno lenda tala na *Look* magazine, mpe *Life* mpe bayankaka, ke lakisa bafoto ya bawu ke na kuvutukaka. Yesu tubaka ve yawu, “Ntangu beno ke mona yinti ya bafike kubasisa bafololo ya yawu”? Ba-Juif ke ntangu nyonso yinti ya fike. “Nsungi yayi ke luta ve tii bima nyonso yayi ke salama.” Mpe ntangu yayi bawu me vutuka yimeni, yimeni yinsi, bawu me kuzwa mbongo ya bawu mosi mpe dalapo ya bawu mosi, mpe nyonso, mpe kele ya kuzabana na N.U., bawu kele yinsi. Yandi kele ya kuvwanda! Yandi kele ya kuyilama! Ntangu yayi, ya kuyilama na yinki? Kutulama ya kidimbu ya nkama mpe makumi yiya na yiya ya fundu (Ntangu yayi, beto ke baka kaka yawu na minuti.) ya Israël; ba-Juif yango, ve nkonga ya bantu ya Wall Street yina ntangu nyonso ke vunaka mpe ke yibaka mpe nyonso yankaka, Mu zola kutuba ba-Juif ya kieleka, ya kukwikama, ba-Juif ya kieleka yina ke zitisaka balutumu ya Nzambi kuna.

<sup>92</sup> Ntangu yayi, ba-Juif ya kieleka ke na kuvukanaka dyaka na Palestine, mpe kaka kieleka yina profete tubaka; mutindu Ismaël mpe Isaac vwandaka nwanaka ntangu nyonso na laka ya yankaka, ya kanisamaka bawu ke vwanda kuna na kilumbu ya nsuka, mpe kuna bawu kele. Ismaël kaka awa, mpe pene ya bloc mosi ya balupangu awa mpe kuna kele Isaac, mpe bawu zole (ba-

Mahométan mpe ba-Juif) ke nwana mosi na yankaka na ntoto ya muntu ve.

93 Ntangu yayi samu na kumona kana Nsangu yayi yina kele na beto ke wisana na yawu to ve. Ngunga kaka Israël kudodikaka na kuvwanda yinsi, ya vwandaka na ngunga kaka mosi, kilumbu kaka mosi, ngonda kaka mosi, nyonso yankaka: mu vwandaka na Green's Mill, na Indiana, ntangu Wanzio yango yina monikaka na munu mpe fidisaka munu na bilanga ya kulonga na Yayi; na manima Yandi kukutanaka na munu na nzadi mpe tubaka na munu yina zolaka salama, kuna pesaka munu kisalu bamvula kumi na mosi na ntuala na ngunga kaka mosi yina Israël kudodamaka mutindu yinsi. Ya kele nyonso ya kuvukana.

94 Beno me mona, Wanzio ya Mfumu kele na zulu ya ntoto ntangu yayi, beno me mona, Yandi ke na kutambulaka bisika nyonso na kukubika nyonso samu na nkwizulu ya Mfumu. Mpe ya kele Bawanzio mosi yina kuwaka disumu ntangu bawu kulumukaka na Sodome mpe bawu talaka . . . tubaka, "Beto me kulumuka na kumona kana bima yayi kele kieleka, yina beto kuwaka."

95 Beno ke bambuka moyo na yawu? Mpe Wanzio mosi kulumukaka . . . (Mosi bikanaka na Abraham Musolami.) Sodome vwandaka na yisi *awa*, mpe Lot vwandaka na Sodome, mpe Bawanzio zole kulumukaka kuna mpe longaka na bawu mpe basisaka mwa, nkonga fyoti yina, mwense ya kulala. Beno me mona? Mbote mingi. (Kasi Wanzio mosi bikanaka na Abraham.) Bawanzio yayi longaka *awa*, Billy Graham ya ntangu yayi mpe bayankaka, na kubasisa bawu.

96 Kasi Wanzio yina vwandaka na Abraham vwandaka na mukongo ya Yandi na tenta, mpe Yandi tubaka, "Abraham, wapi kisika kele kento ya nge, Sara?" Wapi mutindu Yandi zabaka ti yandi vwandaka ya kukwela, yandi vwandaka ya kukwela? Mpe wapi mutindu Yandi zabaka ti yandi vwandaka na kento? Mpe wapi mutindu Yandi zabaka ti nkumbu ya yandi, nkumbu ya yandi vwandaka Sarah? Yandi tubaka, "Yandi kele na kati ya tenta na manima ya Nge."

97 Yandi tubaka, "Mbote, Mu pesaka nge nsilulu." "Munu," beno me mona nani Wanzio vwandaka, "Mu pesaka nge nsilulu. Mu ke talana na nge landila ntangu ya luzingu, Sarah ke kuzwa bébé yayi."

98 Mpe Sara, na kati ya tenta na manima ya Yandi, kusekaka na kati ya yandi mosi. Mpe Wanzio, na mukongo ya Yandi ya kubaluka, tubaka, "Samu na yinki Sarah me seka?" Beno me mona kidimbu Yandi pesaka Dibundu ya Kusoola?

99 Beno me mona kidimbu bawu kuzwaka na Sodome?

100 Beno tala bakalasi ya beno tatu dyaka kaka awa, beto me vutuka kaka mbala mosi dyaka na yawu.

<sup>101</sup> Beto kele... baministele ya nene yayi yina ke na kutambulaka na yinza kuna. Na manima Billy Graham kuzwaka Mpeve-Santu, yandi lendaka ve kumata *awa*. Ya kele bilanga ya yandi *kuna* mpe yandi zaba yawu, mpe Nzambi ke simbidila yandi kuna. Beno me mona? Na kulonga ya mayela, kima yina yandi ke kuwa awa, kasi yandi ke na kumekaka na kuningisa Sodome, na kumekaka na kuningisa, to kupesa lemvo na mwense yango ya kulala. Beno me mona?

<sup>102</sup> Kasi *awa* vwandaka Abraham mpe kalasi ya yandi, mpe Yesu tubaka, “Mutindu yawu vwandaka na bilumbu ya Sodome, mutindu mosi yawu ke vwanda na nkwezulu ya Mwana ya muntu.”

<sup>103</sup> Beno me mona, bawanzio yango ke vwanda awa na zulu ya ntoto na kusalaka kima mosi. Beno me mona, ya kele samu na yina Billy ke na kukwendaka na ba-Baptiste mpe nyonso yankaka mutindu yina. Yandi fwana! Beno me mona, Jack Shuler mpe bantu—bantu nyonso yango ya nene na ngaanda kuna yina ke na kwendaka... ba-rivaliste, bawu fwana samu ti bawu ke—ke na kuningisaka. Bawu ata mbala mosi ve salaka bimangu kuna; kaka ndambu, mutindu bantu kufwa meso. Kasi kulonga ya Nsangu ya mbote ke kufwaka bawu meso, meno me mona, Biblia me tuba mutindu yina.

<sup>104</sup> Kasi muntu yayi *awa* kusalaka kidimbu yayi, kidimbu ya kimpeve, na Abraham mpe nkonga ya yandi, yina kele Dibuundu ya Musolami.

<sup>105</sup> Ntangu yayi, na mvula 1914, yinza kotaka na mvita, mpe bawu vwandaka ata mbala mosi ve na ngemba tuka; ntangu nyonso ke na kuyenga-yenga, kuyenga-yenga, kuyenga-yenga, mpe bawu ke na kusalaka kima kaka mosi dyaka. Mpe yinki bawu vwandaka sala? “Kukanga!” O Nzambi, vwanda na kyadi! Na kukangaka kima ya nene yina mu monaka na vision (kima nyonso ke na kwendaka na mwangusulu), na kukangaka atomique, na kukangaka bamvita ti yawu kubebisa bawu mosi ve tii kima ke kwenda na kubebisa yawu; tii Israël ke vutuka mpe ke vukana yandi mosi, mpe kuna Nsangu ke kwenda na Israël mpe yandi ke tulama kidimbu na Kidimbu yina ya Mpeve-Santu. Beno me mona, na manima ba me bokila Bantu ya makanda na kubasika; bantu samu na luzolo ya nkumbu ya Yandi ke bokilasama na kubasika, yina na kati ya nsungi yayi kaka *awa* ba ke bokila bawu. Na manima Israël ke kuzwa kaka bamvula tatu mpe bangonda sambanu ya Nsangu.

<sup>106</sup> Daniel ke tuba mutindu yina, yandi tubaka yawu ke vwanda, ya ke vwanda, ya vwandaka na makumi sambwadi, uh, to, to, “bamvula sambwadi ya kupesa profesi na bawu, yina dyaka bikanaka samu na mpulusu ya ba-Juif.” Yandi tubaka, “Mesiya, Mwana ya ntinu, yina kele Klisto, ke kwiza mpe ke pesa profesi na kati-kati ya bamvula sambwadi yango... to bamvula

sambwadi, ba ke zenga Yandi.” Yesu kulongaka bamvula tatu mpe mosi ndambu mpe ba zengaka Yandi, mpe ba katulaka munkayulu ya konso kilumbu yina Daniel vwandaka tuba. Mbote mingi.

<sup>107</sup> Mpe kuna ya vwandaka na mwa ntangu kupesamaka kuna na Bantu ya makanda, mpe bawu kwizaka tii nsungi yayi. Na yina ya kele dyaka na bamvula tatu mpe ndambu yina bikanaka samu na ba-Juif. Ntangu yayi kana beto baka Apocalypse 11, beto ke kuma kieleka na nsuka (Dibundu ke talana ve tii kapu ya 19 ya Apocalypse.), kasi nsuka ya yawu, Elie mpe Moïse ke vutuka dyaka mpe ke longa na ba-Juif. Bantu zole ya kukusa na Mpeve yina, to ya lendaka vwanda bawu mosi, bawu kufwaka ve. Na yawu ba ke kufwa bawu mpe bawu ke vwanda ya kulala na bala-bala yina ba ke bokilaka *Sodome* kisika ba komaka Mfumu ya beto, “Jérusalem.” Mpe na manima ya bilumbu tatu, oh, luzingu (Mpeve ya Luzingu) ke kota na bawu mpe bawu telama, ke vumbuka. Mpe kuna pene ya ndambu ya tatu ya ntoto kupasukaka na bitini-bitini na ntangu yina. Bawu salaka bimangu mpe bidimbu na ba-Juif.

<sup>108</sup> Ntangu yayi beno tala ba-Juif yina bawu ke kwiza kulonga. Yinza . . . lenda ve . . . lenda kupasula ve mosi na yankaka to kufwa mosi na yankaka, to mwangusulu kukwiza, tii ba-Juif yango ke vutuka na kisika yina; awa Biblia ke tuba mutindu mosi, yandi monaka Bawanzio yiya. Mpe beno tala mbote yina bawu fwana kuzwa; bawu fwana kuzwa Mpeve-Santu kaka mutindu bawu salaka.

<sup>109</sup> Kana Muntu yina na ecritoire vwandaka Mpeve-Santu, (Beto nyonso, yina ke tangaka Biblia, zaba yawu.) mbote, na yawu ya kele Wanzio mosi yayi yina ke kwiza dyaka na Mpeve-Santu, “kidimbu ya Nzambi ya moyo.” Ephésiens 4:30 “. . . Mpeve santu ya Nzambi . . . kutulamaka kidimbu tii kilumbu ya mpulusu.”

<sup>110</sup> Mpe bawu lenda sala kima ve ntangu yayi tii ba-Juif yango ke vutuka. Mpe basabala fyoti me luta bawu vukisaka kima nyonso kintwadi mpe me kuma na N.U. Ya me yilama! Beto kele na nsuka, nyonso me kangama ntangu yayi.

<sup>111</sup> Ntangu yayi, ntangu yayi beno tala mbote, samu na kulakisa ti bawu kele ba-Juif, awa, mu ke baka:

*Na kutubaka, Beno talisa ve ntoto mpasi, to dyaka mubu, to yinti mosi, tii beto ke tula kidimbu na bisadi ya Nzambi ya beto na mbunzu ya bawu.*

<sup>112</sup> Ntangu yayi, samu na kulakisa ti luzayikisu kele kieleka, beno tala mbote yayi, nzila ya 4:

*Mpe mu kuwaka lutangu ya . . . ba tulaka kidimbu: mpe kuna vwandaka ya kutula kidimbu nkama makumi yiya na yiya ya funda ya makanda nyonso ya bana ya Israël.*



113 “Ba-Israélite.” Wapi kisika bawu kele? Bawu me vukana kaka kintwadi ntangu yayi. Bawu kele kuna ya kuyilama, na kuingilaka na ntangu ya kutulama kidimbu. “Ya dikanda ya Juda kutulamaka kidimbu mafunda kumi na zole. Dikanda ya Ruben, mafunda kumi na zole. Dikanda ya Gad, mafunda kumi na zole. Aser, mafunda kumi na zole. Nephthali mafunda kumi na zole.” Mpe me landila mpe me landila, Siméon mpe oh, . . . tii na Benjamin, makanda kumi na zole. Mpe kumi na zole na kumi na zole kele nkama mpe makumi yiya na yiya ya mafunda. Beno me mona? Ntangu yayi ya kele yina . . .

114 Ntangu yayi kena beno ke tala na kapu ya 14, kaka ntangu fyoti, awa beno mona:

*Mpe mu talaka, mpe, tala, Mwana-dimeme . . . na mongo ya Sinai, mpe na yandi nkama mpe makumi yiya na yiya ya funda, yina vwandaka na nkumbu ya Tata ya yandi ya kusonama na mbunzu ya bawu.*

115 “Mongo ya Sinai.” Mwana-dimeme kuvutukaka na manima ya Enlevement. Mpe kuvutuka, mutindu beto talaka nkokila yankaka yina, mutindu Joseph tulaka na lweka Bantu nyonso ya makanda ntangu yandi kutelamaka na bankundi ya yandi, yandi tubaka, “Mu kele Joseph, mpangi ya beno ya bakala!” Mpe kuna bawu kumaka na boma.

116 Beno ke bambuka moyo na nsungi ya dibuundu kuna kisika beto kuzwaka yawu, ntangu Yandi ke vutuka? Mpe bayina tobolaka maboko ya Yandi, mpe bawu ke tuba, “Wapi kisika Nge me kuzwa bidimbu yina?”

117 Yandi tubaka, “Na maboko ya bampangi ya Munu.” Mpe bawu kunyongaka. Mpe konso dibuta ya kukabuka na mosi na yankaka, mpe kudilaka mpe kudilaka mpe kudilaka, samu ti bawu kusalaka yimbi yayi. Mesiya ya bawu ya kieleka, Nzambi ya kieleka. Mpe Yandi ke tuba na bawu kaka kieleka mutindu Yandi tubaka na—na . . . Joseph tubaka na Israël, yandi tubaka, “Beno kudasukila beno mesi ve, samu ti Nzambi salaka yayi samu na kubumba luzingu.”

118 “Mpe Nzambi . . .” Biblia ke tuba ti “Nzambi kufwaka meso ya ba-Juif ti Bantu ya makanda lendaka kuzwa siansi (beto, beto mosi), samu na kubaka bantu samu na luzola ya Nkumbu ya Yandi, kubasisa Kento ya makwela na Bantu ya makanda.” Oh, ya kele kitoko! Mutindu yina ve? Beno bawu yayi.

119 Beno tala ya beno nkama mpe makumi yiya- . . . Ntangu yayi kana beno ke zola kumona Kento ya makwela kukwiza na manima ya yawu, samu na kulakisa ti nkama mpe makumi yiya na yiya ya funda kele Kento ya makwela ve, beno landila kaka na kutanga ntangu yayi tii na kapu ya 8; to, yinga, na kapu ya 8; to nzila ya 8, mu zola kutuba, na kapu ya 7. Beto bandaka na nzila ya 9—na ya 9, samu ti nzila ya 8—ya 8 kele kutulama kidimbu ya Benjamin, mafunda kumi na zole.

*Na manima—na manima ya yayi mu monaka, mpe, tala, nkonga ya nene ya bantu, yina muntu ve lendaka tanga, (Beno tala kukwiza Kento ya makwela.) ya bayinsi nyonso, . . . makanda nyonso, . . . bantu nyonso, mpe ya bandinga nyonso, telamaka na ntuala ya kiti ya kimfumu, mpe na ntuala ya Mwana - dimeme, ya kulwata na robe ya mpembe, mpe mandala na maboko ya bawu;*

*Mpe bokaka na ndinga ya ngolo, na kutubaka, Mpulusu na Nzambi ya beto yina me vwanda na zulu ya kiti ya kimfumu, mpe na Mwana - dimeme.*

*. . . bawanzio nyonso telamaka na kuzungilaka kiti ya kimfumu, mpe bakuluntu mpe bibulu yiya ya moyo, . . . kubwaka—kubwaka na ntuala ya kiti ya kimfumu na bizizi ya bawu, mpe sambilaka Nzambi,*

*Na kutubaka, Amen: Balusakumunu, . . . nkembo, . . . ndwenga, . . . matondo, . . . buzitu, . . . lulendo, . . . ngolo, kuvwanda na Nzambi ya beto samu na ntangu nyonso mpe ntangu nyonso. Amen.*

*Mpe mosi ya bakuluntu yina vutulaka, mpe kutubaka na munu, Banani keke bayayi yina keke ya kulwata barobe ya mpembe? mpe wapi kisika bawu me katuka?*

*Mpe mu tubaka na yandi, Tata, nge zaba. Mpe yandi tubaka na munu, Bayayi keke bawu yina me katuka na lukwamusu ya nene, mpe me sukula mazwela ya bawu, mpe me kumisa yawu mpembe na menga ya Mwana - dimeme.*

*Na yawu bawu keke na ntuala ya kiti ya kimfumu ya Nzambi, mpe ke sadila yandi kilumbu mpe mpimpa na tempelo: . . .*

[Kisika ya mpamba na bande—Mu.] Beno me mona?

<sup>120</sup> Yinki kento ya beno ke salaka? Yandi ke sadilaka beno na yinzo. Beno ke vwanda, yandi ke pesa beno madya ya beno, yandi ke yidika bilele. Beno me mona, yandi ke sadila beno kilumbu mpe mpimpa na yinzo. Beno me mona? Mpe yandi yayi, bayinsi nyonso yayi, Bantu ya makanda, yina keke Kento ya makwela, mpe na ntuala ya kiti ya kintinu ya Nzambi kilumbu mpe mpimpa. Beno nyonso ke bambuka moyo na yina beto tubaka, mazono na nkokila mpe kuzonzilaka na yawu?

*. . . mpe yandi yina keke ya kuvwanda na kiti ya kimfumu ke zinga na kati-kati ya bawu.*

*Bawu ke vwanda dyaka ve na nsatu ya kudya, to dyaka ya kunwa dyaka maza; to dyaka nsemo ke lezima na zulu bawu, to tiya mosi.*

*Samu ti Mwana ya dimeme yina keke na kati-kati ya kiti ya mfumu ke dikisa bawu, mpe . . . twadisa bawu na*

*bayinto ya maza ya moyo: mpe Nzambi ke kusuna...  
masa ya meso nyonso na meso ya bawu.*

121 Ntangu yayi, beno tala nkama mpe makumi yiya na yiya ya funda ya beno (Israël) bayina ke na kvingilaka na nkwezulu ya Mfumu mpe lenda ve kukota kana ntete Bantu ya makanda kumanisa, fwana kumanisa.

122 Ntangu yayi, mu ke zola kutuba kaka mwa dyambu me tala munu mosi, mu banza, ti beno ke bakula yawu. Ntangu Lewi Pethrus ya Stockholm, na Suède, mukengi ya nene, mfumu ya mabuundu ya Philadelphie, yandi fidisaka fuku ya Babiblia na ba-Juif yayi, Bangwisani ya fyoti. Mu kele na mosi ya yawu kuna, souvenir ya fyoti ya yandi. Ba-Juif ke tangaka ntangu nyonso kubanda manima na mantwala, mpe beno zaba mutindu ndinga ya bawu—ya bawu kele. Mpe bawu zolaka tanga Babuku yayi, mpe bawu tubaka, “Mbote, kana Yesu yayi kele Mesiya, mpe Yandi kele ya kufwa mpe ti Mpeve ya Yandi me vutuka na mutindu ya Mpeve, ti beto mona Yandi kusala kidimbu ya profete, na yina beto ke kwikila Yandi.”

123 Wapi mutindu ya siansi ya kulunga! Mu banzaka, “Mfumu, awa kele ntangu ntangu yayi. Ntangu yawu yayi, yawu yayi.” Na yawu mu bakaka mpepo, Billy, mpe munu, Loyce, mpe kwendaka.

124 Mu vwandaka kwenda na Inde, mpe mu tubaka, “Ntangu yayi, na nzila ya munu na kuvutuka, mu ke baluka kaka awa mpe mu ke nata Nsangu na ba-Juif, mpe kubasisa bawu kuna mpe kutuba, ‘Ya kele kieleka?’”

125 Ba-Juif ke kwikilaka ntangu nyonso na baprofete ya bawu, beto nyonso zaba yawu. Samu ti Nzambi tubaka na bawu ti Mesiya ke vwanda profete, mpe bawu ke kwikilaka na baprofete ya bawu, mpe Nzambi tubaka, “Kana ya kele na kati-kati ya beno muntu yina kele profete, mumoni, mpe kana yandi. . . Mu ke sala na yandi na ba-vision mpe nyonso yankaka. Mpe—mpe kana yina yandi ke tuba kusalama, na yina beno kuwa yandi, samu ti Mu kele na yandi.” Beno me mona? “Kasi kana ya salama ve, na yina beno vwanda ve na kima ya kusala na profete yina, samu ti Mu—Mu—Mu kele ve na yandi. Kasi kana ya salama, yinki Yandi tubaka, kuna beno kuwa yandi, samu ti Mu kele na yandi.” Mpe ba-Juif zaba yawu.

126 Mpe mu banzaka, “Oh, la la! Ya ke vwanda mbote ve! Mu ke kuzwa pene ya mafunda yiya to tanu ya bawu mpe kutelama kuna, mpe kubika bawu—kubika bawu kutanga kaka Biblia mpe kutuba, ‘Kana yayi kele Mesiya, ti beto mona Yandi kusala kidimbu ya profete.’” Mu tubaka, “Wapi mutindu ya siansi ya ke vwanda!” Mu vwandaka na tike ya munu na diboko, kaka pene ya baminuti makumi tatu ba bokila samu na ntangu ya mpepo ya Arabie. Na yawu mu vwandaka kuna na Caire, na Egypte, mu banzaka, “Lukumu na Nzambi! Na bangunga zole dyaka

ba-Juif ke kuzwa kima mosi yina bawu kuzwaka na Pantekote, kaka kieleka mutindu nyonso.” Mu banzaka, “Kana mu telama kuna mpe ti mu lenda kutuba na bawu, ‘Beno kwenda baka beno mosi nkonga ya bantu na ngaanda kuna na kati-kati ya beno mpe beno nata bawu awa, beno mona kana Yandi kele dyaka Mesiya.’ Beno me mona, mpe kuna mu ke tuba, ‘Ntangu yayi, na zulu ya ntoto mosi yina batata ya beno kumangaka Mesiya yayi, beno yamba Yandi, beno telemisa maboko ya beno mpe beno ke—beno ke kuzwa Mpeve-Santu ntangu kaka yayi.’ Mpe kuna bawu ke samuna yinza na kitini ya bawu ya yinza mbala bawu. . . ntangu bawu ke kuzwa Yawu. Kuzwa bantwadisi, ve. . . Kubaka kaka ba-principaux centre nerveux, bantwadisi, ti bawu kubandaka yawu.”

127 Mpe Kima mosi bulaka munu mpe tubaka, “Kukwenda ve ntangu yayi, samu ti ngunga kele ntete ve.” Uh-hum. Bantu ya makanda me manisa ntete ve, beno me mona, kilumbu me manisa ve.

“Oh,” mu banzaka, “yina vwandaka kaka munu.”

128 Na yawu mu bandaka dyaka, mpe ya kumaka mingi yimbi tii mu lendaka yawu ve. Mpe mu kwendaka na manima ya mwanza mpe mu kulumusaka yintu ya munu, mu tubaka, “Tata, ya kele Nge yina ke na kuzonzaka na munu?”

129 Yandi tubaka, “Kukwenda ve na Israël ntangu yayi, ngunga kele ntete yawu ve.” Mu vutukaka na kati, sobaka tike ya munu, mu landila kaka nzila, na kukwendaka nzila yankaka. Beno me mona, samu ti ngunga kele ntete yawu ve.

130 Kasi mosi ya bilumbu yayi Nsangu ke kwenda na Israël, mpe yina ke zenga samu. . . Nzambi ke fidisa na bawu Moïse mpe Elie, na Apocalypse 11, mpe bawu ke sala bidimbu mpe mambu ya ngitukulu mpe kidimbu ya Jéhovah; na yina Bantu ya makanda me manisa, lemvo ya. . . kilumbu ya lemvo ke katukila dibuundu ya Bantu ya makanda, nsungi ya Pantekote ke kwenda. Ba-dénominations ke landila samu ti bawu ke kwiza awa na mwense ya kulala (Beto ke kota na yawu kaka na mwa ntangu fyoti.), kasi bawu ke vwanda na kalasi yina.

131 Kasi kuna ntangu bawu ke sala yawu, ntangu bawu ke sala, ba-Juif ke kuzwa mbotika ya Mpeve-Santu mpe ya ke vwanda na réveil kuna yina ke sutope mazulu na bilumbu ya, “Ti ya noka ve!” Bawu ke sala mitindu nyonso ya bidimbu mpe bimangu. Mpe na nsuka bukimfumu ya Rome. . . Ba-Juif kele na bimvwama ya yinza, mpe—mpe na yawu Dibundu ya Katolika ya Rome ke zenga ngwisani ya yandi na ba-Juif na manima kima mosi yayi me manisa mpe kuna ya ke. . . (kiwisa yina bawu kudodikaka na kati-kati ya bawu), yandi ke kulumuka kuna, mpe kuna ya kele ntangu Nzambi ke telama mutindu Yandi salaka na bilumbu ya ntama kuna, mpe nwanaka samu na Israël.

Bawu na nsuka ke kufwa baprofete zole yayi, mpe bawu ke vwanda ya kulala na bala-bala, mpe ke losa bawu mante.

132 Mutindu bawu salaka mulongi ya Pantekote yayi na kento ya yandi mpe bana awa basabala fyoti me luta kuna, mpe mwa bivumu yango kumaka nene mutindu *yina*, ya bana, kisika bawu vwandaka luta mpe vwandaka losa mante na bawu, kubikaka bawu kuna ya kulala na mwini ya ngolo bilumbu tatu to yiya kukondwa kuzika bawu.

133 Bawu ke sala kima mosi! Biblia me tuba yawu! Bawu ke sala kima mosi kaka kuna. Mpe na yina bawu ke sala yawu, na manima ya bilumbu tatu, ya kulala ya kufwa, Mpeve ya Luzingu ke kota na baprofete zole yango mpe bawu ke vumbuka mpe ke mata na Nkembo. Mpe, pene ya ntangu yina, ba-feu d'artifice ke banda kuna. Yina kele nsuka ya ntangu. Ya kele ntangu yandi ke manisa.

134 Kasi ntete ya salama, Bantu ya makanda, Kento ya makwela ya kusoola. . . Ya ke vwanda na bayankaka ya beno yina ke vwanda ya kuvwanda na mesa, mosi ya basuka yayi, ba ke baka mosi, ba ke bika yankaka. Na nsuka beno ke kukiyufula, “Wapi dyambu?” Beno ke vwanda kaka ke na kutambulaka na ditoma, ke na kuzonzaka na muntu mosi, kento ya beno to bakala ya beno ya kuvwanda na kiti; bawu ke pesa ve mvutu, bawu ke vwanda ve kuna. Beno ke kima na maziami, ya ke vwanda na bayankaka ya badyamu yina ke vwanda ya kuzibuka, bayankaka dyaka ya kukangama, “Samu ti bayankaka ya kufwa ke zinga ve na kati ya ntangu ya mafunda ya bamvula.” Beno bambuka kaka moyo, kuna yimeni!

135 Ya ke vwanda nkwezulu ya mansweki, muntu ve ke zaba ntangu yawu ke salama. Ba me lomba beto na kuvwanda ya kukubama mpe na kukangula meso. Beto zaba ve ngunga. Kasi, ata nyonso yina ya kele, beto ke tekila ve mosi ya bayayi ya ntama *awa*; samu, kaka na ntangu yina Yesu ke monika, mikengi nyonso ke telama. Ya kufwa to ya moyo, ya ke sala dyambu ve!

136 Beto ve—beto ke kutana na Yandi ve na ntete, beto ke kutana na mosi na yankaka ntete. Biblia ke tuba, na Ephésiens, kapu ya 5, Yawu ke tuba, “Samu ti beto bayina kele moyo mpe bikanaka na nkwezulu ya Mfumu, na yisi awa, ke tekila ve to ke kanga ve bayina kele ya kulala.” Bayina ya ntalu yina kangaka menga ya bawu. . . kangaka kimbangi ya bawu na menga ya bawu. “Ke tekila to ke kanga ve bayina kele ya kulala, samu ti mpungi ke wakana.” Kima ke salama, “Nsangu ya mbote *kima* ke wakana,” ke samuna nkwezulu ya Yandi. “Mpe bantu ya kufwa na Klisto ke vumbuka ntete. Mpe beto bayina kele moyo mpe ke vwanda ke soba.” Ke telama, mpe ke kuwa nsodolo kukwiza: nsuki ya mpembe kuzimbana, mifutu kukatuka, kusoba na ntangu fyoti, na kukanga ya disu. Mpe beto ke kutana na baya beto ya luzolo ntete: “Tala Mama, Papa, tala mpangi ya munu. Oh, alleluia,

beto me kubama! Mpe dyaka, kintwadi na bawu yina vwandaka ya kufwa,” ke tuba Masonuku, “ba ke baka beto na zulu na kukutana na Mfumu.” Landila Nkwizulu.

<sup>137</sup> Oh, kumona papa yango ya munu ya mbote! Oh, la la! Kumona bawu yango ya luzolo ya ntama bayina kwendaka na Lukwikilu kuna, kukutana bawu. Kumona lembami ya Nzambi, na kuzabaka kana beto kukutana Yandi ntete beto ke kukiyufula, “Mama kotaka? Na nyonso Mama lendaka na kukota? Beto me longa ngolo mingi, beto—beto mekaka. Yandi kele awa? Ngwa-nkazi Joe kele awa? Mpangi ya bakala kele—kele awa? *Kingandi?*” Beno me mona? “Mfumu, beto zola Nge, beto zola Nge, kasi. . .” Beto ke kutana ntete na mosi na yankaka! Oh—oh—oh! Beto ke tungisama ve samu na yawu, beto nyonso kele kuna.

<sup>138</sup> Ya kele ve ya kuyituka ti bawu kutelamaka mpe tubaka, “Amen, nkembo, mpe ndwenga, mpe buzitu, mpe lulendo, mpe ngolo.”

<sup>139</sup> Bakuluntu makumi zole mpe yiya kukatulaka bayimpu ya bawu mpe kubwaka na ntoto mutindu yina, bawu nyonso kufukamaka na ntoto mpe sambilaka Yandi.

<sup>140</sup> Mosi ya bilumbu yayi beto ke telama na lweka yankaka ya ntoto, kuna, na nsuka ya ntoto, kuna kisika mosi na zulu; mpe beto ke vwanda ntete ve na Mazulu, ba ke baka beto na kukutana Yandi na zulu.

<sup>141</sup> Ntangu Rébecca bakaka lukanu, na nswalu, bakaka lukanu ti yandi ke kwenda na Eliézer na zulu ya samo samu na kukutana Jacob. . . to na kukutana na Isaac yina vwandaka yina zolaka vwanda bakala ya yandi, yandi monaka yandi ata mbala mosi ve, na kuzabaka ti Nzambi vwandaka twadisa yandi. Mwana ya Jacob, to. . . Isaac vwandaka na nzila ya yandi na ngaanda na bilanga na madidi ya nkokila. Beno bambuka moyo, ya vwandaka na ntangu ya nkokila. Mpe Rébecca na kukwizaka na samo. Eliézer tubaka, “Tala yandi ke na kwiza ntangu yayi.” Mpe Rébecca dumukaka na samo, katulaka vwale na kizizi ya yandi. Yandi ata mbala mosi ve kumonaka yandi. Kuzabaka ve. . . Ya vwandaka bakala ya yandi, kasi yandi ata mbala mosi ve kumona yandi. Yandi vwandaka kwenda na kukutana yandi na nzila ya lukwikilu. (Mu zaba ve mutindu Yandi kele, kasi, oh, ntangu mu ke mona Yandi!) Kuna ntangu yandi monaka yandi, ya vwandaka zola na kutalana ya ntete. Mpe bakala ata mbala mosi ve kumonaka yandi, na yawu yandi monaka yandi, zola na kutalana ya ntete. Mpe awa bawu me kwiza kukutana mosi na yankaka na bilanga. Mpe yandi nataka yandi na kati ya kimfumu ya tata ya yandi awa mpe kwelaka yandi.

<sup>142</sup> Ya kele mutindu ba ke baka Dibuuundu na zulu, na kati-kati ya zulu, mpe kukutana Mfumu na nzila ya Yandi ke na kukulumuka. Oh, wapi dyambu ya ke vwanda, zola na kutalana

ya ntete! Mpe ntangu beto ke telama kuna na bansuka ya ntoto yayi mpe kuyimba bankunga yango ya mpulusu, oh, la la! Mutindu beto ke yimba mpe ke kembila Yandi samu na ya beto...lemvo ya luvulusu yina Yandi pesaka beto. Ntangu Bawanzio ke fuka balweka ya selekele ya ntoto na bayintu ya kukulumusa, na kuzabaka ve yina beto ke na kuzonzilaka. Bawanzio yango kuzimbanaka ve, bawu zaba ve yina ya zola kutuba kuzwa mpulusu. Beto vwandaka bayina vwandaka ya kuzimbana, beto vwandaka bayina. Beto ke bakula kuna wapi kima ya boma vwandaka na ntuala ya beto, mpe Yandi vulusaka beto na nzila ya Menga ya Yandi, na kati ya konso makanda, ndinga, mpe yinsi. Wapi kilumbu ya kusepela ya ke vwanda!

143 Mu ke zolaka nkunga yina, ke tuba:

Ya ke vwanda na lukutakanu na zulu,  
Ntama, ntama mpe mingi ve;  
Mu ke kutana na beno mpe ke pesa beno mbote  
kuna

Na yinzo yango na manima ya zulu;  
Mutindu ya kuyimba yina makutu ya bantu ke  
kufwa me kuwaka ntete ve, me kuwaka ntete  
ve,

Ya ke vwanda ya nkembo, mu ke tuba!  
Ntangu Mwana ya Nzambi Yandi mosi, Yandi  
ke vwanda Yandi mosi ntwadisi  
Na lukutakanu yango na zulu. (Oh!)

Beno kuwaka na mwana Moïse na mbaamba,  
Beno kuwaka na David ya kukondwa boma  
mpe dyonga ya yandi;  
Beno kuwaka na disolo ba tubaka na Joseph  
muloti,

Mpe ya Daniel mpe bankosi yina beto ke  
yimbaka ntangu mingi.  
Oh, kasi ya kele na mingi, mingi yankaka na  
Biblia,

Mpe mu ke zola kukutana bawu nyonso, mu ke  
tuba! (Ya kele kieleka!)

Mpe wapi kyese ya ke vwanda ntangu beto ke  
kutana na bawu

Na lukutakanu yango na zulu. (Beto ke vingila  
kilumbu yango!)

144 Beno tala kukwiza nkama mpe makumi yiya na yiya ya funda ya beno, bawu ke kuzwa Nsangu ya mbote na manima beto... bawu lenda ve kuzwa Yawu na ntangu mosi Nsemo kele na lweka ya Bantu ya makanda. Ba-Juif ke na kumangaka Yawu mpe ke na kubumbaka Yawu. Ntangu yayi, ntangu Nsemo... Ba me baka Bantu ya makanda, kuna Mpeve ke kwiza na zulu ya zole samu na kupesa bawu kimbangi, kuna ba-Juif ke kuzwa Yawu, yina kele nkama mosi mpe makumi yiya na yiya ya funda ya makanda

ya kuzimbana ya Israël ke kuzwa Nsangu ya mbote; mpe ba me baka Kento ya makwela.

145 Ntangu yayi, ya kele na “bamwense kumi.” Beto tala na Matthieu 21, na nswalu. Beno me mona, beto kele dyaka na mwa ntangu. Oh, Mu zola Biblia.

Ntangu mu ke baka bakonze ya munu na  
Mazulu,  
Wapi nzyetolo ya mbote ya ke vwanda;  
Na kuwaka concert ya miyimbidi ya Mazulu,  
Mpe myelo ya munu . . . kizizi ya Mvulusi ya  
munu mu ke mona;  
Ya kuvwanda na simu ya nzadi,  
Na yisi ya yinti yina kele ntangu nyonso ya  
mubisu,  
Mu zola kulutisa konze ya munu na Mazulu,  
Beno ke zola ve kubaka ya beno na munu?

146 Ntangu yayi, na Buku ya—ya Santu Matthieu, mu banza kapu ya 25, mu banza. Mu tubaka 21, ve? Mu sonikaka yawu awa 21, kasi ya kele foti. Ya kele 25. Mu vwandaka sala mbangu na suka yayi, mu vwandaka . . . mu vumbukaka ya kulemba, mpe na ntangu ya yimbi mpe—mpe mu—mu vwandaka sala mbangu. Mu vwandaka sonika mwa Masonuku, mpe mu tulaka 21 na yina ya kele—ya kele 25.

*Na yina kimfumu ya mazulu ke vwanda mutindu bamwense kumi, bayina bakaka minda ya bawu, mpe kutanaka bakala ya makwela.*

147 Ntangu yayi:

*Mpe tanu ya bawu vwandaka ya ndwenga, mpe tanu vwandaka ya kizoba.*

*Mpe bawu yina vwandaka bizoba bakaka minda ya bawu, mpe bakaka ve mafuta na yawu:*

*Kasi ya ndwenga bakaka mafuta na bambwata ya bawu na minda ya bawu.*

*Na yina bakala ya makwela bakaka ntangu (ya kele na nzila ya bansungi ya dibuundu yayi), bawu . . . kuzwaka pongi mpe lalaka.*

148 Landila nzila nyonso, bawu nyonso zole kufwaka, kuzwaka mpongi mpe lalaka, beno me mona, na yina bawu vwandaka landila. Ntangu yayi, bawu kele ve ya kuzimbana, kasi kaka bawu “kuzwaka pongi mpe lalaka.” Bawu ke na kuingilaka, beno me mona. Bawu tubaka ve ti bawu vwandaka ya kufwa, kasi bawu “kuzwaka pongi mpe lalaka.” Beno me mona?

*Mpe na kati-kati ya mpimpa ya vwandaka na makelele kuwakanaka, Beno tala, bakala ya makwela ke na kwiza; beno basika na kukutana yandi.*



*Mpe bamwense nyonso yango kuvumbukaka, mpe kubikaka minda ya bawu.*

*Mpe ya kizoba tubaka—tubaka na ya ndwenga, Beno pesa beto ya mafuta ya beno; samu ti minda ya beto ke na kufwa.*

*Kasi ya ndwenga vutulaka, na kutubaka, Ve; ya ke vwanda ve ya kulunga samu na beto mpe beno: kasi beno kwenda kwandi na bayina ke tekaka yawu, mpe kusumba samu na beno mosi. (Lemvo.)*

*Mpe na yina bawu kwendaka na kusumba, bakala ya makwela kukwizaka; mpe bawu yina vwandaka ya kukubama kotaka na yandi na makwela: mpe ba kangaka kyelo.*

*Na manima kwizaka mpe bamwense yankaka, na kutubaka, Mfumu, Mfumu, zibula beto. (Ntangu yayi, beno me mona, bawu vwandaka ve bantu ya ntembe, bawu vwandaka bantu ya mbote.) . . . zibula beto.*

*Kasi yandi mvutu . . . tubaka, Ya kieleka mu ke tuba na beno, mu zaba beno ve.*

*Na yawu beno lala ve, samu ti beno zaba to ve kilumbu to ngunga na wapi ntangu Mwana ya muntu ke kwiza.*

149 Ntangu yayi bamwense tanu ya “ndwenga.” Ntangu yayi, *mafuta* na Biblia ke fwanikisa “Mpeve-Santu.” Beto nyonso zaba yawu. Ya kele samu na yina beto ke kusaka bambevo na mafuta, mpe mafuta ke fwanikisaka Mpeve-Santu. Na yawu baya ndwenga vwandaka Mafuta na minda ya bawu, yina vwandaka Mpeve-Santu, na yawu bawu vwandaka ya kukubama samu na kukota na Madya ya Makwela. Mpe beto lendaka vutuka na—na—na Ezéchiel 9, mpe nyonso yankaka, mpe kubasisa kima mpe kulakisa, kasi mu kele dyaka na pene ya Masonuku kumi na tanu ya kusonika awa. Na yawu mafuta ke fwa- . . . Mu banza ti beto kuzwaka yimeni yawu na kalasi ya beto sabala yayi, *mafuta* yango kele, ke fwanikisa “Mpeve-Santu.” Beto nyonso zaba yawu.

150 Ntangu yayi beno ytala mbote, bawu . . . bawu nyonso zole vwandaka “bamwense.” Ntangu yayi ti mu baka yayi. Beno tala, beto baka bawu zole yayi kaka awa. *Yayi* kele mwense mpe *yayi* kele mwense, *yayi* vwandaka mwense ya kizoba mpe *yayi* vwandaka mwense ya ndwenga, kasi bawu zole kele bamwense.

151 Ntangu yayi kana beno ke baka nkumbu yina *mwense* mpe ti beno tala yawu, ya zola kutuba—ya zola kutuba “ya santu, ya kutsyema, ya kusantisama.” Mpova ya *kusantisama* me katuaka na mpova “ya santu,” yina zola kutuba, “ya kutsyema.” Mutindu mpova Hébreu . . . Ntangu yayi, ya kele mpova ya Grec, *kusantisama* zola kutuba “ya kutsyema.” Ntangu yayi, mpova Hébreu kele “santu.” Beno me mona? Mpe ya beto kele “ya tsyema.” Ntangu

yayi, bawu bakaka bampova tatu, mutindu konso mpova kele na kuzonza kutuba mosi kasi ya kele ya kutanga mutindu yankaka, mutindu mpova “ya kutsyema, ya santu, ya kusantisa,” bawu nyonso tatu kele mpova mosi.

<sup>152</sup> Mutindu beto ke zonza mpova mutindu *yimbwa*. Mu ke tuba, “dog,” [yimbwa—Mu.] ya kele na Kingelesi. Kana mu ke tuba *yimbwa* na ki-Allemand, Fred, ya kele “hund.” Ya kele kieleka? Mpangi ya bakala Norman, kana mu tuba *yimbwa* na Espagnol, ya kele “ajo.” *Ajo*, *Hund*, mpe *dog* kele nyonso *yimbwa* samu na beto, beno me mona. Beno me mona, ya kele—ya kele kaka kieleka, mutindu ya kutuba.

<sup>153</sup> Na yawu, mpova Grec ya *tsyema* kele “ya kusantisa,” mpova na Hébreu kele “ya santu.” Ya santu, ya tsyema, mpe ya kusantisa, kele nyonso mpova mosi. Na yawu yayi vwandaka ve dibuundu ya yimbi, ya mvindu; ya vwandaka ya kusantisa, dibuundu ya kutsyema, “*bamwense* kumi kubasikaka na kukutana Bakala ya makwela.” Yinki ya zola kutuba? *Mabuundu* nyonso yayi. Ve. . . ntangu yayi, *awa* ve na Rome; kasi na ba-dénomination, ba-Nicolaïte. Ba-Baptiste ke longa na Nkwizulu ya Zole ya Klisto; ba-Méthodiste ke longa na Nkwizulu ya Zole ya Klisto; ba-Presbytérien ke longa na Nkwizulu ya Zole ya Klisto; ba-Nazaréen ke longa na Nkwizulu ya Zole ya Klisto; ba-Pèlerin de la sainteté ke longa na Nkwizulu ya Zole ya Klisto. Ya kele kieleka? “Bawu nyonso basikaka samu na kukutana Bakala ya makwela.” Ntangu yayi beno—beno bambuka moyo ti bawu nyonso vwandaka na nzila ya bawu na kukutana Bakala ya makwela. Ntangu yayi, kana Nzambi ke zitisa kaka yawu, na yina Yandi fwana, baka bawu mpe.

<sup>154</sup> Kasi beno ke bambuka moyo na kima mosi, mutindu kingana na nkokila yankaka yina, ntangu Nzambi kuzonzaka na beto na nsungi ya dibuundu mpe tubaka ti “Balaam, malongi ya Balaam.” Ntangu yayi, *awa* kutelamaka Balaam, yina vwandaka yinsi ya mbote, ya nene ya kubonga. Mpe bawu vwandaka kwikila na Nzambi, samu beno tala yina Balak salaka ntangu yandi kulumukaka. . . Balaam na kisika. Yandi pesaka munkayulu kaka mosi na Nzambi kaka mosi yina vwandaka na Israël, Nzambi ya Israël, Jéhovah. Mpe yandi salaka ba-autel sambwadi. Sambwadi kele lutangu ya muvimba ya Nzambi.

<sup>155</sup> “Bilumbu sambanu Yandi vwandaka sala, mpe na ya sambwadi Yandi vwandaka pema,” ya kele muvimba, beno me mona, sambwadi. Bilumbu sambwadi Yandi salaka yinza. Mafunda zole ya bamvula ya ntete, ba bebisaka yawu na maza; mafunda zole ya bamvula ya zole, Klisto kwizaka; mpe yayi kele mafunda zole ya bamvula ya tatu ntangu yayi. Na nsuka ya konso mafunda zole, kima ke salamaka, yinza ke ningana dyaka. Na mafunda sambanu ya bamvula, Yandi tungaka yinza; na mafunda sambanu ya bamvula dibuundu ke sala dyaka na kuteleminaka yinza; mpe funda ya sambwadi kele bamvula

funda yango ya kuyala ya Millenium. Beno me bakula yawu ntangu yayi?

<sup>156</sup> Ntangu yayi, dibuundu kele na Bansungi Sambwadi ya dibuundu, mpe. Nzambi. . . Mpe yina kele lutangu ya muvimba ya nsungi ya dibuundu, kaka yina, sambwadi. *Sambwadi* kele lutangu ya muvimba ya Nzambi. Bansungi Sambwadi ya Dibuundu, mafunda sambwadi ya bamvula ya luvangulu, nyonso ke tambula na sambwadi.

<sup>157</sup> Ntangu yayi, ya vwandaka na bamwense yina basikaka samu na kukutana Yandi. Mpe bamwense ya “bizoba”, ntangu yayi, vwandaka ve na mafuta na minda ya bawu, kasi bawu vwandaka na nyonso yankaka: bawu vwandaka ya kutsyema, bawu vwandaka kwikila na Klisto; bawu vwandaka longa Ndinga yina bawu vwandaka kwikila, dénomination ya bawu ke bika bawu kulonga, bawu longaka yawu, Nkwizulu ya Zole, Munkayulu, Kukatula-masumu. Bawu ke kwikila. Kana beno na vukana na kizabi ya mbote ya Baptiste kilumbu mosi, (huh) beno ke sala mbote na kuzaba yina beno ke na kuzonzaka, uh-huh, kieleka.

<sup>158</sup> Kasi, beno me mona, “Pene-pene mingi,” tubaka Matthieu 24, Matthieu 24:24; beno tanga kaka yawu mpe beno ke mona. Yesu tubaka ti na bilumbu yayi ya nsuka bampeve nyonso zole ke vwanda mingi pene-pene kintwadi tii ya ke vuna Musolami ya kieleka kana ya lendaka salama. Ya ke vwanda mingi pene-pene ti ya ke ningisa ba-Pentecotiste yango mutindu dyambu ya muntu ve. Kieleka! Ntangu yayi, Matthieu 24:24, ya kele na muntu me kuzwa yawu? Mu me kuzwa yawu mbote ve kuna. Nge kele na yawu kuna, mpangi ya kento, to mosi ya beno? Matthieu 24. Nge me kuzwa yawu, Ben? Mbote mingi, tanga yawu.

[Mpangi mosi ya kento ke na kutanga: *Samu ti ya ke telama Miklisto ya luvunu, Baklisto ya luvunu—ya luvunu,—Mu.*] *Baklisto ya luvunu!* [mpe baprofete ya luvunu.] *Baprofete ya luvunu!* [mpe ke lakisa bidimbu ya nene mpe mambu ya ngitukulu; na kisika ti, kana ya lendaka salama, bawu ke vuna musolami ya kieleka.]

<sup>159</sup> Beno bawu yayi. Ntangu yayi, yinki ke telama? Baklisto ya luvunu ke telama, bantu ya luvunu ke tuba, “Mu kele ya Klisto.” Baprofete ya luvunu, ke tuba, “Mu kele *yayi* mpe mu kele *yina*.” Mpe bawu pene ke vuna Musolami ya kieleka kana ya lendaka salama. Mpe ya kele kaka na mutindu mosi ti beno lenda vuuka, ya kele ntangu beno kusoolamaka ntete mbandukulu ya yinza; yina kele, Musolami, na nzila ya luzabu, nkumbu ya beno kutulamaka na Buku ntama kuna. “Bidimbu ya nene!”

<sup>160</sup> Ntangu yayi beno tala mbote mabuundu zole yayi. Oh, kana mu lenda. . . kana ya vwandaka na mutindu mosi mu lendaka sala kaka bantu kumona yawu. Ya ke na kupela na moyo ya munu! Yayi. . . mabuundu *yayi* kele kaka ya kutsyema

mpe ya santu mutindu yandi *yayi*; kana bawu nyonso kele bamwense, bawu nyonso kele bamwense, *mutindu* kaka ya kutsyema. Luswaswanu vwandaka—vwandaka kaka Mafuta na mwinda, Mpeve-Santu. Mpe Mpeve-Santu, kana Yawu kele na kati kuna, Yawu ke pesa mutindu mosi kaka ya tiya Yawu salaka na Pantekote. Kasi bawu kele na ata tiya, ata Mafuta na minda ya bawu. Bawu kele na binkulu ya dibuundu, dibuundu kaka mutindu binkulu mutindu—mutindu ya lendaka vwanda, bankinzi ya mbote (mu ke na dyambu ve na yawu), ba-crédó yina ke ningisa konsiansi ya beno, mpe mikunga mutindu ke yimba Bawanzio. Mpe bawu kele . . . beno ke . . . beno tula musapi ya beno na ya beno . . . lusingu ya beno, beno lenda ve kusala yawu. Kasi dyaka ya kele luvunu! Ya kele ve . . . ya kele—ya kele ndambu ya Yawu, kasi Yawu *nyonso* ve. Ya kele mutindu yina ke kondwa Enlevement. Beno me mona? Bawu kele kaka . . .

<sup>161</sup> Ntangu yayi beno tala mbote. Awa vwandaka Moab me kulumuka. Mu ke baka kaka yawu awa samu kana beno lenda kumona yawu. Awa kele Moab, organisation ya nene, mu ke tula awa “*samu na*” organisation; awa kele Israël, na “ata” organisation. Awa kele Moab, yina me tula mosi, zole, tatu, yiya, tanu, sambanu, sambwadi ya ba-autel; Israël vwandaka na mosi, zole, tatu, yiya, tanu, sambanu, sambwadi ya ba-autel. Mbote mingi. Moab na zulu awa me tula mosi, zole, tatu, yiya, tanu, sambanu, sambwadi ya bangombe; Israël, mosi, zole, tatu, yiya, tanu, sambanu, sambwadi ya bangombe. Mbote mingi. Moab tubaka, “Ya ke kwiza ntangu ntangu ya ke vwanda na muntu (Klisto) ke kwiza na ntoto, na yawu Yandi ke vwanda Mwana-dimeme ya Nzambi yina ke katula disumu ya yinza, beto ke tula sambwadi” (yinki?) “bana ya mameme na autel yayi”; Israël tubaka, “Ya kele kaka kieleka, bana ya mameme sambwadi na autel.” Beno me mona?

<sup>162</sup> Ntangu yayi, na mbandukulu kaka, Caïn kusalaka autel, kusalaka munkayulu, kusambilaka, kusalaka nyonso yina Abel kusalaka, kukondwa . . . (Oh, kuzwa Yawu!) . . . kukondwa luzayikisu ya Nzambi, na yina, Dibundu nyonso kele ya kutunga na luzayikisu yina. Yesu tubaka yawu, “Na zulu ya ditadi yayi Mu ke tunga Dibundu ya Munu.” Kieleka ya Kimpeve yina me monanaka ya bunene ya Bunzambi ya Yesu Klisto, “Na ditadi yayi Mu ke tunga Dibundu ya Munu.”

<sup>163</sup> Ntangu yayi, kana Nzambi ke zitisa kaka binkulu ya ya beno, ba-rite ya beno, mutindu ba-Méthodiste, ba-Baptiste, ba-Pentecotiste, mpe nyonso yankaka, kana Yandi ke vingila kaka yawu samu na beno na kusala, na kulonga Nkwizulu ya Zole mpe bima nyonso yayi yankaka (yina, ya kele kieleka ya Kimpeve), mutindu ba-Baptiste, ba-Presbytérien, mpe nyonso yankaka ke salaka, na yina Nzambi kele ya kukwika na kubaka bawu zole samu ti ya kele nyonso yina Yandi ke lomba. Kasi, beno me mona, kukondwa luzayikisu, *kuna kele* mwense ya kulala; *awa*

*kele* mwense ya ndwenga. Bawu vwandaka organisation, yinsi ya nene.

<sup>164</sup> Beto tangaka nkokila yankaka yina, kisika Yawu ke tuba, “Bantu yayi ke vwanda ve organisation, bawu ke vwanda na kuyenga-yenga na yinsi, na kuzingaka na batenta, ya mputu, ya kulemvuka.” Kasi tubaka, “Beno meka ve na kusinga bawu, samu Mu kele na bawu.” Ntangu yayi beno tala mbote! Bantu yayi vwandaka kwikila na kinkulu mosi yina bawu vwandaka kwikila, mpe vwandaka sambila Nzambi mosi. Beno me mona? Kasi bawu vwandaka ve na bidimbu mpe mambu ya ngitukulu yina vwandaka landa bawu! Israël vwandaka na Nyoka ya Kisengo, Ditadi yina bulamaka, kyese ya Ntinu, kubeluka ya Kinzambi, baprofete, nyonso kaka *awa*. Mpe bawu vwandaka ve, bawu vwandaka na binkulu kukondwa—kukondwa lusakumunu, Mafuta.

<sup>165</sup> Kima mosi na mwense ya kulala mpe mwense ya ndwenga, bawu zole vwandaka bantu ya kusantisa. Kasi yandi *yayi* vwandaka na Mafuta. Mpe yandi *yayi* kuzwaka ve Mafuta, na yawu bawu tubaka, “Beto kele mbote mutindu beno kele.” Ya kele. . . Ata mosi ya beto kele mbote, mutindu ntama ya ke tala beto. “Mbote, beno kele nkonga ya ba-exalté!” Mbote, ya kele ok, uh-huh, ya kel nyonso kieleka. Ya kele na ata mosi ya beto yina kele mbote, beto nyonso kusumukaka mpe vwandaka ya kukondwa na nkembo ya Nzambi. Kasi mutindu kaka beno ke zaba Yawu, ya kele ve na kukumaka ya dibuundu, ve na kumeka na kuzinga mbote, kasi na yina beno ke kuzwa Klisto. Ya kele ve yina mu ke zinga; ya kele yina Yandi vwandaka. Ya kele ve yina mu kele; ya kele yina Yandi kele. Yandi kumaka munu ti mu lendaka, na nzila ya lemvo ya Yandi, kukuma Yandi, Mwana ya Nzambi. Beno ke mona yawu?

<sup>166</sup> Ntangu yayi, mwense ya kulala, mpe mwense ya ndwenga na Mafuta na mwinda ya yandi. Ntangu yayi, na mbala mosi, kuna wakanaka makelele, “Beno tala, Bakala ya makwela ke na kwiza, beno basika na kukutana Yandi!” Mpe bawu kuvumbukaka. Kasi na yina bawu kusalaka, yandi *yayi* zolaka kota samu ti bawu vandaka na mafuta na mwinda. Yina vwandaka luswaswanu.

<sup>167</sup> Yandi *yayi* zolaka kota ve, kisika ya vwandaka ve na Mafuta na mwinda; bawu vutukaka kuna samu na kusambila, samu na kuzwa Mpeve-Santu. Kasi, na yina bawu kwendaka, nyonso manisaka. Ba-dénomination ke tuba, “Mbote, ya lendaka ti beto kele na foti. Mu banza beto ke sala mbote na kuvutuka, na kusosa mbotika ya Mpeve-Santu.” Ya kele yina bawu ke na kumekaka na kusala ntangu yayi. Beno talaka yawu? Ba-Presbytérien. . . Beno kanga bande ya beno minuti, mu ke zola ve kutanguna nkumbu yayi. [Kisika ya mpamba na bande—Mu]. . . ? . . . Kento ya makwela ke kwiza. Mpe, mbote, wapi mutindu pene kele nkwezulu ya Yandi kuna, ntangu bawu ke banda ntangu yayi

na kumeka na kutekisa! Mbote mingi, beno vutula bande ya beno Gene. Ntangu yayi, beno me bakula yawu? “Na yina bawu kwendaka na kusumba,” bawu ke na kumekaka kusumba ntangu yayi, mabuundu nyonso ke na kumekaka na kuzwa réveil, réveil; ya ke na kumekaka na kuvutuka.

168 Ntangu yayi, ata na Mulongisi Billy Graham, yina sonikaka *Héraut de la Foi*, beno monaka yawu, ya Chicago, mpe yandi tubaka “Beto lenda manga ve mouvement ya Pantekote.” Beno me mona? “Beto lenda ve kuma-...bawu, samu ti bawu kuzwaka bantu mingi yina ndimaka na kati ya mvula kulutila na mabuundu nyonso yankaka ya kuvukana.”

169 Ya kele kaka kieleka tiya yango yina ke na kupelaka, ke na kuningisaka yawu, ke meka, ke losa filet mpe ke benda. Mpe ntangu beno ke losa filet... Yesu tubaka, “Kimfumu ya Nzambi kele mutindu muntu me kwendaka mpe me losa filet na mubu, mpe ntangu yandi me benda, yandi me kuzwa bamfulututu, banyoka, bampangu, banyoka, nyonso yankaka, kasi yandi kuzwaka mwa mbisi, mpe.” Ya kele yina nsangu ya Pantekote ke na kusalaka, ya ke na kukombaka ntoto; na kulosaka yawu mpe kubenda, beto ke na kuzwaka bamfulututu, ba-langouste, bankala-bumi, mataka, ba-loutre, ba-grèbe, mpe nyonso yankaka na kati kuna. Kasi yinki ya kele, ya kele na mwa mbisi kuna, mpe. Ya kele bayina kele ya Mfumu.

170 Mbote mingi, samu na bayankaka ya beno bankundi ya lukwikilu ya misiku na bande yayi, bayina ke zola kunyengisa yawu: Na wapi ntangu bawu kumaka mbisi? Ntangu filet kwendaka na bawu? Bawu vwandaka mbisi na mbandukulu! Ya kele kieleka. Ya kusoola kubanda mbandukulu ya yinza! Bawu ata mbala mosi ve kotaka kaka na kusadila ya Mfumu.

171 Beno tala dikototo. Beno baka dikototo ya ntama mpe beno losa yandi na simu, kaka “wop, wop” mbala mosi ke vutuka na maza.

172 Mpe langouste ya kuvwanda kuna, ke tuba, “Aha, ya kele nkonga yaba-exalté.” Kuna yandi ke vutuka, “Ah—ah—ah—ah—ah. Oh, ve!” Ke vutuaka kaka na poto-poto na ngolo mutindu yandi lendaka kwenda. Ya kele kieleka.

173 Nyoka ya mawa yina ke bula mpyelolo mwa fyoti, “Mu ke kwikila ti bilumbu ya bimangu me luta, Mulongisi *Kingandi* mpe *Kingandi* tubaka na munu.” Yandi ke tuba, “Ah—ah—ah—ah—ah—ah—ah, beno lenda vuna munu ve!” Kuna yandi ke kwenda, kaka dyaka kuna, beno me mona.

174 Nyoka, na kubanda! Dikototo, na kubanda! Paul ke tuba na Biblia, mutindu ya bawu, yandi tubaka, “Bawu basikaka na beto samu ti bawu vwandaka ve ya beto na kubanda.” Beno me mona? Uhm! Mbote mingi, mwense ya kizoba.

175 Mwense ya ndwenga na Mafuta na minda ya yandi, yandi vwandaka ya kukubama.

<sup>176</sup> Ntangu yayi, “na yina yandi vwandaka kwenda na kuzwa mwa Mafuta,” ya kele yina bawu ke na kumekaka na kusala ntangu kaka yayi. Mabuundu yayi ya nene ya ba-evangéliste, ke na kumekaka na kuzwa bima ya nene yayi, beno zaba, mpe kusala . . . kuvutuka na Biblia, kuvutuka, “beto kele na nsatu ya Lusakumunu ya Pantekote.” Mbote, beno lenda banza mutindu ya kusalu bawu ke kuzwa, beno me mona. Bawu ke kulumuka ve kuna mpe kubebisa manicure na zulu ya bawu, mpe nyonso ya yina. Oh, ve. Bawu ke bima ve ba-club mpe bimvuka ya bawu mpe nyonso mutindu yina. Na kukangaka yinza mutindu Esau, na diboko mosi, kumeka kusimba Nzambi na yankaka yina. Beno lenda sala yawu ve. Beno lenda vwanda ve Muklisto ya meso ya kubaluka, na kutalaka na Nzambi mpe na yinza mpe. Beno fwana kutula beno mosi na kati-kati na Calvaire, beno vwanda kaka kuna na Yawu.

<sup>177</sup> Ntangu yayi, kasi kuna bawu ke kwenda, mpe bawu ke meka na kuvutuka. Mpe beno bambuka moyo mutindu pene beto kele! Na ntangu kaka ti bawu kwendaka na kusumba, ya kele ntangu Bakala ya makwela kwizaka.

<sup>178</sup> Oh, Mpangi ya bakala Stricker, beto kele pene kuna! Beto kele kieleka pene ya Yinzo. Oh, mosi ya basuka yayi:

Mpungi ya Mfumu ke wakana, mpe ntangu ke  
vwandaka dyaka ve,  
Mpe suka ke talana ya Seko, ke lezima;  
Ntangu baya Yandi ya kuvuuka na ntoto ke  
vukana na Yinzo ya bawu na lweka kuna na  
manima ya dizulu,

Wapi ntangu yawu ke vwanda!

<sup>179</sup> Inga, mwense ya kulala. Ke . . . Mwense ya kulala ntangu yayi, beno ke zola kubaza yinki ke kuma kento yango. Ya kele yawu? Ya kele na kima mu ke zola kubangula. Yinki ke salama na mabuundu yayi? Yinki ke salama na bantu yayi yina me sala ndambu ya nzila na klisto, mpe kwizaka ve, to kwendaka ve nzila nyonso na Klisto?

<sup>180</sup> Ntangu yayi na Romains, mu banza, na ya 2:22, Biblia ke tuba, Paul ke tuba, “Kana Mpeve ya Nzambi kele ve na kati ya beno, beno kele kima ve samu na Nzambi.” Beno kele ya organisation kasi ya Nzambi ve. Kana Mpeve ya Nzambi kele ve na kati ya beno, nge kele ve ya Nzambi. Beno me mona. Beno fwana vwanda na Mpeve ya Nzambi samu na kuvwanda Nzambi. Kieleka!

<sup>181</sup> Mbote mingi, tata, “Lukwamusu ya Nene.” Ntangu yayi, ntangu yayi kana beno . . . Bawu fwana lutila . . . Ntangu yayi, beno ke bambuka moyo, Yandi tubaka . . . Ntangu yayi beno “Ba basisaka bawu na ngaanda na mudidi, mpe kuna ke vwanda kudila mpe kukwetisa meno.” Mbote mingi, yina kele

Lukwamusu ya Nene. Mutindu yina ve? Lukwamusu ya Nene! Ntangu yayi, na manima ya Lukwamusu, bantu yango . . .

182 Ntangu yayi, beno bika munu kubaka dyaka yawu awa, ya kele yina bikanaka. Ntangu yayi beno tala! *Awa* kele kitini ya balele. Mbote mingi, kento ke tanda yawu mutindu *yayi*. Ntangu yayi yandi ke kwenda kusala kima samu na yandi mosi, beno zaba, mutindu mosi lele. Ntangu yayi, yayi kele nyonso ya—ya bilele yandi me kuzwa. Ntangu yayi, konso kitini ya yawu kele bilele ya mutindu mosi. Ya kele kieleka?

183 Bawu zole vwandaka bamwense. Beno me mona? Mbote mingi. Bawu vwandaka na lukwikilu na Klisto, na mutindu ya kinzambi, kwendaka na dibuundu, kusalaka bima ya mbote, kukabula, ba zolaka tuba kima ve na yina me tala bawu mpe nyonso. “Mu zaba bisalu ya nge,” Yandi tubaka bawu na konso nsungi. “Mu zaba bisalu ya nge, kasi dyaka kima nge kele dyaka.” Beno me mona?

184 Ntangu yayi, ntangu kento . . .yandi ke sala na dibanza ya yandi wapi mutindu ya modele awa, mpe yandi ke sala na dibanza ya yandi wapi mutindu yandi ke zenga modele yayi, na wapi kisika yandi ke zenga yawu. Ya kele kieleka? Mbote, yandi ke kuzwa yina yandi ke banza kele ya kulunga mpe kitini ya mbote ya—ya modele. Ya kele kieleka? Samu ti ya kele lele mosi, kasi yandi ke tanda yawu mutindu *yayi* mu banza to mutindu *yina*, yandi ke tanda yawu na yisi. Na manima yandi ke baka basizo ya yandi mpe yandi ke zenga yawu. Ntangu yayi, yina ke bikana kele ya kubokila “yina me bikana.” Mbote mingi. Ntangu yayi, yinki kele modele yayi? Wapi mutindu ya kuzabanaka? Na nzila ya yina . . .kisika yina kento soolaka na kuzenga yawu.

185 Nzambi, ntete mbandukulu ya yinza, Yandi yina zabaka nsuka kubanda mbandukulu na luzabu, Yandi *soolaka* kisika ya kuzenga. Yandi zabaka luswaswanu na kati-kati ya Esaü mpe Jacob. Yandi zabaka luswaswanu na kati-kati ya musumuki mpe santu. Yandi zabaka luswaswanu. Yandi zabaka mitifi ya konso ntima, na yawu Yandi soolaka beto ntete mbandukulu ya yinza mpe tulaka bankumbu ya beto na Buku ya Luzingu ya Mwana-dimeme; mpe dyaka Mwana-dimeme yina zolaka kufwa (mpe tulaka bankumbu ya beto *ntete* Yandi kufwa), mpe Biblia ke tuba ti Klisto vwandaka Mwana-dimeme yina ba kufwaka ntete mbandukulu ya yinza. Mpe bankumbu ya beto kutulamaka na Buku ntangu Yandi—ntangu Yandi vwandaka ya kusoola ntama kuna na kuvwanda Mwana-dimeme samu na kufwa, beto vwandaka ya kusoola na kuvwanda bayina ti Yandi zolaka kufwa. Beno me mona yawu?

186 Ntangu yayi, bawu nyonso kele bamwense. Ntangu yayi, *awa kele* ndambu yina bikanaka, ya kulosa ve. Oh, ve. Yandi ke bumba yawu, kasi ke tula yawu na kisika, yandi lenda sadila yawu na kima yankaka. Beno me mona? Kasi ya ke vwanda ve



ya kusadila *kuna*, ya kele Dibuundu yina ba me zenga. Ntangu yayi, bawu fwana telama na lufundusu (samu ti bawu ke lutila na Lukwamusu), ya kele yina bikanaka. Ntangu yayi beno me bakula yawu?

<sup>187</sup> *Awa* ke kwenda Dibuundu, na Yinzo, ya ke kwenda na Yinzo. *Awa* kele yina me bikanaka. Mpe *awa* kele nkama mpe makumi yiya na yiya ya funda na Mongo Sinaï, ba-Juif. Ya kele ve na bakento ya makwela tatu. Huh! Ya kele na Kento ya makwela; bayina bikanaka; mpe nkama mpe makumi yiya na yiya ya funda. Kieleka. Yandi vwanda kudya kima ve kasi Madya Mpeve-Santu kuna, mu banza, na yawu yandi vandaka nyonso ya kulunga, ya vwandaka ve na kima ya yimbi na Jean. Beno me mona? Mpe kuna—kuna bawu kele.

<sup>188</sup> Ntangu yayi, na nsuka ya ntangu, bantu yikwa zaba ti Biblia ke tuba ti “basantu ke sambisa ntoto”? Paul ke tuba yawu. Beto luta ntangu yayi na—na Buku ya Daniel mpe kubaka Kiti ya kimfumu ya Mpembe. Beto lenda baka yawu na Apocalypse kasi mu zola kubaka yawu na Daniel, ya kele kima mosi. Daniel 7, mpe beto ke simba Kiti ya kimfumu ya Mpembe ya Lufundusu awa. Beto banda na nzila ya 8 ya kapu ya 7 ya Daniel:

Mpe *mu vwandaka tanga mampoka, mpe, beno tala, kuna me basika na kati-kati ya bawu dimpoka mosi ya fyoti, na yina na ntuala ba katulaka mampoka tatu ya ntete na misisa: (Ntangu yayi, beto zaba beto kele na Rome kuna, ntangu yayi. Beno me mona?) mpe, beno tala, na dimpoka yayi vwandaka meso . . . ya muntu, (Ntangu yayi, beno bambuka moyo, dimpoka yayi kuzwaka ve yimpu, ya vwandaka kima ya mayela ya yimbi. Mampoka yankaka kukitukaka na bibulu. Yayi vwandaka mayela ya yimbi, ya vwandaka muntu, pape na kisika ya mumpani, beno me mona.) mpe yinwa yina vwandaka zonza bima ya nene.*

<sup>189</sup> Ntangu yayi beno tala mbote, nzila ya 9:

*Mu vwandaka tala na yina ba vwandaka tula bakiti ya kimfumu, (Ya kele nsuka ya bimfumu nyonso ya Bantu ya makanda. Profete yayi ke na kuzonza. Ntangu yayi beno bambuka moyo, mosi na mosi ya bima yango yandi tubaka me sala kaka na kima ya nsuka yayi, beto ke na kuzonzila yawu landila disolo yina beto ke na kuzonzila.) . . . nani . . . vwandaka—vwandaka tula, mpe Kuluntu ya bilumbu vwandaka, yandi yina bilele vwandaka mpembe mutindu mvula ya mpembe, (Beno zaba nani ya vwandaka na nkokila yankaka yina na vision yina? Yesu.) mpe nsuki ya yintu ya yandi vwandaka mutindu . . . mika ya kuvedila: mpe kiti ya yandi ya kimfumu vwandaka mutindu mulaka ya tiya, mpe makulu ya yandi mutindu tiya ke na kuzikaka.*

Mpe nzadi mosi ya tiya vwandaka luta mpe vwandaka basika na ntuala ya yandi: mafunda na mafunda sadilaka yandi, (Ya kele Dibuundu yina ke na kuvutukaka na Yandi, beno me mona.) mpe mafunda makumi na bambala mafunda makumi telamaka na ntuala ya yandi: (Ya kele Kento ya makwela ke kwiza, mpe bayina bikanaka na yinza.) mpe bazuzi vwandaka, mpe babuku kuzibukaka.

. . . bazuzi vwandaka, mpe babuku kuzibukaka.

Mpe mu talaka bawu samu na ndinga ya bampova ya nene yina dimpoka vwandaka zonza: mpe mu talaka mpe tii ba kufwaka kibulu, mpe nzutu ya yandi kubekaka, mpe pesamaka na tiya na kuzikaka.

Mpe na yina samu na bayankaka ya kibulu, ba katu- . . . bayina kuzwaka kuyala ya bawu (Mu zola kutuba) . . . bayankaka ya bibulu (Mu zola kutuba), ba katulaka bawu kuyala ya bawu na bawu: mpe kasi ba bwelaka bawu baluzingu na nsungi mpe ntangu mosi.

<sup>190</sup> Ntangu yayi, bazuzi kuvwandaka mpe Babuku vwandaka ya kuzibukaka. Ya kele ntangu Kento ya makwela ke vutuka mpe ke vwanda na lufundusu, mpe Dibuundu yina ba me soola. . . Dibuundu yina bakamaka ke vutuka na manima ya bamvula yango makumi tatu mpe ndambu, mpe na manima ya ntangu. . . Mpe kuna na Apocalypse ya ke pesa yawu, ke tuba ti—ti “bayankaka ya kufwa ke zinga dyaka ve funda ya bamvula.” Beno, bantu yikwa ke tanga yawu? Bambala mingi, mingi. “Ke zinga ve funda ya bamvula.” Yesu ke vutuka na Kento ya makwela, na Kento ya makwela.

<sup>191</sup> Ntangu yayi beno bambuka moyo, mutindu mu tubaka, nyonso kele na tatu. Nkwizulu ya Yandi kele na tatu: mbala ya ntete, Yandi kwizaka samu na vulusa Kento ya Yandi ya makwela; mbala ya zole, Yandi ke kwiza samu na kubaka Kento ya Yandi. Mutindu dyambu ya luzolo, ke kwiza mpe ke kwiza baka yandi na kati-kati ya mpimpa, ke nata yandi ntama ya yinza, “ke kutana Yandi na zulu.” Nkwizulu ya masweki ya Mfumu, beno me mona. Mbala ya zole Yandi ke kwiza, ya kele samu na kuyamba Kento ya Yandi. Mbala ya ntete, samu na kuvulusa Yandi; mbala ya zole, samu na kuyamba Yandi; mpe mbala ya tatu, na Yandi, Ntinu mpe Ntinu ya kento!

<sup>192</sup> Mpe awa Yandi ke vutuka samu na lufundusu na bayinsi. Paul tubaka, “Mosi ya beno nyonso ke kwendaka na bazuzi ntangu yandi kele na dyambu na mpangi yankaka? Beno lenda kipe ve bima ya fyoti yayi, beno zaba ve ti basantu ke fundisa ntoto?” Beno tala lufundusu yina kupesamaka na Klisto mpe nkonga ya Yandi; bawu kele baavoka na barre, mpe kuna Yandi ke vwanda na kiti ya kimfumu. Beno tala Kento ya makwela, avoka.

193 Mpe beno tala bayayi kukwiza. Babuku kuzibukaka, mpe Buku yankaka yina kele buku ya Luzingu.

194 Ntangu yayi, Buku ya ntete vwandaka Buku ya misumuki, bayina ba losaka. Mbote mingi. Bawu kele ya kufundisa na kubanda. Beno tala—beno tala bankombo. Bawu kele na ata siansi, beno me mona, bawu kele misumuki na kubanda. Mbote mingi, ntangu yayi, ba me losa bawu.

195 Mpe samu na mameme, bawu telamaka na lufundusu. Bawu zolaka vwanda ya kufundisa, mpe basantu zolaka fundisa bawu. Nzambi kele ve ya kukondwa kieleka. Kana mimpani kele na yinsi, mpe beto ke na kutunga bayinzo ya nene ya wolo ya santu ya nana mpe kumi ya ba-dollar awa na Amerika na kisika ya kunata Nsangu na bawu kuna, Nzambi ke tula yawu na zulu ya beto, kasi ke bumba bawu. Kieleka! Nzambi kele ve ya kukondwa kieleka.

196 Beno—beno awa, kana beno ata mbala mosi ve me monaka Yayi ntete, ba lendaka tula yawu ve na zulu ya beno—ya beno, kasi ba ke tula yawu na zulu ya beno ntangu yayi! Beno me mona? Beno nyonso kele na kizitu. . . Mpe beto kele na kizitu ya kunata Nsangu, ya kele na zulu ya yintu ya beno kana beno kuwa Yawu to ve.

197 Ntangu yayi, mimpani ke telama, bantu yango yina kele na ngaanda kuna ke na kusambilaka na maziamu. Bawu zaba ve ya kulutila mbote. Bawu zaba ve kima na yina me tala Yawu. Nzambi kele ve ya kukondwa kieleka, Yandi ke fundisa bawu ve kana ti bawu kuzwaka siansi. Mpe ba ke pesa bawu kisika.

198 Mpe mutindu mosi na Dibuundu, ti konso nsungi tii nsungi ya dibuundu yayi, katuka—katuka Ephèse tii yisi na yisi *awa*, Nsangu, Nsangu ya kieleka ya Klisto mutindu Yawu vwandaka na mbandukulu (mbotika ya Mpeve-Santu, ngolo, mvumbukulu, kuzonza na bandinga, kutendula bandinga, makabu ya kubeluka, mbotika na Nkumbu ya Mfumumu Yesu, bima nyonso yina Yandi longaka), mosi na mosi ya bawu yina kele Kento yango ya makwela ke telama mutindu avoka.

199 Beno tala dyambu ya muntu mosi: “Nge kuzwaka lukutakanu na *Yayi-mpe-yayi*, nge tubaka na yandi?”

200 Ntangu yayi avoka: “Yinga, mu tubaka na yandi.” Ya kele kuna na Buku, nge lenda manga yawu ve, mabanza ya beto mpe kele na Yawu. Nge me mona? Nge lenda kumanga yawu ve. “Yinga, mu tubaka na yandi ti yandi fwana kuzwa mbotika.”

“Na Jeffersonville, kuna na taberncale, kuna?”

“Yinga, Tata, mu—mu. . . Nge. . .”

201 “Yinga, awa ya kele na Buku, nge tubaka na bawu ti ba *fwana* sala yawu. Bawu fyongoninaka Masonuku mpe talaka ti Yawu vwandaka kieleka, kasi salaka yawu ve.”

202 “Katuka na ntuala ya Munu, nge kisadi ya disumu ya nko, Mu zaba mpe beno ve.” Beno me mona?

203 Ya kele kisika Yandi kabulaka bankombo mpe mameme, beno me mona, ke tula bayankaka na lweka ya kibakala mpe bayankaka na kikento. Kuna ke vutula dyaka bakalasi tatu yayi.

204 Kasi, kalasi *yayi* ke vwanda ata mbala mosi ve na kalasi *yina*, ya kele Kento ya makwela. Mpe, beno tala, Kento ya makwela kele na Yandi na Tempelo. Bayankaka ke sala mpe ke nata nkembo ya bawu na Kimfumu, kasi Kento ya makwela kele ntangu nyonso na Bakala ya makwela. Bayankaka ata mbala mosi ve ke kuzwa kisika; mutindu *bayayi* na yisi awa, bawu ke sala, ba ke losa bawu ve, samu ti Yandi kabulaka bawu mutindu mameme na bankombo. Kasi yandi . . .

205 Kasi nkombo kuzwaka ata luzabu ya Yawu ve, yandi ke kipeke ve na Yawu. Yandi vwandaka nkombo, mpe sepelaka mutindu nkombo, mpe mutindu yina yandi kufwaka kaka mutindu nkombo mpe yina vwandaka nsuka ya yandi. Yina vwandaka nyonso, beno me mona.

206 Kasi dimeme, kana yandi . . . kana Nzambi simbaka yawu ti mu vwandaka ya kutelama kuna na mumpani yina kuwaka kima mosi ata mbala mosi ve. Na yawu kana beno longa Nsangu ya mbote yayi na bantu . . .

207 Mpe mu fwana kutelama. Beno ke bambuka ve moyo na translation ya nene yina Yandi pesaka munu ntama mingi ve me luta, ti mu fwana kutelama kuna na bantu yango mpe—mpe ti mu ke zaba dyambu na yina me tala bawu? Mpe mu monaka mafuku yango ya kutelama kuna, mu tubaka, “Bawu kele bawu nyonso ba-Branham?”

Yandi tubaka, “Ve.” Yandi tubaka, “Ba kele mindimi ya nge.”

Mpe mu tubaka, mu—mu tubaka, “Mu zola kumona Yesu.”

Yandi tubaka, “Ntete ve. Ya ke vwanda na ntangu ntete Yandi kwiza dyaka. Kasi Yandi ke kwiza na nge ntete mpe ba ke fundisa nge landila Ndinga yina nge longaka, mpe bawu ke na kupemaka na zulu ya Yawu.”

Mu tubaka, “Ya ke vwanda mutindu yina samu na bawu nyonso? Paul fwana kutelama?”

Yandi tubaka, “Yinga, Paul ke telama mpe, na nkonga ya yandi yina yandi longaka.”

Mu tubaka, “Mu longaka Nsangu mosi na yina yandi longaka.”

208 Mpe bawu mafuku kutelemisaka maboko ya bawu mpe tubaka, “Beto ke na kupemaka na zulu ya yawu!” Beno bawu yayi, beno me mona, kaka kuna! Yinga. Yandi tubaka, “Kuna kintwadi beto ke vutuka na ntoto na nzutu yina lenda kudya, mpe kunwa, mpe kuzinga kintwadi na nzila nyonso ya bamvula

ya bansungi yina ke suka ve kuna.” Ya kele nkwezulu ya Mfumu. Mbote mingi.

209 Ntangu yayi, kaka minuti. Ntangu yayi...Beto ke na kukumaka fyoti pene-pene ntangu yayi, samu ti ya ke na kukumaka pene...awa na ngunga ya mpangi ya beto ya bakala samu na lukutakanu ya mbotika to nyonso yina yandi ke sadila.

210 Mbote mingi, ntangu yayi, na kati ya nsungi ya dibuundu yayi. Oh, awa kele kima mosi ya kitoko mingi. Mu ke zolaka yayi mbote mingi. Na kati ya bansungi yayi ya dibuundu, ya kele na bampeve zole yina ke sala pene mutindu mosi tii *awa*; mosi kele dénomination, mosi yankaka kele Mpeve-Santu. Mpe Yesu tubaka, “Bawu kele mingi pene ti bawu ke vuna Musolami ya kieleka kana ya lendaka salama.” Bampeve zole yayi ke na kutulaka kidimbu na bantu ya bawu samu na lufundusu na bilumbu na ntuala. Satana silaka ti yandi...ti yandi zolaka kuzwa ya kulutila mingi na Klisto, mpe yandi me kuzwa. Ntangu yayi, beno tala mbote kieleka yayi, kieleka mbote ntangu yayi na yina beto ke kota na yayi: kulutila mingi yawu ke vwanda, kutula kidimbu na bantu.

211 Mingi kele mutindu Eve. Eve kutelamaka mingi samu na kuvunama. Kana yandi telamaka ve, ya zolaka vwanda na ata kuvuna mosi ve. Kasi Eve kutelamaka, mpe ntangu yandi kutelamaka, ya kele kisika yandi kuzwaka kuvuna ya yandi. Na kisika ya kulandila mpe...Beno ke—beno ke landa—ke landa muni mbote ntangu yayi? Beno kuwa! Ya kele samu na yinki Eve kuvunamaka...Beto tuba yawu kintwadi, samu ti mu vwanda ya kukwikama ti beno me kuzwa yawu: “Ya kele samu na yina Eve kuvunamaka, yandi ata mbala mosi ve kubumbaka Ndinga ya kulunga ya Nzambi.” Satana tangaka yandi Yawu, kasi yandi ata mbala mosi ve kutubaka na yandi Kieleka *nyonso*. To dénomination ya yandi. Beno me mona? Kasi yandi vwandaka mingi samu na kuzwa kitini ya Ndinga, mpe bakaka ve Ndinga *nyonso*.

212 Mpe ya kele yina kele dyambu bubu, mwense ya kulala ke vwandaka mingi samu na kuzwa kitini ya Ndinga kasi Ndinga *nyonso* ve. Dibundu na kuzwa kitini ya Ndinga kasi Ndinga *nyonso* ve, mpe bawu vwandaka ya kieleka mpe ya kusungama samu na yawu. Eve kuvunamaka! Biblia ke tuba, “Yandi kuvunamaka.”

213 Adam kuvunamaka ve. Adam zabaka kieleka ti yandi vwandaka sala yimbi; kasi kento ya yandi, na kusalaka bima yina yandi vwandaka sala, yandi kundimisaka yandi na—na kukabula na yandi yina vwandaka ya kuyimina. Mbote, yandi vwandaka bakala, beno me mona, mpe ya—ya vwandaka mutindu yina samu na yandi ti yandi...Beno ke bakula, beno me mona. Yandi zabaka ti yandi vwandaka sala yimbi, kasi Eve vwandaka banza ti yandi vwandaka sala ya mbote.

214 Oh, beno ke mona ve? Ya kele samu na yina Paul kutubaka kento zolaka longa ata mbala mosi ve Nsangu ya mbote. Uh-hum. Yandi vwandaka—yandi vwandaka na . . . Yandi vwandaka yandi yina kuvunamaka. “Mu ke pesa ve muswa na kento na kulonga, to na kubaka na ngolo lutumu, kasi kuvwanda swi.” Beno me mona? “Samu ti—Samu ti ba salaka ntete Adam, mpe na manima Eve. Mpe Adam kuvunamaka ve, kasi kento kuvunamaka, yandi na kuvwandaka na disumu.” Yandi tubaka, “Kasi, ntangu yayi, yandi kele ve ya kuzimbana; yandi ke vwanda ya kuvuuka na kukumaka mama (kana yandi kele na bakala), mpe nyonso yankaka, kana yandi landila, na lukwikilu mpe nkadulu ya kulunga mpe na nyonso ya santu, yandi ke kuzwa mpulusu. Kasi ata mbala mosi ve pesaka muswa na mosi na kulonga to na kubaka na ngolo lutumu!” Beno me mona? Paul tubaka, “Beno kusala yawu ve!” Yandi tubaka, “Ntangu yayi, mu banza ti mu kele na dibanza ya Mfumu,” yandi tubaka.

215 Bawu tubaka, “Mbote, . . . Mbote, baprofete ya ntama kuna kupesaka baprofesi mpe tubaka ti beto beto ‘fwana longa.’”

216 Yandi tubaka, “Yinki? Ndinga ya Nzambi basikaka na beno, mpe ya kwizaka kaka na beno? Kana muntu mosi ke banza na yandi mosi kuvwanda ya kimpeve to profete, ti yandi zaba ti yina mu ke tuba kele Balutumu ya Mfumu.” Beno me mona? Ya kele kieleka. Yandi zabaka yina yandi vwandaka zonzila.

217 Kasi yandi tubaka, “Kana yandi zaba ve, ti yandi zaba kaka dyambu ve. Kaka yina. Yandi—yandi ke zola ve kuwa Yawu, mbote, beno bika kaka yandi kulandila, yandi ke na kukwendaka kaka na dibulu. Beno me mona, kasi kwenda kaka na ntwala.” Kasi kuna, bampeve yango zole.

218 Ya kele samu na yawu. Mutindu bawu kele na bakento ya bapulusu, kuna na babala-bala. Ya kele nsoni samu na dalapo ya Amerika, samu na kutula na ngaanda kuna bamama yayi na bala-bala. Mpe makumi ya mafunda ya babakala kele ya kukondwa kisalu! mbote, ya kele yinsi ya kento, ya kele kisika ya kento, kento ke yala. Ya kele kusambila ya kento. Ya kele mpeve ya kinkulu ya Katolika, na kusambilaka kento mutindu nzambi. Awa kele kaka yina . . . Ya ke na kubakaka kaka kisika, beno ke mona ve dyambu?

219 Ya kele ve na kima mosi yina Nzambi me pesa na bakala ya kulutila mbote na kento, kento ya kieleka. Kasi ntangu yandi ke kwenda ntama na yawu, yandi kele—yandi kele na ngaanda. Ya kele kaka kieleka. Nzambi ata mbala mosi ve kukanisaka bakento na kusala na mosi ya bisika yayi mpe kusala mutindu ya bima mutindu yina. Bakento yayi, beno kele. . . bawu fwana kuzwa bana mpe kusansa bana ya bawu. Bawu kele milongi ya fyoti, mosi na mosi ya bawu, kasi bawu ke salaka kisalu ya bawu ya kulonga na yinzo na bana ya bawu ya fyoti, na kukulisaka bana ya bawu. Mbote mingi.

220 Ntangu yayi, bampeve zole, pene mutindu mosi. Kaka mutindu Eve, pene na . . . Mbote, Satana, yandi tubaka, “Nzambi tubaka . . .”

“Uh-hum.”

“Nzambi tubaka . . .”

“Uh-hum, ya kele kieleka.”

“Nzambi tubaka . . .”

“Uh-huh.”

221 “Nzambi tubaka, kasi, oh, kieleka Yandi ke fundisa beto ve kana beto kele ya kubotama na nkumbu ya, ‘Tata, Mwana, Mpeve-Santu.’ Yina ke vwanda kaka ve mutindu ya mbote?” Nge muntu ya luvunu ya kukonda! Yinga, tata. Nzambi ata mbala mosi ve tubaka *yawu*!

222 Ya kele ve na kima ya mutindu, na mutindu nyonso. Ya kele ya kufwa! Ya kele ve na kima ya mutindu! Beno tuba na muni kisika nkumbu ya “Tata, Mwana, mpe Mpeve-Santu” kele. Ya kele ve na nkumbu ya mutindu, na yina ya kele ya kufwa! Wapi kisika ya katukaka? Na *Sardes*, dibuundu ya “kufwa”. Ya kele ve na kima ya mutindu! “Nge kele na nkumbu na yina nge ke na ‘kuzingila,’ mpe nge ke tuba ti nge kele ‘dibuundu ya Klisto,’ kasi nge kele ya kufwa!” Ya kele kieleka, ya kele ve na kima mutindu nkumbu ya “Tata, Mwana, Mpeve-Santu.”

“Oh, mbote, yina ke vwanda kaka ve mutindu mbote?”

223 Mpe ve, Paul tubaka ya ke simba ve; yandi tubaka, “Beno kuzwaka Mpeve-Santu tuka beno kwikilaka?”

“Beto zaba ve kana ya kele . . .”

224 Yandi tubaka, “Na yina wapi mutindu beno kubotamaka?” Yandi tubaka, “Beno kwiza mpe beno kubotama dyaka na Nkumbu ya Yesu Klisto!” Yandi tubaka, “Kana wanzio katuka Mazulu, na kulongaka kima yankaka, ti yandi kuvwanda ya kusinga!”

225 Ya kele kieleka! Mu kele kaka na kizitu ya kutuba Yawu. Beno me bakula, ya kele ve mingi samu na beno, ya kele na babande yayi mu ke na kuboka, beno me mona, samu ti mu zaba kisika yawu ke kwenda (bisika nyonso), mpe na yawu ya kele yina ya kele. Mbote mingi. Ya kele ve . . .

226 Eve kuvunamaka, yandi monaka kitini ya Ndinga. Moab kuvunamaka. Mwense ya kulala kuvunamaka. Dibundu ke na kuvunamaka. Ba-dénomination ke na kuvunamaka. Beno me mona?

227 Beno vwanda na Ndinga! Nzila kele kaka Yawu. Vwanda kaka na Yawu, beno ningana ve na mosi ya Yawu. Beno vwanda kaka na Yawu, beno kwenda kaka na yina Nzambi ke tuba kusala. Ata yina muntu nyonso yankaka ke tuba, kangama na banzila ya Nzambi.

228 Ntangu yayi, mwense ya kulala, yandi zimbisaka kisika ya yandi, beto zaba yawu. Yandi ke kwiza na lufundusu. Mpe kana yandi kuwaka kaka Kieleka, yandi kele ya kubedisa. Ya kele kieleka. Beno ke kuzwa Yesu ata kisika kasi kisika beno bikaka Yandi.

229 Judas zolaka kwiza. . . Beno bambuka moyo! “‘Bamwense ya kulala’ beno ke tuba, ‘lendaka twadisama na dyabulu?’” Kieleka! “Ke zinga dyaka ya kutsyema?” Yinga, tata. Judas vwandaka; ya kuvulusa, ya kusantisama, kulongaka kubeluka ya Nzambi, basisaka bampeve ya yimbi. Mbote, yandi kele kaka ya kusungama, na kutala kima mosi na bayankaka ya bawu kuvwandaka. Kasi ntangu ya kumaka na Pantekote, ya kele kisika yandi lakisaka bantinta ya yandi. Yandi kuzwaka ve Mpeve-Santu, mpe yandi balulaka bikobi ya yandi mpe mangaka Mfumu Yesu. Ya kele kieleka yina mabuundu salaka. Ntangu ya kumaka Lusakumunu ya Pantekote, bawu kwendaka ntama na Yawu. Oh, beno ke mona yawu ve, kalasi?

230 Oh, ntangu yayi na nkokila yayi Ditadi-yimpu ya nene. Kasi ntangu kaka fyoti, mu banza beto kele na mwa ntangu fyoti awa, mu ke zola kubaka kima mosi yankaka. Mu zola ku- . . . nge kidimbu ya kibulu. Kidimbu ya kibulu, beto baka Apocalypse 13, kaka minuti. Apocalypse 13:15, mpe kutanga kaka yina . . . yina yandi ke sala. Apocalypse 13:15:

*Mpe yandi kuzwaka ngolo ya kupesa luzingu na kizizi. . . (Ntangu yayi, yina kele, “samu na mabuundu ya ba-Protestant, mabuundu ya ba-Protestant.”)*

231 Yandi vwandaka na ngolo, samu ti bawu salaka kizizi: mabundu ya ba-Protestant. Na nzila ya Lukutakanu ya Mabuundu, ke sala kisika yina kubundana nyonso ya ba-Protestant ke vukana. Bantu yikwa zaba to me tanga na yinzo ya nene ya Kuvukisa yina kele na bawu samu na mabuundu ya yinza? Kieleka. Beno me mona? Kuna na . . . kuna ntangu yayi, kaka mutindu N.U. ya bayinsi. Mpe bawu nyonso kele kuna, mosi na mosi ya bawu, mpe na ba-Assemblée de Dieu. Bawu kele kuna! Bawu kele kuna, beno me mona. Ya kele yimbwa ke kudya yimbwa. “Mutindu ngulu ke vutuka na poto-poto ya yandi, mpe yimbwa na bilusi ya yandi,” kuvutuka kaka na kima mosi (Kieleka!), mutindu ke manga ntelamanu ya bawu ya bumisyoni. Mpe kuna beno kele, ke zola kuvwanda nene, ke zola kusala mutindu bayankaka ya yinza, mutindu Israël kusalaka ntangu bawu kumonaka bantinu mpe tubaka “pesa beto ntinu.” Beno me mona?

*Mpe yandi. . . salaka kizizi na kibulu, mpe kizizi ya kibulu zolaka zonza, mpe samu ti. . . mingi yina ke zola ve kusambila kizizi ya kibulu. . .*

232 Kizizi ya kibulu, “dénomination ya ba-Protestant,” ve Katolika. Yayi kele Amerika Yandi ke na kuzonzilaka awa, beno



me mona, samu ti kapu ya 13 yayi kele samu na Amerika, kibulu yina basikaka na... Beno me mona, bibulu nyonso yankaka kubasikaka na *maza*, yina zola kutuba “bantu mingi mpe bantu ya lutangu ya nene.” Kasi kibulu awa, yawu mataka mutindu mwana - dimeme, na ntoto kisika ya vwandaka na bantu; kuvwandaka na mampoka zole, mpe kuna yawu vwandaka zonza mutindu dalango. Mpe bawu kusalaka kizizi na kibulu yina vwandaka Europe, mpe salaka yayi na lweka awa kizizi na yawu. Kuvu-... na kuvukisaka mabuundu kintwadi mpe na kusalaka kubundana yayi ya ba-Protestant, mpe kuna bawu ke benda na ngolo mabuundu nyonso yankaka, ti bawu lendaka mpe ve kusumba to kutekisa to kima mosi ve yankaka kukondwa bawu kuzwa kizizi yayi samu na kibulu.

233 Ntangu yayi beno tala mbote yina ke salama awa:

*Mpe yandi salaka bawu nyonso, ... kuluntu, mvwama... mputu, ya kimpwanza... ya mpika, na kuzwa kidimbu na diboko ya bawu ya lubakala, to na mbunzu ya bawu:*

*Mpe ti muntu ve lendaka sumba to kuteka, tii... yandi yina kuzwaka kidimbu, to nkumbu ya kibulu, to lutangu ya nkumbu ya yandi.*

*Awa kele ndwenga. Ti yandi yina kele na lubakusu kutanga balutangu ya kibulu: samu ti ya kele... lutangu ya muntu; mpe lutangu ya yandi kele Bankama sambanu na makumi sambanu mpe sambanu. (Yina beto zaba nani ya kele; ya kele bukimfumu ya Rome: pape.)*

234 Mu vwandaka kaka kuna mpe mu monaka yawu munu mosi, mu vwandaka zola, kuzaba kisika ya yandi (kiti ya yandi ya kimfumu, mutindu ya vwandaka) mutindu ba tulaka Boniface ya ntete, ya III, kuna na ntonono ya nsungi ya Katolika *awa*. Mpe na zulu kuna ya kele *Vicarivs Filii Dei*, yina zola kutuba “vicaire ya Mwana ya Nzambi.” *Dei, Dei*, “Bunzambi,” beno me mona. Beno me mona, “Vicaire ya Mwana ya Nzambi.” Na bampova yankaka, “Kaka mutindu Mwana ya Nzambi ya kuvwanda awa na zulu ya ntoto,” beno me mona, “bangolo nyonso samu na kusoba Biblia,” ke soba nyonso yandi ke zola. Na yawu, “Ke tuba, ‘Beto ke pesa nge mbote Marie!’” Yinki pape ke tubaka? “Beto ke sala ‘Beto ke pesa nge mbote Marie!’” Yina ke sukisa dyambu. Uh-huh, uh-hum. “Mbote, beto ke sala *yayi-mpe-yayi*.” Yina pape ke tuba, ya kele yina, ya kele yina. “Vicaire na kisika ya Mwana ya Nzambi.”

235 Kaka ntama mingi ve bawu kuzwaka dogme yina “Marie kuzikamaka ve,” (Mpe bawu kuzwaka ndyamu ya yandi mpe nyonso ya kusonika kisika ba zikaka yandi.) Ba tubaka, “Ve, yandi vumbukaka dyaka mpe vumbukaka.” Pape tubaka, “Ya kele yawu!” mpe ya kele kaka yawu. “Ya kele ya kukondwa

kubwa, beno me mona,” pape tubaka mutindu yina. Beno me mona, “Vicaire ya Mwana ya Nzambi.”

<sup>236</sup> Mpe ya ke tuba, “Ntangu yayi, muntu yina ke zola kuzaba nani kibulu kele, kisika ngolo yayi me katuka,” Ya kele ya kutuba, “tanga balutangu kuna mpe ti yandi yina kele na ndwenga . . .” Kuna, ya kele mosi ya makabu ya Mpeve-Santu, ya kele ndwenga. Beno me mona? Ti yandi yina kele na ndwenga kutanga balutangu ya muntu, samu ya . . . tanga balutangu ya kibulu, samu ti ya kele lutangu ya muntu, mpe lutangu ya yandi kele bankama sambanu mpe makumi sambanu na sambanu. Ntangu yayi, beno baka . . . mpe beno tanguna nkumbu yina, V-i-c-o, mpe—mpe kaka landila bampova, mpe beno sala nzila na yisi awa mpe . . . to beno bwela balutangu ya Rome, mpe beno ke tala awa beno ke kuzwa bankama sambanu mpe makumi sambanu na sambanu. Ya kele kieleka.

<sup>237</sup> “Mpe ntangu yayi beto sala kizizi na kibulu yango.” Mpe kuna na yinsi yayi bawu salaka kizizi: kuvukana ya ba-dénomination kintwadi, ba-Nicolaïte ke na kuvukanaka mpe ke na kusalaka dénomination bawu mosi. Mpe na nsuka ke vukisa bumpangi ya yandi, ve na kukuma mutindu Katolika, kasi bawu ke vukana mutindu bumpangi samu na kumeka na kufwa Communisme.

<sup>238</sup> Mpe Biblia ke tuba ti Nzambi telemisaka Communisme samu na kuvutula yimbi na bayinsi samu na yina bawu salaka na bana ya Nzambi. Ya kele kaka kieleka. Yandi tubaka, “Mpe bawu—bawu—bawu kupesaka ngolo ya bawu mpe nyonso na kibulu samu na ngunga mosi, mpe samu na kuvutula yimbi ya bantu, . . . ya menga yina bawu kubasisaka.” Mpe ntangu bombe atomique to nyonso yina ya kele ke bula Mbanza yango ya Vatican, mpe bukumfumu ya Rome ke vwanda dyaka ve, Ya kele ya kutuba, “Mpe na kati ya yandi ba kutalaka menga ya konso martyr yina vwandaka ba kufwaka na yinza.” Mpe kuna yandi kele. Mpe awa kele kizizi na yawu, kuvukana ya mabuundu.

<sup>239</sup> Ya ke vwanda ntama mingi ve ti beto fwana kanga myelo yayi kuna, ya kele kieleka, to kubaka kidimbu ya dénomination. Mpe beto ke kanga myelo, ya kele kieleka, beto ke . . . beto zaba ya kulutila mbote na yawu.

<sup>240</sup> Ntangu yayi, awa, mu zola, kaka samu na kuvukisa kitini, ntete beto kwenda na baminuti fyoti ke landa. Ntangu yayi, *kidimbu* ya Nzambi kele “Mpeve-Santu.” Beto nyonso zaba yawu, ve? Mbote mingi, beto nyonso zaba yawu, ti kidimbu ya Nzambi kele Mpeve-Santu. Ntangu yayi ya ke talana . . . Beno baka Apocalypse 9—9:1 na 4, beno ke tala ti bawu nyonso vwandaka na kidimbu na mbunzu ya bawu. Ya Ntete ya Corinthiens 1:22, Paul kutubaka, “Na yina Yandi tulaka beto kidimbu na nzila ya Mpeve-Santu ya Yandi tii kilumbu . . .” Ephésiens 4:30, ke tuba, “Beno nyongisa ve Mpeve-Santu,” ya

kele Wanzio yango yina kwizaka na kutulaka kidimbu na zulu ya mbunzu ya bawu. Ntangu yayi, yina ke zola ve kutuba beno . . . Yandi ke baka mpe ke tula ditona na zulu kuna; mbunzu ya beno kele luzayikisu ya beno, beno me mona, mpe diboko ya beno kele kima beno ke sala na yawu. Beno me mona, ya kele kidimbu ya kimpeve. Beno me mona? Yandi ke baka ve kinyemo ya nene mpe ke nyema beno mutindu *yina*. Oh, ve.

<sup>241</sup> Mutindu awa bamvula fyoti me luta bawu vwandaka tuba, ntangu N.R.A. kubasikaka, ya vwandaka *yayi*, *yina* to . . . Beno sosa yawu ve, ya kele yimeni. Biblia ke tuba ti ya bandaka ntama kuna, ya kele pene me manisa ntangu yayi. Beno me mona? Ya kele kieleka.

<sup>242</sup> Kasi Yandi kutulaka kidimbu na bayina vwandaka ya Kukangama. Beno me mona? Ntangu yayi, wapi mutindu vwandaka—wapi mutindu vwandaka kidimbu ya ntete, wapi mutindu ya vwandaka talana? Ba vwandaka ya kifuluka na Mpeve-Santu, ya kele kieleka, mpe bisalu ya bawu vwandaka bisalu ya Klisto. Bawu vwandaka tentika maboko na zulu ya bantu ya kubela mpe bawu kuzwaka bamvimpiki ya mbote, bawu salaka mitindu nyonso ya bidimbu mpe bimangu mpe mambu ya ngitukulu. Mpe na mbunzu ya bawu, vwandaka ya kutula kidimbu na nzila ya luzayikisu ti Yandi vwandaka Mwana ya Nzambi, mpe bawu vwandaka—bawu vwandaka sala na Yandi (Bunzambi ya Klisto), beno tala kidimbu.

<sup>243</sup> Beno ke tuba, “Mbote, ntangu yayi, Yandi kele muntu ya tatu, to mun- . . . ya zole” Beno kele ntete ve ya kutula kidimbu, na yawu beno bika kaka—kaka Yawu swi. Beno me mona, beno kele na lweka, beno kele na ngaanda ya mukanda kuna, na yawu kuna ya kele ve na kima ya mutindu yina na Biblia. “Beto ke sakumuna . . . Beto ke kwikilaka na butatu ya santu.” Beno kele ntama . . . Beno kele kaka ve na zulu ya mukanda ntangu yayi, beno me mona, samu ti ya kele ve na kima mutindu *butatu* ya kutuba na Biblia. Beto kuzwa mpova *butatu* na Biblia mpe beno kwiza.

<sup>244</sup> [Kisika ya mpamba na bande—Mu.] . . . ? . . . na Mwana, ba me bokila bumwana; ntangu yayi Yandi kele na kati ya beno, mbotika ya Mpeve-Santu; Nzambi mosi. Mpeve-Santu vwandaka Tata ya Yesu Klisto. “Na mwa ntangu fyoti mpe yinza ke mona dyaka Munu ve,” tubaka Yesu, “Mu me katuka na Nzambi, mpe Mu ke na kuvutuka na Nzambi (Mpeve-Santu dyaka). Mpe Mu ke vwanda na nge, mpe na kati ya beno, tii nsuka (na nsuka). Nzila nyonso tii na yisi, Mu ke vwanda kaka na beno mutindu yina kisika . . . Mpe bisalu kaka yina Mu ke sala beno ke sala mpe. Bima yina mu vwandaka sala ke landila kaka, ya ke vwanda kidimbu ya mukwikidi nzila nyonso. Beno kwenda mpe beno longa, mpe beno botika bawu na nkumbu ya Mfumu Yesu, mpe bawu ke fuluka na Mpeve ya Munu; mpe kana bawu kele, bidimbu yayi ke landa bawu yina ke kwikila, tii

nsuka ya yinza. Mu kele na beno ntangu nyonso, mpe tii nsuka ya yinza.” Ba yambaka Yandi na Nkembo. Ya kele yawu, mpe beto ke na kuvingila Yandi kuvutuka kilumbu. Ntangu yayi, beno tala Kidimbu ya Nzambi, beto zaba yawu.

<sup>245</sup> Mpe beno bambuka moyo, ya kele kaka na nkama mosi mpe makumi yiya na yiya ya funda ya ba-Juif yina me tulama kidimbu, yina vwandaka bayina bikanaka ya ba-Juif. Kasi na yayi, na Kento ya makwela Ya Bantu ya makanda, na Kento ya makwela ya Bantu ya makanda, ya vwandaka na makumi ya mafunda na mafunda, ya bayina kutulamaka kidimbu kuna, samu ti ya kele ba-martyr yango mpe bima yina salamaka na nzila ya bansungi kuna; bawu ke vumbuka na kilumbu ya lufundusu.

<sup>246</sup> Yinki beno ke banza ke salama ntangu makulu yina ya kisengo ya lufundusu kre telama kuna na kilumbu yina mpe ba-martyr yango ke telama kuna na ntwala ya bantu ya Rome yango (ya lendaka vwanda ba-Nicolaite ya ntama kuna bayina zikisaka bawu na binkuku ya bayinti mpe losaka bawu na mabulu ya bankosi mpe nyonso mutindu yina), mp bawu telamaka kuna mutindu avoka ya bawu na lu- . . . na barre ya bazuzi awa? Mpe Zuzi ya kuvwanda kuna na zulu ya kiti, “Nge me longa Nsangu ya mbote na bawu?”

“Mu kangaka luzingu ya munu kuna na yinwa ya nkosi samu na bawu.”

<sup>247</sup> Ooh, mpangi! Nge ke zonzila na “beno katuka na Munu,” difelo ke vwanda mbote mingi samu na bawu! Ya kele kaka kieleka.

<sup>248</sup> “Kangama mingi. Mu zaba bawu yina ke bokilaka bawu mosi. . . (ba-Nicolaite), mpe ke bokila bawu mosi ‘ya kufuluka na Mpeve’ mpe bawu kele ve.” Kuna, beno me mona, beno bawu yayi. Oh! Wapi ngunga ke na kwiza, wapi ntangu ya boma. Nzambi ke vutula yimbi! “Mu ke vutula yimbi,” tubaka Mfumu, “Mu ke pesa musendo!” Mpe konso bisalu ya yimbi ke mona kaka. . . Nyonso yina beno salaka to banzaka na luzingu ya beno ke tulama na beno kuna, na kima ya nene yina ya manietiki na konso dibanza ya yimbi yina lutaka na dibanza ya beno. Beno balula ntima, bana!

<sup>249</sup> Ya kele kaka na mutindu mosi samu na kukatukila yawu, beno kwiza na Klisto, mpe ntangu beno ke kota na lweka ya bamputa ya Yandi ya luzolo tanu kuna, bamputa tanu ya ntalu na nzutu ya Yandi, ntangu beno ke mona kubasika menga yina kuna mpe ke bumbama na kati ya yawu, na kutubaka, “Ditadi ya Bansungi, mu kele mbote ve. Bumba munu, Ditadi ya Bansungi.” Beno kuwa Mpeve-Santu ya ntalu, beno kufwa kaka mpe beno kota kaka na nzutu ya Klisto; beno vumbuka, samu na kuvumbula bima ya malu-malu, ya kele yinza ya malu-malu na kizunga ya beno. Masumu yina beno vwanda zolaka kele na

manima ya beno. Oh, ya kele ve na kima ya bilumbu na ntuala, kima ve ya bubu yayi, lufwa, kima yankaka ve ke kabula beno na Yawu. Beno kele ya kutula kidimbu tii kilumbu ya beno ya mpulusu, na nzila ya Mpeve-Santu. Beno me kuzwa luzayikisu ya Nani Yandi kele. Beno zaba na ntima ya beno beno me luta lufwa na Luzingu.

250 Beno tala mbote bisalu ya beno na maboko ya beno kuna, beno me mona. Beno ke yimba dyaka ve, beno ke sala dyaka ve yimbi. Maboko ya beno kele ya kutsyema na menga nyonso. Mpe beno ke telama, ke longa Nsangu ya mbote, ke tuba yina kieleka, mpe ke zingila na yina kele ya kulunga, mpe ke sala yina kele ya kulunga, mpe Mpeve-Santu na beno ke lakisa bidimbu mpe mambu ya ngitukulu kilumbu nyonso; Nzambi na kubikaka beno kuzaba mutindu, “Nge kele mwana ya Munu ya kusakumuna mpe Mu kele na nge, Mu—Mu kele kaka na nge. Ata kisika nge kele, Mu kele na nge. Mu ke tambula na nge na bangunga ya mudidi mpe bisika nyonso.” Oh, wapi—wapi Kizundu!

Mu me kanga moyo ya munu na kiswamunu ya  
kupema,  
Samu na kusabuka dyaka ve bamubu ya  
kudasuka;  
Oh, kitembo lenda komba mubu ya kudasuka,  
mupepe ya ngolo,  
Kasi na Yesu mu kele ntangu nyonso na  
nkebolo.

251 Mpe lufwa kukwiza kuyimba na ngolo na ziunga mosi ya bilumbu yayi, mpe kudumuka mutindu nyosi na ziunga ya yintu ya beno mutindu yina, beno lenda tuba, “O lufwa, wapi kisika kele ntunga ya nge?”

252 Mutindu mwana Sarah kusonikaka suka yankaka yina, mwana ya munu ya kento ya kuvwanda na manima kuna. Yandi vwandaka baka banote, yandi mpe mwana ya kento ya fyoti ya Mpangi ya bakala Collins, mu banza, na yina me tadila yina mu zolaka tubila. Na yawu mu vwandaka tanga mukanda, mama ya yandi mpe munu, mpe yandi tubaka, “Buku ya ba-revolution.” Amen. Yandi tubaka . . . Mpe beno zaba mwa disolo mu tubilaka na nsuka na yina me tala *lufwa*, beno zaba. Beno me kuwaka yawu, na kuvwandaka dyaka ve *na ntunga*. Beno vwandaka awa ntangu ba tubaka yawu? Beno me mona, lufwa mbala mosi vwandaka na ntunga na yawu, kasi ntangu . . .

253 Satana vwandaka ve ya kukwikama kana Muntu yina vwandaka Mwana ya Nzambi to ve. Beno ke mona yandi ya kutelama kuna ntangu . . . Satana kwizaka na Yandi tubaka, “Mbote, kana Nge lenda sala bimangu, kana Nge kele muntu ke salaka bimangu, Nge kele Mwana yango ya Nzambi. Mu ke tuba na Nge, ya kele ya kusonama na Biblia, beno me mona, ti . . . Mpe—mpe kana—kana Nge kele, ti mu mona Nge kusala

kimangu. Ntangu yayi, Nge kele na nsatu, Nge me kudya ve ya me kuma bilumbu makumi yiya, samu na yinki Nge lenda bakave ditadi yina mpe kusala na yawu dimpa mpe kuvwanda na yisi mpe kudya? Ti mu mona Nge kusala yawu mpe mu ke kwikila ti Nge kele Mwana ya Nzambi.”

<sup>254</sup> Yandi tubaka, “Muntu ke zinga ve na dimpa kaka, kasi na Ndinga nyonso.” Oh, la la! Yandi zabaka ti yandi kukutanaka ve Moïse kuna, ve? Moïse kulosaka na yisi balutumu mpe pasulaka yawu; kasi yandi zabaka ti yandi kukutanaka na yina ya kulutila Moïse.

<sup>255</sup> Na yina yandi nataka Yandi na zulu, mpe yandi tubaka, “Nge ke mona bimumu nyonso ya yinza? Kuna kele Etats-Unis, kuna kele Grande-Bretagne, kuna kele bayina nyonso ke telama awa na bamvula ke kwiza.” Yandi tubaka, “Bawu nyonso ke vwanda ya munu, Nge zaba yawu.” (Ya kele yina ke yalaka na yawu.) Yandi tubaka, “Ya kele ya munu mpe mu ke sala na bawu, mu ke fidisa bawu na mvita, mu ke sala nyonso mu zola na yawu. Ya kele ya munu.” Yandi tubaka, “Mu ke pesa nyonso na Nge kana Nge ke sambila kaka munu.”

<sup>256</sup> Yandi tubaka, “Na manima ya Munu, Satana.” Yandi zabaka ti Yandi zolaka vwanda kibiyadi ya yawu na mutindu nyonso, na nsuka, na yawu Yandi tubaka, “Vwanda na manima ya Munu nge, Satana.”

<sup>257</sup> Na nsuka ntangu bawu kuzwaka Yandi kuna kilumbu mosi, mpe bawu—bawu bakaka kinuka mpe tulaka na nziunga ya kizizi ya Yandi mutindu *yayi*, Mu banza kitende ya mvindu ya ntama, mpe kuzwaka . . . kuzungidilaka yawu na yintu ya Yandi. Mpe vwandaka kuna, vwandaka basisa menga mpe vwandaka tala mpasi. Na suka, mupepe ya madidi vwandaka fula. Bawu bulaka Yandi yimeni, mpe menga vwandaka basika na mapeka ya Yandi, bawu losaka kima pene-pene ya Yandi mutindu *yina*; mpe menga yina kangamaka na mukongo ya Yandi, mpe vwandaka kuna, mpe yimpu ya bansende ya kukota na kizizi ya Yandi mutindu yina. Mpe menga, mpe mante ya basoda, nyonso na zulu ya kizizi ya Yandi, vwandaka kuna. Ya vwandaka ve kinsamu ya mpasi? (O Nzambi!)

<sup>258</sup> Beno ke tuba, “Mbote, kana mu vwandaka kuna, mu zolaka sala kima mosi samu na yawu.” Mbote, samu na yinki beno lenda sala kima mosi ve samu na Yawu ntangu yayi? Samu ti kana beno . . . Beno zolaka sala kima mosi yina beno ke na kusala ntangu yayi.

<sup>259</sup> Kuna Yandi vwandaka, ya kuvwanda kuna, ba vwandaka seka mpe vwandaka losa mante. Kuna kele bilandi ya kutelama na manima, vwandaka tuba, “Oh, la la, wapi mutindu ya me salama na Yandi? Muntu yina, Yandi yina lendaka kubokila muntu ya kufwa na kubasika na ntoni, mpe kutala Yandi kuna.”

Kasi bawu kondwaka na kuzaba Masonuku. Ya kele yina ya kele, beno me mona.

<sup>260</sup> Mpe na yawu, menga mpe mante na kizizi ya Yandi. Bawu tulaka kinuka na meso ya Yandi, mpe tubaka, “Beno zaba, ba tubaka na munu ti ‘Yandi vwandaka na kumona ya kimpeve, beno zaba. Yandi kele profete, Yandi lendaka kutuba na bantu. Yandi tubaka na kento na dibulu ya maza na masumu ya yandi. Mpe Yandi tubaka na Simon ti nkumbu ya tata ya yandi vwandaka Jonas, mpe nyonso yina me tala yawu.’ Beto mona kana Yandi lenda, yinki Yandi ke sala ntangu yayi.”

<sup>261</sup> Bawu tubaka, “Beto ke pesa Yandi mwa kumekama.” Ya vwandaka dyabulu na kusalaka na kati ya bantu yina. Bawu tulaka kinuka na zulu ya meso ya Yandi mutindu *yina*, bawu vwandaka na yinti mpe bulaka yawu na zulu ya yintu ya Yandi, tubaka, “Kana Nge kele profete, tuba na beto nani me bula Nge.” Yandi ata mbala mosi ve kuzibulaka yinwa ya Yandi, Yandi vwandaka kaka kuna.

<sup>262</sup> Satana tubaka, “Beno zaba ya lenda vwanda ve...ya—ya lenda vwanda ve Nzambi.”

<sup>263</sup> Ya kele kima mosi ke tubaka dénomination ya ntama bubu yayi, “Nkongga ya ba-exalté yina, ya lenda vwanda ve Nzambi.” Kasi bawu zaba ve. Bawu zaba ve. “Ya lenda vwanda ve Nzambi na kusalaka bima yina, ya kele télépathie mentale. Bawu kele—bawu kele banganga-nkisi.” Bawu ke bakula kaka Yawu ve, kaka yina.

<sup>264</sup> Na yawu bawu bandaka—bandaka na kumata mongo, kutulaka robe yango na nziunga ya Yandi. Bilele kaka yina Yandi kuzwaka, mu banza, ntangu Yandi vwandaka muntu, Marie mpe Marthe kuyidikaka Yandi mwa robe, Yandi vwandaka tambula na robe bisika nyonso, ya kukondwa ntungulu. Bawu tulaka yawu na zulu ya mukongo ya Yandi. Mpe kuna vwandaka na mwa matona yango na lele ya Yandi na yina Yandi vwandaka mata mongo; na kubendaka, na kututaka kulunsi yango ya ntama. Mpe mwa nzutu ya Yandi ya kulemba, vwandaka landila na kukwenda; mpe bawu na kubulaka Yandi, mpe nyonso yankaka, na kunataka Yandi na kulandila na kukwenda mutindu yina. Kulunsi ya ntama yina, “na kubulaka ntoto,” mpe mapeka ya Yandi na kututaka, mpe Yandi vwandaka bembila, mpe Yandi vwandaka landila na kukwenda.

<sup>265</sup> Mpe mwa matona yango vwandaka kuma nene mpe nene, tii na manima ya mwa ntangu fyoti yawu nyonso kumaka ditona mosi ya nene. Satana yango ya mawa kwizaka, beno zaba, na mutindu ya “nyosi,” *lufwa*, beno zaba, mpe tubaka, “Aha, ah, ah! Yina? Nzambi zolaka sala yawu ve”. Yandi tubaka, “Yandi kele kaka muntu, Yandi ke na kusalaka komedi.” Yandi ke banza dyaka yawu. “Yandi ke na kusalaka kaka komedi, na yawu mu ke tobula Yandi kaka. Kana Yandi vwandaka Nzambi Yandi

lendaka kufwa ve. Na yawu mu ke—mu ke tobula Yandi mpe ke mona yinki ya ke sala, mutindu yina. Mu ke—mu ke meka yandi.”

266 Na yawu ntangu yandi kuzwaka Yandi na kulunsi, yandi tobulaka ntunga yina na kati ya Yandi; kasi ntangu yandi salaka, yandi zimbisaka ntunga ya yandi. Yina vwandaka dyaka ve muntu, yandi tubolaka Nzambi ntangu yina!

267 Mpe ya kele samu na yina yandi tubaka, “O lufwa, . . .” ntangu Paul. . . Beno—beno zaba, nyosi, na manima yawu me tobola mbala mosi, ya lenda tobola dyaka ve. Nyosi ke manisaka kuna. Yandi lenda sala makelele mpe kusala makelele, kasi yandi—yandi—yandi lenda tobula ve, samu ti yandi kele ve na ntunga. Na yawu lufwa kele dyaka ve na ntunga. Paul, ntangu bawu vwandaka tunga kisika samu na kuzenga yintu ya yandi, lufwa vwandaka to- . . . vwandaka sala makelele na nziunga ya yandi, yandi tubaka, “O lufwa, wapi kisika kele ntunga ya nge?”

268 Ndyamu tubaka, “Mu ke kuzwa nge, Paul. Mu ke mina nge.” (Mu kwendaka kuna kisika ba zengaka yintu ya yandi mpe losaka yandi na égout kuna.) Ndyamu tubaka, “Mu—mu—mu ke bebisa nzutu ya nge, mu ke bolisa nge.”

269 Mpe yandi tubaka, “Oh—oh, O ntoni, wapi kisika kele lunungu ya nge?” Beno me mona? “Kasi matondo na Nzambi Yandi yina ke pesaka beto lunungu na nzila ya Mfumu ya beto Yesu Klisto!” Samu na yandi lufwa kuzimbisaka ntunga ya yawu. yandi tubaka, “Mu me nwana kunwana ya mbote, mu me manisa mbangu ya munu, mu me kangama na Lukwikilu. Mpe kubanda ntangu yayi ya kele ya kubumba samu na munu yimbu ya ludedomo yina Mfumu Zuzi ya kudedama ke pesa munu na kilumbu yina. Mpe kaka munu ve, kasi bawu nyonso yina zola kutalana ya Yandi.” Amen! “Zenga ntangu yayi kana nge zola.” Huh! Oh, ya kele—ya kele yawu. Beno tala nzila, mpangi. Yina kele—yina kele Mpeve ya kieleka ya Muklisto.

270 Ntangu yayi—ntangu yayi, kana beno kuzwa bweso, wapi mutindu beno ke kuzwa kidimbu ya kibulu? Mu ke zola kaka kutuba yayi samu ti mu banza mu ke sukisa na kutubaka yayi. Wapi mutindu beno ke kuzwa kidimbu ya kibulu? Beno ke zola kuzaba? Yinki kele bandandu? Yinki kele kidimbu ya kibulu?

271 Beto zaba yina kele Kidimbu ya Nzambi. Yinki kele Kidimbu ya Nzambi? Mbote, beto luta kaka na Ephésiens 4:30, mpe kuna—kuna beno ke kuzwa yawu, na yina beno tanga yawu beno mosi kuna. To—to dyaka bayankaka ya beno lenda tanga Apocalypse—Apocalypse 9:1 na 4. Mpe yankaka, ya Zole ya Corinthiens 1:22. Ya kele na bisika mingi. Mu notikaka ndambu kuna. Kasi beto baka Ephésiens 4:30, mpe kuna beno lenda mona yina kele Kidimbu ya Nzambi; mpe bayankaka yayi, to kisika yankaka. Beno baka kaka mpova *kidimbu* na concordance ya beno, mpe beno landa yawu kisika nyonso beno zola. Mbote mingi, Ephésiens 4:30, beno kuwa yayi:



*Mpe beno nyongisa ve Mpeve-Santu ya Nzambi, na yina na beno kutulamaka kidimbu tii kilumbu ya beno ya mpulusu.*

272 Yinki kele Kidimbu ya Nzambi? Mpeve-Santu. Kieleka. Mbote mingi, ntangu yayi, “Yandi yina kele ve na Mpeve ya Nzambi kele ve ya Munu.” Kana beno kele na Mpeve-Santu, beno kele ndambu ya Nzambi samu ti beno kele ya Yandi. Yandi—Yandi tulaka beno kidimbu mpe Yandi kele na kati ya beno, ke sala na kati ya beno, mpe bidimbu yina Yandi ke salaka beno mpe ke sala. Ntangu yayi, muntu nyonso ke bakula yawu, beno kalasi? Ya ke lomba Mpeve-Santu samu na kuvwanda ya Nzambi; Mpeve-Santu. Mpe kana beno kele ya Mpeve-Santu, beno ke sala bisalu yina Yesu salaka. Beno me mona? Zola ya beno . . .

273 Ntangu ba losaka mante na kizizi ya Nge mpe ti ba bulaka Nge mutindu yina, ya vwandaka ve na musisa ya ndudi. Yandi talaka bawu, Yandi tubaka, “Tata, lemvočila bawu samu ti bawu zaba ve yina bawu ke na kusala.” Beno me mona, bawu zabaka ve.

274 Beno lenda banza yawu? Bana ya Yandi Mosi na kudilaka samu na Menga ya Yandi! Kiyidiki ya mazulu mpe ntoto na zulu ya kulunsi yina Yandi salaka Yandi mosi, menisaka yawu na ntoto. Mpe bana ya Yandi Mosi! (Beni banza na bana ya beno, batata, bana ya beno mosi.) Na kudilaka samu na Yandi, “Yandi kwenda! Beni pesa beto Barabbas, muyimbi yina kele kuna.”

275 Oh, mu vwandaka Barabbas yango, mu vwandaka yina zolaka kufwa mpe Yandi bakaka kisika ya munu. Wapi mutindu zolaka kuwa Barabbas na suka yina ntangu makelele ya ngolo ya mfumu ya basoda yayi kubelamaka kuna, mpe kuzibula kyelo. Mpe Barabbas kutubaka, “Oh, la la! Kaka ntangu fyoti mpe mu ke kwenda. Mu kele muntu ke kufwaka bantu, mu kele—mu kele muyibi. Ba ke kufwa munu bubu yayi, mu zaba ti bawu ke sala. Ya kele kilumbu ya paki, na yawu mu—mu kieleka . . . mu zaba ti mu ke kufwa bubu yayi.” Ya kudasuka, mpimpa nyonso, vwandaka tambula kaka bisika nyonso mutindu musumuki nyonso yankaka. Kima ya ntete beno zaba, awa me kwiza mukengi. Yandi me tuba, “Oh, oh, beno tala yandi yayi. Mu fwana kwenda, mu fwana kwenda.” Mpe fungula me kota mpe me sala makelele.

Mukengi me telama me tala mbote, “Basika, Barabbas!”

“Uh-huh, yinga. Yinga, mu zaba ti mu ke luta, mu ke luta.”

“Ve, kwenda mpe sala yina nge zola.”

“Yinki?”

“Kwenda sala yina nge zola. Basika, nge me kuzwa kimpwanza.”

276 “Mu me kuzwa kimpwanza? Mbote, beno bedisaka munu na lufwa.” Ya kele kieleka, Nzambi bedisaka misumuki nyonso na lufwa. “Beni bedisaka munu na lufwa, wapi mutindu mu me kuzwa kimpwanza?”

277 “Kwiza awa, Barabbas. Tala, ke mata mongo kuna, kuwa makele ya kulunsi yina ke tuta ntoto. Kuwa banonso na yina ya ke na kukota maboko ya Yandi. Tala Yandi kudila kuna, masa ya meso ya mungwa mpe menga kuvukana na kizizi ya Yandi. Yandi me baka kisika ya nge, Barabbas, Yandi me kufwa samu na nge.”

“Nge ke zola kutuba ti Yandi me kufwa samu mu kuzwa kimpwanza?”

“Yinga.”

278 “Mbote, mbote mingi, mu ke banda dyaka kufwa bantu kuna.” Oh, wapi kukondwa kuvutula matondo! Nge fwana kufwa.

Ntangu—ntangu mu ke mona Kulunsi ya  
kuyituka,  
Kisika kufwaka Mwana ya ntinu ya Nkembo,  
Kuzabana ya munu nyonso kele kasi kuvidisa  
ya mpamba.

Oh, la la! Kukondwa ntembe ti powete kutubaka:

Na luzingu, Yandi zolaka munu; na lufwa,  
Yandi vulusaka munu;  
Na kuzikama, Yandi nataka ntama masumu ya  
munu;  
Na mvumbukulu, Yandi me nungisa munu ya  
ofele kukonda nsuka:  
Kilumbu mosi Yandi ke kwisa—oh, kilumbu ya  
nkembo!

279 Wapi mutindu mu lenda losa Yandi ntangu mu ke mona yina Yandi salaka samu na munu? Wapi mutindu mu lenda? Mu ke zola mingi kuzimbisa konso nkundi kele na munu na ntoto. Wapi mutindu, ntangu mu . . . Mu ke vwanda ya kukubama ti ba losa munu na ngaanda ya ba-organisation mpe kulosama bisika nyonso, nyonso yankaka. Ntangu mu ke tala kuna, ntangu mu vwandaka ya kubedisa na lufwa, mpe Yandi me baka kisika ya munu! Kieleka, Mfumu. Nyonso, mu ke tanga nyonso yankaka mpamba. Oh, ti mu kangama na Kulunsi, O Mfumu.

Na kati-kati ya matadi ke kubwa mpe mazulu  
ke kuma mudidi,  
Mvulusi ya munu kulumusaka yintu ya Yandi  
mpe kufwaka,  
Vwale yina pasukaka mpe monisaka nzila  
Na kiese ya Zulu mpe kilumbu ya kukonda  
nsuka.

280 Oh, ti mu—ti mu vwanda pene-pene ya Nge, Yesu. Kubalula munu ve ntama na lweka ya Nge ya luzolo, na kumonaka bamputa tanu ya Nge ya menga. O Mwana ya ntinu ya Mazulu, mutindu Yandi kufwaka, kufwaka samu na munu! Kufwaka samu ti mu. . .

281 Muntu ya kubedisa. . .na basieni ya disumu, na yinzo ya boloko ya difelo, ya kubedisa, yina zabaka dyambu, yina vwandaka kwenda samu ba kufwa yandi ya mbala mosi, mpe Muntu bakaka kisika ya munu. Mpe kuna bawu. . . Kubasikaka awa ntangu mu vwandaka. . .; ya vwandaka pene na bamvula kumi na nana, to makumi zole, kilumbu mosi Mpeve-Santu. . . Mu tubaka, “Mbote, nani mu kele? Wapi kisika mu me katuka? Wapi kisika mu kele?”

282 Yandi tubaka, “Yandi bakaka kisika ya nge, nge vwandaka kwenda *kuna*. Yandi bakaka kisika ya nge, tala Yandi yayi.”

283 Mu tubaka, “O Mana-dimeme ya Nzambi! O Mwana-dimeme ya Nzambi, mu me kwiza! Mu me kwiza! Kima ve mu me nata na na maboko ya munu, mu ke na kima ve ya kupesa Nge, Mfumu, kaka na kulunsi ya Nge mu me kangama na malembe; ya kele nyonso yina kele na munu.” Mpe Yandi kotisaka munu. Yandi lwatisaka munu mutindu tata na mwana ya yandi yina bebisaka, lwatisaka munu kilele ya malu-malu, lele ya munu ve, ya Yandi lele ya ludedomo ya Yandi Yandi lwatisaka munu; mpe musanga ya makwela na musapi ya munu, ti mu ke vwandaka na Kento ya makwela kilumbu yina. Ntangu yayi ba me kufwa mwana ya ngombe ya mafuta, mpe beto ke na kusepela samu ti mu vwandaka mbala mosi ya kufwa mpe ntangu yayi mu kele moyo, mu vwandaka mbala mosi ya kuzimbana mpe ntangu yayi mu me talana.

Lemvo ya ngitukulu! mutindu mbote ya ke wakana,

Yina vuukisaka muntu ya mawa mutindu munu! (Ya kulutila yimbi na Barabbas.)

Mbala mosi mu vwandaka ya kuzimbana, kasi ntangu yayi mu me monana,

Mu vwandaka mpofo, kasi ntangu yayi mu ke mona.

Ya vwandaka lemvo yina longaka ntima ya munu na kuzitisa,

Ya vwandaka lemvo yina me sadisa baboma ya munu;

Mutindu ntalu lemvo yango me monana

Na ngunga mu kwikilaka ntete!

Ntangu beto vwandaka kuna bamvula kumi ya funda

Na kulezimaka mutindu mwini; (Ata mbwetete dyaka, Mwini.)

Beto ke vwanda ve na bilumbu fyoti na  
 kuyimba lukumu ya Yandi  
 Kulutila na ntangu beto yimbilaka na ntete.  
 (Beto kele kuna na Seko.)

<sup>284</sup> Oh, mutindu mu zola Yesu, samu ti Yandi zolaka munu ntete.  
 Oh, mutindu ya kele mbote!

Beno baka na munu ntangu yayi Exode, beno zola, na kapu ya 21.

<sup>285</sup> Kupusa ya “Mpeve” ya Yandi, ntangu yayi beto ke zonzila awa na mutindu ya kuzwa . . . Mu lakisaka beno, mpe tubaka na beno na bandandu, “*kuna Yandi kele.*”

<sup>286</sup> Ntangu yayi, wapi mutindu beno ke kuzwa kidimbu ya “kibulu”? Mpe mu ke lakisa beno yinki nsuka ya beno ke vwanda *kuna*. Ntangu yayi, kidimbu ya kibulu, Exode kapu 21. Na kubasisaka yawu na Ngwisani ya Ntama samu beno kumona awa. Mpe na Ngwisani ya Malu-malu mu kele na Masonuku mingi ya kuvwanda awa yina beto nyonso zaba. Ntangu yayi beto tanga:

*Ntangu yayi bayayi kele balufundusu yina nge ke tula na ntuala ya bawu.*

*Kana nge sumba kisadi ya Hébreu, (Ntangu yayi, beno bambuka moyo awa, ya kele Hébreu, ya kele mukwikidi, beno me mona.) . . . kisadi ya Hébreu, bamvula sambanu yandi ke sadila: mpe na ya sambwadi yandi ke basika kimpwanza ya kukondwa kima.*

*Kana yandi kwizaka yandi mosi, yandi ke basika yandi mosi: kana yandi vwandaka ya kukwela, na yina kento ya yandi ke basika na yandi.*

*Kana mfumu ya yandi . . . pesa yandi kento, . . . yandi me butila yandi bana ya babakala to bana ya bakento; kento mpe bana ya yandi ke vwanda ya mfumu ya yandi, mpe yandi ke basika . . . yandi mosi.*

<sup>287</sup> Mu ke sala ve . . . mu—mu—mu—mu zaba ti ntangu ya munu me manisa. Lemvokila munu, Mpangi Neville, kasi mu—mu fwana kotisa yayi mbote, mpangi.

<sup>288</sup> Beno tala awa. Ya kele ve yina mama ya beno kele, yina tata ya beno kele, ya kele beno! Kento ya beno ve, beno me mona; kento ya yandi vwandaka tangama ve, bana ya yandi vwandaka tangama ve. Ya kele yandi! Ata nyonso . . . Mama ya beno zolaka vwanda santu, tata ya beno zolaka vwanda santu; mutindu mosi vwandaka tata mpe mama ya Esaü, kasi yandi vwandaka muntu ya kusalu. Beno me mona? Kasi, yandi . . . kasi ya kele dyambu ya mosi na mosi na *beno*.

<sup>289</sup> Beno ke tuba, “Tata ya munu kele mulongi.” Ya kele na kima ve ya kusala na beno. “Mama ya munu kele kento ya kinzambi.

Oh, yandi kele na mazulu.” Ya lendaka vwanda kieleka, kasi wapi mutindu samu na nge? Ya kele nge!

*Mpe kana kisadi . . .*

<sup>290</sup> Ntangu yayi, beno tala kisika yandi . . . Ntangu yayi beno tala mbote kidimbu ya kibulu yayi ntangu yayi. Ntangu yayi, mu—mu kele dyaka ve na ntangu ya kuvutuka, samu ti mu me luta ngunga na baminuti makumi zole. Kasi mu zola kutuba na beno.

<sup>291</sup> Ntangu yayi, ya vwandaka na ntangu yina ba vwandaka bokila konso mvula ya sambwadi. Ya vwandaka bamvula sambanu. Na mvula ya sambwadi (Milongoki ya Biblia, milongisi, mpe bayina nyonso kele ya kuvwanda awa, zaba ti yayi kele kieleka.) ya vwandaka ya kubokila . . . mvula ya sambwadi vwandaka ya kubokila mvula ya jubilé; nyonso vwandaka pema. Ya vwandaka ve na bima ya kukunda na mvula ya sambwadi, ntoto vwandaka pema, nyonso. Bawu vwandaka buka kaka, beno me mona. Nyonso vwandaka pema na mvula ya sambwadi. Mpe na mvula ya sambwadi ya vwandaka na nganga-Nzambi yina vwandaka bula mpungi. Mpe kana muntu vwandaka mpika, mu ke kipe ve yina vwandaka mfuka ya yandi, yandi vwandaka kuzwa kimpwanza.

<sup>292</sup> Ntangu yayi, ya kele mutindu Mpungi ya Nsangu ya mbote. Beno lendaka vwanda me sadila dyabulu bambvula nyonso yayi, na basieni, na kunwa malafu, kunwa tabaka, kubula bansaka ya mbongo, mpe kusumuka, bima ya mvindu, ata nyonso yina beno salaka, kasi ntangu beno ke kuwa Mpungi ya Nsangu ya mbote kuwakana, ya kele kidimbu ti beno lenda kwenda kimpwanza. Beno lenda kwenda! “Lukwikilu ke kwizaka na, [Dibuundu me tuba, “Kuwa.”—Mu.] na kuwaka, Ndinga ya Nzambi.” Ntangu yayi beno me kuwa Nsangu ya mbote ya kufuluka, beno lenda vwanda dyaka ve ya kukangama.

<sup>293</sup> Ntangu yayi, kana beno vwanda kaka mpe kutuba, “Oh, mu kuwaka na Yawu, kasi mu kuwaka Yawu ve.” Beno me mona? Mbote mingi, kuna Yawu kele ve samu na beno. Huh-uh. Ya kele samu na bawu yina ke kuwa Yawu. Mbote mingi, kana beno lenda kuwa.

<sup>294</sup> Ntangu yayi beno tala mbote yina Yandi tubaka awa. Ntangu yayi samu na kulakisa beno yayi, ntangu yayi beno tala kieleka mbote mpe beno kanga kubanza ya beno na baminuti zole to tatu yina ke landa.

*Mpe kana kisadi (Ya kele muntu yina ba zolaka pesa—pesa kimpwanza.) kutuba pwelele, mu zola mfumu ya munu, . . .*

<sup>295</sup> “Oh, mu ke zolaka kukwenda na kubina. Mu ke bika ve kubina ya munu samu na muntu. Mu ke bika ve yayi, yina, to yankaka, samu na muntu; kento ya munu, bana ya munu, bima ya yinza yayi yina mu ke zolaka. Ntangu yayi, tala awa, Mpangi Branham, mu ke tuba na nge, nge zola kutuba mu

fwana . . . ?” Beno fwana kusutope na kima ve. Beno kota kaka, ya ke kusutope yawu mosi. Kasi—kasi beno ke tuba, “Mbote, mu ke sala yawu ve. Mu zola ve kusala yawu, mu kele ya dibuundu mpe mu kele kaka mbote mutindu beno to muntu yankaka.” Mbote mingi, mpangi. Ya kele kaka nyono ya kulunga, beno me kuwa yina kele Kieleka. “Mbote, ntangu yayi, beno kuwa awa, ya kele ve ‘Tata, Mwana, Mpeve-Santu’ . . . ?” Mbote, kana beno zola kulandila mutindu yina, beno kwenda kaka na ntwala.

<sup>296</sup> Beno me kuwa makelele ya Mpungi, mpe beno me kuwa note yina Yawu me pesa. Mpe Biblia ke tuba . . . (O Nzambi!) Beno banza na yawu! Yina ke pesa munu kaka ve kisonama ntangu yayi samu na ngunga yina ke landa? “Kana mpungi ke kupesa ve muningu ya mbote.” Kana dénomination ya beno ke tuba “Tata, Mwana, mpe Mpeve-Santu,” yina ke wakana ve mutindu Mpungi. “Kana mpungi ke kupesa ve muningu ya mbote, nani ke yilama yandi mosi samu na mvita?”

*. . . kisadi kutuba pwelele, mu zola mfumu ya munu, . . .*

<sup>297</sup> “Mu—mu zola dyabulu yina—yina ke salaka munu kusala bima yayi, ya kele mbote mingi. Mpe mu banza ve . . . mu banza ti beno kele kaka na dibanza ya kubyeta mingi kuna—kuna. Mu banza beno kele mingi ya kubyeta.” Mbote mingi. “Mu zola bima yina. Mu—mu banza ti beto fwana kuzwa bima ya nene yayi mutindu *yayi*, mpe kusala *yayi*, yinza . . . Mpe beto ke na mabina, beto ke na bansaka ya arnaque na dibuundu ya beto, mpe bima ya mutindu yina, mpe beto nyonso ke na ntangu ya mbote, mpe bawu kele kaka mbote mutindu nkonga nyonso yina kele na beno kuna.” Ok, ya kele nyonso mbote. Mbote mingi.

*. . . mpe mu ke basika ve na kimpwanza ya Kimpeve yina beno ke na kuzonzila:*

*Kuna mfumu ya yandi (dyabulu) ke nata yandi na bazuzi; mpe ke nata yandi mpe na kyelo, . . .*

<sup>298</sup> Hmm! Yinki? Nani kele Kyelo? [Dibuundu me tuba, “Yesu Klisto.”—Mu.] “Mu me tula na ntwala ya nge Kyelo.” Na wapi ntangu kidimbu yango ya kibulu kukwizaka? Na nsungi yayi kisika Kyelo vwandaka ya kutula. Yayi ku- . . . kutula kidimbu ya nsuka ya kibulu.

*. . . nata yandi na mwelo, to na . . . potu; (yina kele Calvaire, mbote mingi) . . . mpe mfumu ya yandi ke tobola dikutu ya yandi. . . ke tobola dikutu ya yandi na kima ya nsongi; mpe yandi ke sadila yandi ntangu nyonso.*

<sup>299</sup> “Yinki nge zola kutuba Mpangi Branham?” Kana nge kuwa Nsangu ya mbote ya Kieleka mpe ti beno kumanga na kutambula na Yawu, kuna Nzambi ke tula kidimbu na dikutu ya beno kisika beno ke kuwa dyaka ve Yawu. Beno me sabuka ndilu ya kati-kati ya Luzingu mpe lufwa. Na yina beno ke landila na

organisation, dénomination ya beno, yina ke bikana na ya beno lu-. . . bilumbu, kukondwa nsuka. (Benó tambula na Nsemo, bana. Yawu kele kieleka.) Benó ke sadila mfumu yina ntangu nyonso.

<sup>300</sup> Ti ya . . . Benó zola ve . . . Benó me mona, Mpungi me wakana mpe yandi lenda kwenda kimpwanza, ya kele lemvo ya Nzambi. Ya kele mvula ya jubiléé, kusukisa. kilumbu ya disumu me suka, mpangi. Mu ke tuba na mosi na mosi ya beno ke na kusadila disumu (na bande, to bantu kele awa), beno kele . . . muntu nyonso yina ke na kusadilaka disumu, kilumbu ya disumu me suka! Yesu kufwaka, beno fwana sadila dyaka ve disumu. Benó fwana fukama ve binkulu mpe ba-dénomination. “Yandi yina Mwana me kumisa kimpwanza kele kieleka na kimpwanza.” Kana beno zola kuvwanda na kimpwanza mpe kuvwanda na kimpwanza na Mwana, beno katukila bima nyonso mpe beno sadila Yandi, beno kwenda!

<sup>301</sup> Kasi kana beno zola ve, na yina organisation ya beno, mfumu ya beno, nyonso yina beno ke na kusadila, ke tula kidimbu na dikutu ya beno mpe beno ke vwanda dyaka ve na lenda ya kuwa Yawu. Kana Nzambi ke zonga na ntima ya beno na “Kukwiza, yayi kele ntangu,” mpe ti beno kumanga Yawu, kuna beno ke kuzwa kidimbu ya yandi, ke vwanda ngolo na Kieleka. Benó tala kidimbu ya dyabulu, kidimbu ya kibulu. Benó me mona? Yinki kidimbu ya kibulu ke salaka? Ke vutula kaka beno na mutindu ya Rome, na mutindu ya dénomination, mpe beno ke kota dyaka ve mpe ke kuzwa kimpwanza; ke sadila yawu ntangu nyonso. Ya kele kidimbu ya kibulu.

<sup>302</sup> Ya kele ngolo, bankundi, ya kele kuzenga, kasi ya kele yina . . . Mu kele ve na kizitu samu . . . kaka na yina Biblia ke tuba.

<sup>303</sup> Ntangu yayi, yina vwandaka kifwanusu na Ngwisani ya Ntama yina vwandaka samuna kuwa ya Nsangu ya mbote ti “Nge kele na kimpwanza!” Benó fwana kuvwanda dyaka ve ya kukangama, beno kele kieleka na kimpwanza na Klisto Yesu. Masumu dyaka ve mpe nyonso. ve . . .

<sup>304</sup> Benó yina zola yinza, Biblia ke tuba, “Kana beno zola yinza to bima ya yinza, luzolo ya Nzambi kele ve na kati ya beno.” Ya kele kieleka? Kana beno zola yinza to bioma ya yinza, zola ya Nzambi kele na kati ya beno. Na yina wapi mutindu samu na bima nyonso ya nene yayi yina ke na kusalamaka na yinza bubu yayi na yisi ya nkumbu ya nsambulu? Bima ya yinza! Mpe bantu ke mina kaka yawu mutindu ngulu na yinzo ya ngulu, beno me mona, “Oh, yayi kele mbote. Kima mosi ve samu na Yawu!” Benó me mona, bawu kele ya kukanga mpe ya kutula kidimbu. Benó me mona?

<sup>305</sup> Ntangu yayi beno ke bambuka moyo na bayina bikanaka ya ba-Juif kele, nkama mpe makumi yiya na yiya ya fundá?

Kisika bawu kele ya kuvwanda, ke na kuvingilaka? Kaka na ngunga. Beno lenda mona ntangu yayi mwense ya kizoba yina zola ve kubaka. . . zolaka ve kubaka Mafuta, mpe fwana kuvumbuka mpe kuvwanda ya kukabuka, baya kudedama mpe baya kudedama ve na kilumbu ya lufundusu? Beno ke bakula yawu ntangu—mwense ya kizoba ke banda kuzwa, kaka mutindu ntangu yayi, ti yandi vwandaka na nsatu ya Yayi, yandi kwendaka sosa Yawu; ya vwandaka na minuti kaka yina ti Bakala ya makwela kukwizaka?

<sup>306</sup> Na yina wapi mutindu pene beto kele? Ntangu kaka yayi! Beto kele ntangu yayi kaka na ntangu ya nkufi, mu zaba ve wapi mutindu yinda ya lendaka vwanaka. Mu lendaka tuba ve na wapi ntangu, mu—mu zaba ve. Ya lendaka vwanaka mvula yankaka, ya lendaka vwanaka kumi ya bamvula yankaka, bamvula makumi yiya, ya lendaka vwanaka baminuti makumi yiya. Mu—mu zaba ve, mu lenda tuba. Kasi mu zaba ti ya kele pene, ya kele kieleka pene. Mpe Mpeve ya Mfumu. . .

<sup>307</sup> Ntangu yayi, ya ke kuma ntangu kisika, kima ya ntete beno zaba, dibuundu ke banda kaka na kukuma madidi. Ntangu yayi, bantu yikwa yina—yina me tala dibuundu kukuma madidi bamvula fyoti yina me luta? Kieleka. Wapi kisika yandi ke na kukwenda? Laodicée. Ya kele kisika, beto ke baka na nkokila yayi mpe kubasisa wanzio ya dibuundu ya Laodicée, kulakisa yawu kuna samu ti beno kumona yawu, mpe kumona Nsangu ya yandi mpe yina Yawu ke vwanda, mpe na nsuka ya Nsungi ya Dibuundu ya Laodicée ntangu yandi ke yingana mpe ke tandama kuna tii Seko.

<sup>308</sup> Oh, mu zola kaka Yandi. Beno ve? Yinga, tata. Oh, . . . Yinki kele—yinki kele Kidimbu ya Nzambi? Mpeve-Santu. Yinki kele kidimbu ya kibulu? Kumanga Yawu. Beno tala nyonso zole. Mosi kele samu na kumona, mpe. . .

<sup>309</sup> Mbote, bawu kele. . . Mpe bantu yikwa vwandaka na ntoto bayina kuzwaka Yawu ve? “Bawu nyonso yina vwandaka ve ya kukanga kubakaka kidimbu ya kibulu.” Bawu nyonso, bayina vwandaka ve na Mpeve ya Nzambi, vwandaka na kidimbu ya kibulu. Kidimbu ya Nzambi kele Mpeve-Santu. Biblia ke tuba yawu. Kisika nyonso na Masonuku ke zonzila Yawu, ya ke tuba Yawu kele Kidimbu ya Nzambi, “Kidimbu ya Nzambi.” Mpe bawu nyonso yina kuzwaka Yawu ve, vwandaka bayina kumangaka Yawu. Mpe wapi mutindu bawu kumangaka Yawu? Na kumangaka na kuwa Yawu. Ya kele kieleka?

<sup>310</sup> Ntangu yayi beno bambuka moyo, wapi mutindu beno ke kuzwa lukwikilu? “Na kuwaka.” Wapi kisika ba tulaka kidimbu? Na diboko? Ve. Na yintu? Ve. Na dikutu, beno me mona. Na *dikutu*, “na kuwaka.” Yinki yawu ke sala? Kidimbu na kuwa. “Mpe dyaka ve,” beno ke tuba, “Yina dyaka ve samu na munu.



Mu zola kima yankaka ve ya kusala na Yawu. Mu zola kima mosi ve ya kusala na Yawu.” Ya kele kaka mutindu bawu . . .

311 Mpangi Neville, mu—mu—mu ke—mu ke bika kaka yawu kukota tii bayankaka . . .

312 Mu zolaka tuba na beno na yina me tala “ya lendaka vwanda ve samu na bayina vwandaka mbala mosi ya kutemuka,” beno me mona, “na kwiza na—na kukota na Kimfumu,” beno me mona. Ya kele mutindu mikwikidi yango na ndilu:

Beno tala, *ya lendaka vwanda ve samu na bayina vwandaka mbala mosi ya kutemuka, . . . me vwanda kintwadi na Mpeve-Santu,*

. . . me meka ngolo *ya yinza—yinza ke kwiza,*

*Kana bawu ke kubwa, kuvutuka ya bawu mosi mbala mosi dyaka na kubalula ntima; na kumona ti bawu ke na kukoma na kulunsi bawu mosi dyaka Mwana ya Nzambi . . . mpe ke pesa nzila ba finga yandi.*

*mpe . . . kutanga menga ya ngwisani, na yina yandi kusantisamaka, kima ya kukondwa santu, . . .*

313 Beno me mona, na Musolami na kusala yawu, ya kele kieleka, na muvimba nyonso ya lenda salama ve. Yandi lendaka sala yawu ve, beno me mona. Samu ti yinki yandi zolaka sala? Beno me mona? “Kasi na kutangaka Menga ya Ngwisani . . .” Ntangu yayi, beno me mona, kana yandi kele ya kusoola mpe na kati ya nkonga, yandi lenda ve kusala yawu. Ya lendaka salama ve samu na yandi na kusala yawu.

314 Ntangu yayi, beto me baka, me monikisa kaka yawu:

*. . . mvula . . . kwizaka ntangu nyonso na zulu ya ntoto, kubongisa yawu . . .*

*. . . mpe matiti ya bansende mpe bansolokoto yina . . . kele dyaka mfunu ve; nsuka ya yawu kele kuyoka. (Blé ke natama na Yinzo na Musungu.)*

315 Kasi mvula yina ke pesaka luzingu yayi ke kubwaka na zulu ya bawu zole matiti ya yimbi mpe blé. Bawu nyonso zole ke sepela mpe ke kuwa mutindu mosi na yawu ntangu . . . kyese na kumona mvula kukwiza. Kasi na bambuma ya bawu beno ke zaba bawu, to bawu ke pesa bambuma ya bawu ya matiti ya yimbi to bambuma ya mbuma (ntangu yayi, ya blé).

316 Ntangu yayi, beno tala yinki ke sala yawu. Ntangu yayi samu na kulakisa kisika ndilu yayi, kisika yayi . . . Mu ke na kumekaka na kunata *mwense* yayi na beno, beno me mona, samu beno—beno kubakula. Ntangu yayi na mukwikidi ya ndilu, beno tala mbote yina kusalamaka ntangu bawu kwizaka na Kadès-Barnéa, bana ya Israél. Mu tangaka kaka yawu ntonono mpe nsuka ya Genèse, mpe ntonono mpe nsuka ya Exode, mpe bisika

nyonso yankaka, na kumekaka na kufwanikisa yawu samu na beno, beno me mona, samu ti kalasi kukondwa yawu ve.

317 Ntangu yayi, ntangu bantu yayi na—na yayi. . . na Exode, ntangu bawu kumaka na Kadès-Barnéa. Kadès-Barnéa vwandaka kiti ya lufundusu ya yinza, na ntangu yina. Ya kele kisika Israël kuzwaka kiti ya yandi ya lufundusu. Ti bawu vwandaka kaka. . . Ya vwandaka kaka bilumbu kumi na mosi na mongo kisika bawu kuzwaka balutumu tii bawu kuzwaka lufundusu, “bilumbu kumi na mosi ya nzyetolo na nzila ya mukidi ya mubu,” Biblia ke tuba. Nzyetolo ya bilumbu kumi na mosi, mpe bawu kumaka na Kadès mpe kuna ba fundisamaka. Na yina ti Nzambi zolaka nata bawu kuna, na pene bilumbu yiya, bawu vutukaka awa na ntoto ya kuyuma kuna mpe bawu kuyenga-yengaka; mpe kuzwaka balutumu mpe bima mutindu yina, mpe vutukaka, mpe mutindu, yina kusalamaka. Na manima bawu kumaka awa. . . Mpe bilumbu kumi na mosi kuna, bawu kwizaka na lufundusu ya bawu na Kadès-Barnéa.

318 Yinki kusalamaka? Yandi bakaka mosi ya konso dikanda mpe tubaka, “Beno kwenda tala yinsi, mpe beno mona wapi mutindu ya yinsi ya kele.” Mbote, bawu nyonso kwendaka mpe talaka.

319 Zole ya bawu kwendaka na kati mpe kuzwaka kinkuku mosi ya nene ya bambuma ya vinu. Oh, kinkuku ya nene, ya lomba ti bantu zole kunata yawu.

320 Ntangu yayi, yinki bawu kusalaka ntangu bawu kuvutukaka mpe monaka wapi mutindu ya yinsi ya vwandaka? Bawu kumonaka ba-Amoréen mpe—mpe bayankaka kuna, mpe bawu tubaka, “Mbote, bawu kele bakafumba ya bantu!” (Ya vwandaka, kieleka, bana ya Caïn yina na nsuka vwandaka kuna na yinsi yina—yina.) Yandi tubaka, “Bawu kele—bawu kele—bawu kele bakafumba ya bantu!” Mpe bawu tubaka, “Beto kele—beto kele—beto kele ve na lenda ya—ya kubaka yawu. Bayinsi ya bawu—ya bawu—ya bawu—ya bawu kele nyonso ya kuzungudila, mpe bibaka ya nene. Mpe, mbote, beto kele mutindu makonko, na lweka ya bawu.”

321 Yinki bawu kusalaka? Mbote, bawu—bawu kieleka kumonaka yinsi. Bawu kumekaka mbuma ya yawu. Beno me mona, Caleb mpe Josué kwendaka mpe bakaka—bakaka kimbangi mpe nataka yawu, vwandaka na yawu na mapeka. Bawu kumeka mbuma! Ya kele kieleka. Bawu ata mbala mosi ve kuvwandaka kuna, kasi Caleb mpe Josué kukwendaka kuna, nataka kimbangi. Caleb mpe Josué tubaka, “Beto lenda baka yawu!” Beno me mona? Samu na yinki? Caleb mpe Josué vwandaka tala na Ndinga.

322 Nzambi tubaka, “Yinsi ya kele ya beno. Ya kele nyonso ya kifuluka na ba-Amoréen mpe ba-Hévien mpe mutindu nyonso ya ba-ien kuna, kasi” tubaka “ya kele ya beno. Mpe kisika

nyonso dikulu ya nge ke vwanda, Mu ke pesa yawu na nge.” Ya kele kieleka. “Beno landila kaka na kutambula, beno me mona, ya kele ya beno.”

<sup>323</sup> Kasi bawu tubaka, “Oh, ve! Beto lenda ve kuzwa réveil ya mutindu yina. Oh! Oh, oh, mbote, beno zaba yinki? Archbishop, to évêque, to banganga-Nzambi, to muntu ke kwiza mpe ke losa beto nyonso na ngaanda.” Huh! Beno kwenda na ntuala, ya kele kieleka, beto ke kuzwa yawu.

<sup>324</sup> Ntangu yayi, mpe kuna bawu yayi zole kwizaka kuna mpe tubaka, “Beto kele na lenda ya kulutila na kubaka yawu, samu ti Nzambi tubaka ya wu! Beto kwenda baka yawu!”

<sup>325</sup> Kasi, beno me mona, mikwikidi yayi ya ndilu, bawu kwizaka ntama mingi samu—samu na kumeka Yawu. “Yawu vwandaka na ntomo ya mbote, inga. Kasi, oh, beto lenda sala yawu ve.”

<sup>326</sup> Ntangu yayi, yinki ya kele? Beno tala mukwikidi bubu yayi. Ntangu yayi, beno tala mbote muntu yayi kaka *awa*. Nzambi ke pesa yandi mbokolo. Uh-huh. Mbote mingi, ntangu yayi yandi me vuuka. Mama ya yandi ke sukula bilele na dibaya, mpe ke fidisa yandi na lukolo mosi ya nene samu na kuzwa ndongosolo ya yandi na mutindu ya kulonga. Mbote, yandi ke basika kuna, yandi ke banza dyaka yandi. . . ntangu nyonso yina yandi ke mona bakento yina me lwata yimbi, yina ke. . . pasula yandi; konso ntangu yandi—yandi ke kuwa nsunga ya makaya, yandi fwana kaka kunwa mosi. Yandi zaba ti ya kele yimbi. Yandi zola ve kusala yawu. Na yawu yandi ke tuba, “Mfumu, vedisa munu, nata kima yina ntama na munu.”

<sup>327</sup> Nzambi ke tuba, “Mbote mingi, Mu ke sala yawu samu na nge, mwana, ke katula yawu nyonso na nge.”

<sup>328</sup> Nkokila mosi yandi kwendaka tengu-tengu na mwa kisalu mosi ya kulonga kisika mosi, mpe yandi kuwaka mbotika ya Mpeve-Santu. Yandi tubaka, “Oh!”

<sup>329</sup> Yandi mataka kimatinu ya ntete, mvedolo; yandi mataka na kimatinu ya zole, kusantisama; ntangu yayi yandi me kubama samu na Mbotika. Beno me mona: mosi, zole, tata. Yandi me kubama samu na Mbotika. Ntangu yandi ke telama kuna, yandi ke tanga na Biblia, yandi ke tuba, “Ya kele kieleka yina bawu salaka. Ynga, ya kele Kieleka. Mbotika yango na Nkumbu ya Yesu, ya kele yina bawu salaka. Ya kele kieleka. Yandi tubaka na ‘kutanga dyaka yawu,’ mu me tanga yawu nzila nyonso na Biblia mpe kieleka yandi kele na raison na Yawu.”

“Évêque, yinki nge. . .”

“Ata mosi ya buzoba yina!”

“Oh, mu me mona.”

<sup>330</sup> “Bawu kuzwaka Mpeve-Santu, bawu zonzaka na bandinga, bawu salaka bima yayi, bawu belusaka bambevo. Oh, inga, ya

kele kieleka.” Yandi vwandaka tala ntama, beno me mona, yandi vwandaka tala ndilu.

331 “Oh, kana mu longa Yawu na dibuundu ya munu . . . Oh! Mu kele Presbytérien, Méthodiste, Bapiti- . . . beno zaba. Oh, évêque ke losa munu na ngaanda. Mbote, beto lenda kaka ve kusala yawu. Beto lenda ve kuzwa lukutakanu ya mutindu yina na dibuundu ya beto, mosi na mosi ya bawu ke telama mpe ke basika.”

332 “Yandi vwandaka mbala mosi ya kutemuka, mpe me meka Makabu ya mazulu, kana yandi kubwa na na kutambula yina yandi me baka, kuvutuka yandi mosi mbala mosi dyaka na kubalula ntima samu ti yandi me sumuka na Nzambi . . .” Yinki kele—yinki kele disumu? Ntembe! Yandi me sumuka na Nzambi. Mpe yinki yandi me sala? Yandi me tanga Ngwisani, nayina yandi kusantisamaka, mutindu kana Yawu vwandaka kima ya santu ve, mpe me wenza bisalu ya lemvo yina nataka yandi kuna. Kuna ya kele dyaka ve na munkayulu samu na yandi, kasi kuingila ya mpasi ya tiya ya lufundusu mpe nkele yina ke kufwaka mbeni. “Samu ti kuvutula yimbi kele na Munu,” me tuba Mfumu.

333 “Samu ti Ndinga ya Nzambi kele meno, kulutila mbele ya meno ya balweka zole, ke zenga mikwa, mpe kele mufundisi ya mabanza mpe bansatu ya dibanza.” Beno bawu yayi, beno bawu yayi. Na yina beno ke mona Nsemo, beno tambula na kati ya Yawu! Beno tambula! Beno zaba ve kisika beno ke na kukwenda, kasi beno landila na kutambula. Beno tambula na Calvaire, na kukangaka kutala na Calvaire. kutambula! Kutambula!

334 O Nzambi, ti kilumbu . . . Dibuundu, yina kele kifwanusu ya Enoch. Bankama tanu ya bamvula yandi kutambulaka na ntwala ya Nzambi. Kutambulaka! Kutambulaka na Nsemo, na kimbangi ti “Nyonso Nzambi tubaka, yandi salaka yawu.” Yandi nyongisaka ve Yandi. Yina Mfumu tubaka na kusala, Enoch kusalaka yawu. Ntangu yayi, yandi vwandaka kifwanusu, beno bambuka moyo na yawu. Nzasa kele kifwanusu ya ba-Juif, nkama mpe makumi yiya na yiya ya funda yina ke natama, yina kele Noé mpe nkonga ya yandi; kasi Enoch kukwendaka na Yinzo ntangu fyoti kaka na ntete kifuluka ya maza. Beno zaba yawu. Na yawu Enoch kulandilaka kaka na kutambula na kati ya Nsemo. Na yawu kilumbu mosi yandi talaka makulu ya yandi kubika ntoto, yandi landilaka kaka na kutambula, mpe yandi landilaka na kutambula kotaka na Nkembo kukondwa kufwa. Ya kele kieleka. Nzambi katulaka yandi samu ti yandi kutambulaka na kati ya Nsemo, na kimbangi ti “yandi kutambulaka na Nsemo ya Nzambi.” Yandi landilaka na kutambula, na kutambula.

335 Beto lwata mapapa ya beto, Dibuundu:

Beno landila na kutambula na Nsemo, Nsemo  
ya kitoko,  
Beno kwiza kisika kinoko ya kyadi ke lezima;  
Lezima na beto kilumbu mpe mpimpa,  
Yesu, Nsemo ya yinza.

Beto yimba yawu ntangu yayi:

Beto ke tambula na Nsemo, Nsemo ya kitoko,  
Oh, kwiza kisika kinoko ya kyadi ke lezima;  
Lezima na beto kilumbu mpe mpimpa,  
Yesu, Nsemo ya yinza.

Beno nyonso bantu ya Nsemo beno tuba,  
Yesu, Nsemo ya yinza;  
Kuna bangunga ya Mazulu ke wakana,  
Yesu, Nsemo ya yinza.

Beto ke tambula na Nsemo, Nsemo mosi ya  
kitoko mingi,  
Oh, kwiza kisika kinoko ya kyadi ke lezima;  
Lezima na beto kilumbu mpe mpimpa,  
Oh Yesu, Nsemo ya yinza.

<sup>336</sup> Beto yinikisa bayintu ya beto, mpe kaka—kaka ntangu fyoti ntangu yayi. Mu ke kumiyufula kana ya kele na mosi awa yina ke zola kuzwa kimbangi ya kuvwanda ya kifuluka na Mpeve-Santu, kutuba, “Bambuka moyo na munu, Mpangi Branham. Bambuka moyo na, dibuundu. Mu zola kutambula na Nsemo. Mu zola lembami yina, ata musisa ya ndudi na kati ya munu, mu zola kaka kuvwanda kisadi ya Nzambi.” Beno telemisa diboko, na kutubaka, “Bambuka moyo na munu, O Mfumu.” Inga, maboko makumi zole to ya kulutila, ya kutelama.

<sup>337</sup> Ntangu yayi beno bika kaka bayintu ya beno ya kukulumusa na yina beto ke yimbi na malembe kintwadi:

Oh, Yesu, Nsemo ya yinza.

Beto ke tambula na Nsemo yayi, ya kele Nsemo  
mosi ya kitoko mingi,  
Ya ke kwizaka kisika ke lezima kinoko ya  
kyadi;  
Lezima na beto kilumbu mpe mpimpa,  
Yesu, Nsemo ya yinza.

Beno kwiza, beno nyonso bantu ya Nsemo,  
beno tuba,  
Oh, Yesu, Yandi kele Nsemo ya yinza;  
Kuna bangunga ya Mazulu ke wakana,  
O Yesu, Yandi kele Nsemo ya yinza.

Oh, beto ke tambula na Nsemo, Nsemo mosi ya  
 kitoko mingi,  
 Ya ke kwizaka kisika ke lezima kinoko ya  
 kyadi;  
 Lezima na beto kilumbu mpe mpimpa,  
 O, Yesu, Nsemo ya yinza.

<sup>338</sup> Mfumu Yesu, na yina ba ke na kuyimbaka na kati ya yinwa nkunga yayi, na kuzolaka kutambula na Nsemo ya Nsangu ya mbote, baka bantima yango ya ntalu, Mfumu. Bawu kele ya Nge, sukula bawu, katula yimbi nyonso, basisa ntembe nyonso, ti Yesu Nsemo ya yinza kukota na kati. Bamuswale kele ya kutula awa, Mfumu, samu na bambevo mpe bantu ya mawa. Kwiza na bawu, Mfumu Yesu, mpe belusa bawu samu ti bawu kutambula na Nsemo. Pesa yawu, Mfumu.

<sup>339</sup> Beto ke tonda Nge samu na lesu ya beto, samu na Mvwandulu ya Mpeve-Santu, na kuvwandaka awa na beto mpe yina me bumba beto, bangunga, na kuvwandaka awa. Bantu na kuvwandaka na kivinga ya tiya yayi, ke vingila. Bawu ke na kutalaka mpe ke na kovingilaka mpe ke na kuyindula, Mfumu. Samu ti bawu me bakula, na yina bawu me kuwa Ndinga kutangama, ti beto kele na ntangu ya nsuka. Kima ve me bikana, kaka yinza ya kusakana. Mpe mosi ya bilumbu yayi bilanda-landa ke suka.

<sup>340</sup> Mpe mu ke sambila, Nzambi, ti Nge ke vulusa muntu nyonso yina kele na kati ya Mvwandulu ya Nzambi, vulusa bawu na nzila ya Mpeve ya Nge. Mpe ti Mpeve-Santu kukwiza na zulu ya mosi na mosi ya bawu mpe kufulusa bantima ya bawu na bumbote mpe ngemba, ti bawu ke basisa mbuma ya Mpeve, yina kele, mvibudulu, kusalasana, ngemba, ngemba, lembama, lukwikilu, na Mpeve-Santu. Pesa yawu, Mfumu. Mu ke pesa bawu na Nge ntangu yayi samu na kisalu ya Nge, na Nkumbu ya Yesu Klisto, Mwana ya Nge. Amen.

Beto ke tambula na Nsemo . . .

Beto telemisa maboko ya beto na yina beto ke yimba.

. . . Nsemo ya kitoko mingi,  
 Beno kwiza kisika ke lezima kinoko ya kyadi;  
 Lezima na beto kilumbu mpe mpimpa,  
 Oh, Yesu, Nsemo ya yinza.

Mu zola Yandi, mu zola Yandi  
 Samu Yandi zolaka munu ntete  
 Mpe futaka mpulusu ya munu  
 Na yinti ya Calvaire.

<sup>341</sup> Oh, Yandi kele mbote ve? Beto ke kuzwa lukutakanu ya mbotika na pene baminuti kumi ntangu yayi, to kumi na tanu, to nyonso yina. Kuna . . . Mu banza ya kele na mama ya ntwenya awa yina ke kuzwa mbotika. Ya kele kieleka? [Mpangi Neville me tuba, "Ya kele na mingi."—Mu.] Mbote mingi, bantu yikwa

ke kuzwa mbotika na suka yayi bayina ke vutuka ve na nkokila samu na lukutakanu ya mbotika na nkokila yayi? Mosi, zole, tatu, tatu, bayina lenda ve kukwiza na manima ya midi yayi to ntete lukutakanu ya nkokila samu na kubotama na Nkumbu ya Yesu Klisto. Nzambi sakumunu beno, bana. Mu kele na kyese ti Nzambi me tula na ntwala ya beno Kyelo ya kuzibuka. Mpe beno kele ya kuyilama na kukota ntangu yayi, beno ke kota na ntoni, ti bima nyonso ya ntama me kufwa mpe me zikama. Ntangu yayi, beno bambuka moyo, mbotika ya beno kele kaka kutuba na ngaanda ti kima me salama *awa*.

Mpe kuna beto ke tambula na Nsemo yayi, (Na kukubamaka?) Nsemo ya kitoko, (. . . ? . . .)  
 Oh, lezima pene-pene ya beto, kilumbu mpe mpimpa,  
 Oh, Yesu, Nsemo ya yinza.

<sup>342</sup> Oh, kubundana ya nene yayi! Beno ke kuwa mbote ve? Oh, mu ke kuwa kaka mbote mingi. Ya ke monana mutindu kima mu me kota, na mosi na bikombo ya ntama yayi, mpe ti beno me kwaka kaka munu na sabuni ya kusukula.

<sup>343</sup> Mu banza ti mpangi ya munu ya bakala me tuba ti beno nyonso yina zola kubotama na suka yayi, beno kubama. Bilele mpe nyonso ke vwandaka ya kupola na nkokila yayi, kasi ya kele nyonso ya kulunga kana beno zola kusala yawu. Kasi kana beno kele ya kukubama na kubotama na suka yayi, mbote mingi.

<sup>344</sup> Mu banza ti beto fwana katula yayi, ve, Mpangi Neville? Mbote mingi, tata. Ntangu yayi, bantu yikwa ke zola kuvwanda mpe kumona kubotika? Beno baka kaka baminuti fyoti mpe, oh, ya lendaka vwanda ti beno me mona ntete ve mutindu ya ke salamaka. Kana beno ke lenda ve kuvwanda, na yina beno kwikila ti beno ke vutuka na nkokila yayi. Kasi mu ke zola kana beno lendaka, mpe kuvwanda baminuti fyoti samu na kutala mbote lukutakanu ya mbotika. Beto ke katula yayi mpe ya kele na kitala-tala ya nene na manima awa yina ke lakisa muntu nyonso yina ke kota na kati. Ya ke yitukisa beno, mu ke kwikila. Beto ke zikama na Mfumu na mbotika. Amen. Na yina Yandi kufwaka, beto kele ya kuzika na lufwa ya Yandi; ke vumbuka na mvumbukulu ya Yandi, samu na kutambula na bumalu-malu ya luzingu. Mfumu kusakumuna beno.

<sup>345</sup> Bantu yikwa zaba yinki leso ya nkokila yayi kele? Laodicée, ya nsuka, mpe dyambu ya ngundi ya Bansungi ya Dibuundu.

<sup>346</sup> Mbote mingi, beto ke kota na lukutakanu ya mbotika. Teddy, kana nge zola . . .

<sup>347</sup> Nge zola kubo- . . . ? [Kisika ya mpamba na bande—Mu.] . . . kubotamaka yimeni. Ya kele na bayankaka ya bawu yina fwana kwenda na Chicago kaka ntangu yayi, beno me mona.

Beto sambila:

<sup>348</sup> Mfumu Yesu, bawu me vwanda mpe me kuwa balukutakanu tii na nsuka. Beto me pesa bawu na Nge ntangu yayi, Mfumu, na yina bawu ke kwenda na Chicago. Kwenda na bawu, Mfumu, mpe ti mosi na mosi kubaka Nsemo ya mbote yayi mpe kumwangisa Yawu, Mfumu, na kizunga ya mbanza ya Chicago, kisika nyonso yina bawu ke kwenda. Vwanda na bawu. Tii beto ke kutana, ti bampeve ya bawu kukangama na Nge. Na Nkumbu ya Yesu. Amen.

<sup>349</sup> [Mpangi Neville ke na kupesa profesu: “Yinga, samu na beno, bantu ya munu, na suka yayi dyaka, yinga mu ke tuba na nge kisadi ya Munu: Mu me ndima nge na kulonga Ndinga ya Munu. Mu ke landa nge mpe Mu ke tuba na nge na kingenga, yinga, Mu ke talisa nge nzila yina nge ke landa. Yinga, Mu ke vwanda na nge mpe ke sakumuna nge.]

<sup>350</sup> [“Yinga, bantu ya munu, mu ke tuba na beno na suka yayi: Mu kele Nzambi ya Ngolo nionso. Mu ke sadila vaze yayi, na suka yayi, Mu ke kwisa na nzila ya nge. Mu ke tuba na nge kukwenda ve na lweka ya Mpeve ya Munu, kuzimbana ve Ndinga yina ke na kutuba na nge. Mu ke vwanda na nge mutindu nge ke vwanda na munu. Bika banzila ya nge mpe bika mabanza ya nge mpe kwikila Munu samu Mu kele na nge. Kana nge ke kwisa na Munu mpe nge ke landa Munu na Mbotika, Mu ke sakumuna nge mpe Mu ke keba nge, Mu ke nata nge na muvimba ya nionso. Yinga Mu me tuba, Mu ke sala Yawu ve? Yinga, MUTINDU ME TUBA MFUMU.”—Mu.]

Beto telemisa maboko ya beto mpe beto tuba, “Matondo na Nge, Mfumu Yesu, lukumu na Nkumbu ya Nge.” Matondo na Nge, Mfumu.

<sup>351</sup> Beto me bakula yawu, Mfumu, ti Nge...kilumbu mosi Mpeve kubwaka na zulu ya muntu mosi, na Biblia, mpe tubaka kaka kinsweki nyonso ya Nzambi, yina zolaka salama. Tata, beto zaba ti Nge kele dyaka Nzambi mosi. Mpe awa Nge me kulumuka na zulu ya mwa pasteur yayi awa ya kukikulumusa, Mfumu, na suka yayi, yina vwandaka kilumbu mosi ntama kuna na Nicolaïsme, kasi Nge me ningisa yandi, yandi me mona Nsemo mpe me basika. Mpe awa ntima ya yandi kele mingi ya kuzibuka ti Nge ke zonga na yandi, tii yandi ke zaba ve yina yandi ke na kuzonzaka, mpe ke telama mpe ke bika Mpeve-Santu kusala na nzila ya yandi na ndinga ya profesu samu na beto. Matondo na Nge, Tata. Mpe mu ke—mu ke tala na Nge samu na banzila ya munu. Amen.

<sup>352</sup> [Mpangi mosi ya kento ke zonga na bandinga. Kisika ya mpamba na bande. Mpangi yankaka ya kento me pesa lutendulu—Mu.] Amen. Beno me bakula yawu, ve? Beno me mona yina ya vwandaka? Beno tala mbote ndinga ya kento yina me zonga, mpe beno tala mbote lutendulu kukwiza na ndinga mutindu mosi. Beno me mona? Ya kele bakento zole ya



kuswaswana, kana kukondwa ntembe bawu zaba ve mosi na yankaka. Bawu zaba ve—bawu zaba ve mosi na yankaka. Ya kele Mpeve-Santu, beno tala mbote mutindu ya kuzonza ya ndinga mutindu yina. Beno ke bakula ve ti ya kele Klisto na kati-kati ya bantu awa? Ya kele kieleka.

<sup>353</sup> Nge kele na kima nge zola kutanga, Mpangi ya bakala Pat? Landila, beno me mona. [Mpangi ya bakala Pat ke na kutuba, “Mu ke tanga na Apocalypse 22:16 na Nkumbu ya Mfumu Yesu: Munu Yesu me fidisa wanzio ya munu na kusamuna na beno bima yayi na mabuundu.”—Mu.] Amen.

<sup>354</sup> Ntangu yayi, yina kele kunatama ya kimpeve, ya Nzambi. Beno me mona, Mpeve-Santu kusala na nzila ya misambidi, ke talana kuna, ke zonza. Oh, Yandi kele ve mbote? Na kubanza, bankundi, ti ya kele kima mosi yina Biblia ke zonzila. Mpe ya kele awa bubu yayi, beto kele na nsatu ya kuyindula mingi dyaka ve. Oh, beno kwiza kuzwa Yandi, bantu ya munu ya ntalu. Beno kwiza, kuzwa Yandi.

<sup>355</sup> Teddy, na yina beto ke na kukubikaka samu na mbotika, (mpe mu ke sambila ti Nzambi kukumisa bantima ya beno ya kukubama) *Kisika Yandi Ke Twadisa Munu Mu ke Landa.*

<sup>356</sup> Mu lenda sadisa beno awa bankundi ya munu? Mbote, beno fwana—fwana kufwa ba-micro yango. Uh-hum. [Kisika ya mpamba na bande—Mu.]

<sup>357</sup> Mu ke lomba beno na Nzambi ya Moyo mpe na kupusa ya Ndinga ya Yandi ti beno kwiza mpe kubotama na Nkumbu ya Yesu Klisto. Beno bambuka moyo ti mu ke salaka yawu samu ti Biblia ke tuma beto na kusala yawu. Mpe—mpe Paul ke tuba na kusala yawu; mpe kana wanzio kulonga kima yankaka, ti yandi vwanda ya kusinga. Mpe mu—mu ke zola kaka kutuba yayi na nsuka ya nzila ya munu mutindu yandi salaka: Mu me samuna na beno malongi nyonso ya Nzambi mutindu mu zabila yawu, kieleka. Ata menga ya muntu na zulu ya beto.

<sup>358</sup> Oh, beno zola Yandi ve? Oh, mutindu mu zola Yandi. Mbote mingi, beto telama na yina beto ke yimba nkunga ya beto ya kubasika. Mbote mingi, tii ntangu yina beto ke:

Baka Nkumbu ya Yesu na nge,  
Mwana ya mpasi mpe ya mawa.  
Yawu ke pesaka kyese,  
Beno baka Yawu bisika nionso yawu ke  
kwenda.

Nkumbu ya Ntalu, (Nkumbu ya Ntalu!), O  
mutindu mbote! (O mutindu mbote!)  
Kivuvu ya ntoto mpe kyese ya Mazulu.  
Nkumbu ya ntalu, (Nkumbu ya ntalu!), O  
mutindu mbote! (O mutindu mbote!)  
Kivuvu ya ntoto mpe kiesa ya . . .

Ntangu yayi na yina beto ke kulumusa bayintu ya beto beto yimba:

Beto ke fukama na Nkumbu ya Yesu,  
Beto ke fukama na makulu ya Yandi,  
Samu na kubyadisa Yandi ntinu ya bantinu na  
Mazulu,  
Ntangu nzietolo ya beto ke suka.



*BAMWENSE KUMI, MPE NKAMA MPE MAKUMI*  
*YIYA NA YIYA YA FUNDA YA BA-JUIF* KNG60-1211M  
(The Ten Virgins, And The Hundred And Forty-Four Thousand Jews)

BANDANDANI YA LUZAYIKISU YA YESU KLISTO

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 11 ya Ngonda ya kumi na zole, na mvula 1960, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)